

# Yoane

## Yesuhât Den Pat Âlepŋe Yoaneŋe kulemguop.

---

**1** <sup>1</sup>Yesuhât topŋe Anitâhât Kai Toka yaŋeâmâ embâŋâmbâek Anitâŋe hân himbim ki kândikyotgop yapâek Anitâ orop dopyetŋe konohâk tatmâ gaowotŋak tatmâ gawot. <sup>2-3</sup>Kândik mindikum topŋambâek Kai Toka yaŋe Anitâ orop tatmâ gaowot yan Anitâhâlen kândiwahom himbimân dewutâ, emetsenŋe, pitu topŋe topŋe ekmain ya otmu hânân âliwahap topŋe topŋe ehekŋe, ki ehekŋe kerehâk kândikyongop. Yamâ ya yengâlen gâtŋe âlâŋe ikŋahâk ki teteop, bia kârikŋe. <sup>4</sup>Kai Toka yaŋe manman kârikŋahât amboŋe oap. Yakât otmâmâ laŋinŋe ikŋambâ gâtŋe yaŋe lohimbi biwinenŋan pilâmu haŋ sâningim gamap. <sup>5</sup>Yawu otmâ omoŋ bâlenan pilâmu omoŋ kâlehen manmaiŋe kâtâpŋune sâm hâum pâpŋum gamai. <sup>6-7</sup>Otmu Kai Toka yakât laŋinŋaŋe lohimbi biwinenŋan pilâmu ya ekmâ nâŋgâmunŋe bulâŋe otmu yâkâlen biwinenŋaŋe katnehât Anitâŋe lok âlâ, kutŋe Yoane, ya âi sâm waŋmu takaop. <sup>8</sup>Taka laŋinŋe amboŋahât amutŋen manmâ kulet sâm mâtâp mewañgim yâkât den pat âlepŋe sâm tetem eknongom manminiop. <sup>9</sup>Yâhâ laŋinŋahât amboŋe yakât topŋe yuwu tap. Yâkŋe lohimbi kerek nengât biwinenŋan laŋinŋe pilâmu ekmâ nâŋgâmunŋe keterakningiâkgât ge hohetnenŋan manop. <sup>10</sup>Kai Toka yaŋe ge hohetnenŋan manop yan lohimbi kingitŋe orowâkŋe topŋe nâŋgâm hâum pâpŋum ki ekŋetâ keterahop. Ikŋak Anitâhâlen kândiwahom lohimbi katyelekmu yapâ tetem gawiŋe amboŋe ekmâ topŋe hâum pâpŋuwi. <sup>11</sup>Yâhâ dop yawuâk ikŋe torehenlipŋe yengât hohetyeŋan takamu ekŋetâ ki keterakŋiŋgiopgât betbaŋgiwi. <sup>12</sup>Yawu gârâmâ nen lok nombotŋaŋe yâkâlen biwinenŋe katbin yamâ mâmâŋe otingimu Anitâhât nan baralipŋe otmâ mansain. <sup>13</sup>Anitâhât nan baralipŋe otmâ mansain yakât topŋe yuwu tap. Lohimbi katyelekmu yapâ tetem gamunŋe gamunŋe sambe sambe oain yakât otmâ Anitâhât nan baralipŋe ki otbin. Me lok nombotŋaŋe

nengât sen yaŋe tetem sambe otŋet sâm imbi miakmâ manbi yaŋe gurâ bia. Anitâ ikŋak mâmâŋe otningimu yakât nan baralipŋe otmâ gain.

<sup>14</sup>Bâiŋ, Kai Toka yaŋe ge imbi tepŋambâ tetem lok otmâ hohetnennan manmâ tep âlep nâŋgâningiop. Nâŋgâningimu manmanŋe ekmunŋe bulâŋe otmu Anitâhât nanŋe ombe bisiŋe dopyetŋe konohâk yawu otmutâ yelekbin. <sup>15</sup>Yâhâ lok otmâ manmu Yoaneŋe ekmâ lohimbî yuwu sâm ekyongop. “Emelâk lok yukât nâŋgâm yuwu sâm ekyongowan. “Nâŋe embânâmbâek meŋnahât tepŋambâ ki tetewan yapâek tatmâ gaop. Yakât otmâmâ nâŋe kulet sâm mâtâp mewañgim yâkât amutgen mansan.” Yawu sâm ekyongowan.” Yawu sâop.

<sup>16</sup>Yawu gârâmâ manman kârikŋe yakât amboŋaŋe tep âlep nâŋgâningimap ya pesuk sâwuapgât dop âlâ ki tap. Yamâ witgum nâŋgâningim yâhâwuap. <sup>17</sup>Emelâk Anitâŋe Mose ekumu girem den topŋe topŋe kulemuop ya ekmunŋe manman tawi tawiŋe oap. Yâhâ sâp yiwereneâmâ Anitâŋe Yesu Kiristo hâŋgângumu ge wawaeneksap ya ekmunŋe bulâŋe dondâ oap. <sup>18</sup>Nenŋe Anitâ ki ekmain. Yawu gârâmâ yâkŋe ikŋe nanŋe ombe bisiŋe hâŋgângumu ge manop. Yâkŋe yawu olop yan nenŋe Anitâhât topŋe nâŋgâm heŋgeŋgunchât yâkŋe sâm tetekŋan tuhumu nâŋgâm heŋgeŋguwin.

### Yoaneŋe lohimbî toen katyehop.

*(Mataio 3:1-12; Mareko 1:2-8; Luka 3:2-18)*

<sup>19</sup>Kândikum lohimbîŋe orotmemeyeŋe bâleŋe ya betbaŋŋetâ Yoaneŋe âi topŋe katmâ toen katyehop. Toen katyekmu yakât topŋe nâŋgâne sâm hotom uminiwi yengât kunlipyeŋaŋe bukulipyeŋe nombotŋe hâŋgânyongowi. Hâŋgânyongoŋetâ hoŋ bawalipyeŋe meyekŋetâ orowâk Yerusalem kapi pato pilâm ge Yoanehâlen ari âikuwi. “Gâ topgahât sârâ nâŋgâne.”

<sup>20</sup>Âikuŋetâ sâop. “Anitâŋe hoŋ bawa âlâ hâŋgângumu ge tihitnenŋe otmâ galemnongowuap sâmai ya nâ bia.”

<sup>21</sup>Sâmu sâwi. “Yawu yatgât âlâkuâk sârâ nâŋgâne. Emelâk embânân poropete âlâ, kutŋe Elia sâm, manop. Yâkŋe yâhâpŋe tetem hohetnennan manmâ Anitâŋe hoŋ bawa âlâ hâŋgângumu ge tihitnenŋe otmâ galemnongowuap yakât mâtâp mewañgiwuap yamâ gâ me âlâhât mambotmain.”

Sâŋetâ sâop. “Bia, yai yamâ nâ bia.”

Sâmu sâwi. “Anitâŋe poropete âlâ hâŋgângumu ge mâtâp meningiwuap nâŋgâmain ya gâ me âlâhât mambotmain.

Sâŋetâ sâop. “Lok ya nâ bia.”

<sup>22</sup>Sâmu sâwi. “Topge ki eknongoat. Yakât otmâ yiwerenŋe âwurem ari papatolipnenŋe girawu sâm ekyongomunŋe nâŋgâŋetâ ârândân otbuap? Bâiŋ, gike topge tâŋ tâŋâk sârâ nâŋgâneâyâ.”

<sup>23</sup>Sânetâ sâop. “Nâne lok ki manmaiângen manmune lohimbije nâhâlen takaŋetâ yuwu sâm ekyongom mansan.

“Pumŋe lauŋe uk sâm huruŋ sâm ya kum kilikmâ mem ârândân merândân tuhuŋetâ tatbuap. Yawu otmâ lok kutdâhât mâtâp mewaŋgiŋet.”

Den yu poropete âlâ, kutŋe Yesaia sâm, yâkŋe kulemuŋop.”

<sup>24</sup>Yawu sâmu Parisaio lok orowâk takawiŋe yuwu sâm âikuwi.

<sup>25</sup>“Anitâne hoŋ bawa âlâ hânŋângumu ge tihitnenŋe otmâ galemnongowuap sâmain ya “nâ bia” yawu yat. Me Elianŋe yâhâpŋe tetewuap ya gurâ bia. Me poropete lok âlâ me âlâ gurâ bia. Yawu yat gârâmâ topŋe girawuhât otmâ lohimbiji toen katyekmâ mansat?”

<sup>26</sup>Sânetâ sâop “Nâmâ toen mem katyekman. Yâhâ lok kutdâ âlâ hohetyeŋan mansap yâkât wâtŋe âlâ tatbangiap ya ekŋetâ ki keteraksap. <sup>27</sup>Hâmbâi lok yaŋe âi topŋe katmâ tuhumu eknomai. Nâmâ lok inŋe mansan. Yakât otmâ nep tuhuwuap yawuya tuhuwomgât dop bia. Me yâkât itâkat gurâ kâpekâ golewangiwiomgât dop âlâ ki tap.” Yawu sâm ikŋahât nânŋâmu giop.

<sup>28</sup>Yâhâ Yoaneŋe kapi âlâ, kutŋe Betani sâm, ya Yoran to nombotgen tap yan manmâ toen katyekminiop. Den matŋe yawu ekyongomu purik sâm Yerusalem kapiân âwurem ariwi.

### Yoaneŋe Yesu toen kalop.

<sup>29</sup>Otmu emet haŋ sâmu Yesuŋe Yoanehâlen ariop. Arimu akŋangembâek ekmâ yuwu sâm lohimbiji mem toen katyehop ya ekyongop. “Lok enda ekŋet. Endamâ Anitâne hânŋângumu ge lamahât dop otbuap. Yakât otmâ dop kum sâmune nânŋâŋet. Nengât tosa pesuk sâningiâkgât opon kâmbukŋahât galem mansaiŋe hotom une sâm yan lama nanŋe kum gâim uŋetâ semu hotomŋaŋe yâhâmu Anitâne nânŋâningimâp. Yakât dopŋeâk lok endanŋe tosanenŋahât otmâ kawenenŋan kinmu kuŋetâ mumbuap yakât otmâ Anitâne hânŋângumu ge mansap. <sup>30</sup>Otmu emelâk lok yukât topŋe yuwu sâm ekyongowan. “Hâmbâi yâkŋeâmâ âi topŋe katmâ tuhumu eknomai. Nâne embânâmbâek meŋnahât tepŋambâ ki tetewan yapâek tatmâ gaop. Yakât otmâ nâne kulet sâm mâtâp mewaŋgim yâkât amutgen mansan.” <sup>31</sup>Emelâk ki nânŋâwâŋgiwan. Yâhâlen puwâk takamu ekban. Otmu yen Isirae lohimbiji yâkât topŋe nânŋâŋetâ keterahâkgât nâne mâtâp mewaŋgim toen mem katyeksan.

<sup>32-33</sup>Nâhâlen takamu toen katban yakât topŋe yuwu sâmune nânŋâŋet. Emelâk nâne yâkât topŋe ki nânŋâm manban yan Anitâne nâne toen katyekbom yakât yuwu âi sâm nihim hânŋânnohop. “Gâŋe lohimbiji toen katyekbuat yanâmâ nine Wâtŋât mâmâŋahât Heak hânŋângumune ge lok âlâhât kunŋan tatbuap lok yaŋe lohimbiji manman âilonŋoân katyekmu

Wâtgât māmâñahât Heakñe māmâñe otyiñgiwuap.” Yawu sâm eknohop. Yawu sâm eknohomu launje lâum lohimbi toen katyekmâ yanjak lok eksai yu toen katban. Toen katmune yanâk himbim pâroñ sâmu Anitâhât Wâtgât māmâñahât Heakñe kembâ hâtgum ge māmâñe otbañgiop. <sup>34</sup>Māmâñe otbañgimu yakât topñe nâñgâm heñgeñguan. Yâhâmâ Anitâhât nanje mansap.” Yoaneñe Yesu takamu ekmâ yawu sâop.

#### Yesuñe nâ otmu Anderea menelehop.

<sup>35</sup>Emet hañ sâmu Yoaneñe ikñe hoñ bawayâhâtñe, nâ otmu lok âlâ, kutñe Anderea, Simon Petorohât imiñe, menelekmu dengân âlâ, kutñe Galilaia sâmu, yakât ginñehen ariwin. <sup>36</sup>Arimunñe Yesuñe gam wanginenekmâ bamu Yoaneñe ekmâ yuwu sâmu eknogop. “Lok yu wanginenekmâ bap enda ekset. Yâhâmâ Anitâñe hâñgângumu ge lamahât dop otmâ nengât toсахât otmâ kawenennan kinmu kuñetâ mumbuap yakât otmâ Anitâñe hâñgângumu giop.” Yawu sâop.

<sup>37</sup>Yawu sâmu, nâñgâmutñe bonñe otmu Yoane pilâm Yesu betñan sâmutñe orowâk ariwin. <sup>38</sup>Yesuñe purik sâmu yuwu sâmu eknogop. “Yet wongât betnan watneksawot?” Sâmu sâwit. “Kutdâ, gâ emet girawuân imat?” <sup>39</sup>Sâmutñe sâop. “Orowâk ari emet ya tiripyotgowom.” Yawu sâmu orowâk ari emetñan yâhâ tatmâ den huhuwin. Den huhum tatmunñe emetsenñe emelâk purik sâmu giop.

<sup>40-41</sup>Otmu bukune Andereañe, pilânelekmâ yahatmâ, ari atañe, kutñe Simon, mem tetem yuwu sâmu ekuop. “Anitâñe lok âlâ hâñgângumu Yura nengât tihitnenñe otmâ galemngowewe sâmu ge mansap ya eksait.” Yawu sâop. Lok yakât kutñeâmâ Kiristo. <sup>42</sup>Yawu sâmu netgâlen dâim takamu Yesuñe Simon ekmâ yuwu sâmu ekuop. “Simon, Yoane nanñe, gâmâ yiwereñe kutge âñe, Kepa sâmu gohonsan.” Yawu sâop. Kut yamâ Girik yengât denân Petoro. Yakât topñeâmâ benben me kon yawu.

#### Yesuñe Pilip yet Natanae meyelehop.

<sup>43</sup>Otmu emet hañ sâmu Yesuñe Galilaia hânângen ariwe sâmu olop. Yawu otmâ yanâk lok âlâ, kutñe Pilip sâmu, ya ekmâ yuwu sâmu ekuop. “Garâ, orowâk arire.” <sup>44</sup>Otmu Pilip yamâ Anderea yet Petoro, orop kapiyene kutñe Besaita, ya ambolipñe. <sup>45</sup>Yesuñe Pilip memu yâkñe in yawu ari bukuñe âlâ, kutñe Natanae sâmu, ya yuwu sâmu ekuop. “Emelâk Anitâñe hoñ bawa âlâ hâñgângumu ge tihitnenñe otmâ galemngom manbuap yakât Mose otmu Anitâhât poropetelipñe kulemguwi ya eksain. Yâhâmâ Yosep nanñe, Nasaret kapi amboñe,” yawu sâop. <sup>46</sup>Yawu sâmu sâop. “Yakât nâñgâmunne gemap. Nasaret kapi ambolipñe âlâ me âlâñe tânnongonomaihât dop âlâ ki tap.” Sâmu sâop. “Bâiñ. Gam ek.”

<sup>47</sup>Yawu sâmu Natanaeñe Yesuhâlen takamu yan, yuwu sâmu eknogop. “Yu ekñet. Lok yuâmâ Isirae amboñe otmu tâñ tâñâk mansap.” Yawu

sâop. <sup>48</sup>Yawu sâmu Natanaeŋe âikum sâop. “Gâ wonângen manmune nehongât yawu yat? Sâmu sâop. “Gâ Pilipŋe ki gohonsap yan lakop kuriŋ amutgen Anitâ mepaem tatdâ geksan.” <sup>49</sup>Sâmu sâop. “Kutdâ gâ Anitâhât nanŋe. Isirae nengât kunnenŋe mansat.” <sup>50</sup>Sâmu sâop. “Lakop kuriŋ amutgen geksan yakât otmâ topge nanŋan. Yu sâm tetem ekgohoan yakât otmâ yat. Yawu gârâmâ hâmbâi kulem topŋe topŋe memune ekdâ âlâ kândâkdâ otbuap.” <sup>51</sup>Yawu sâm ekum benŋe yuwu sâm eknongop. “Bulâŋanâk yuwu sâmune nâŋgâŋet. Anitâŋe bulâŋanâk hâŋgânnohomu gewan yakât topŋe teteâkgât ewapâ himbim pâroŋ sâmu yâkât aŋelolipŋaŋe mâmâŋe otnihim yâhâm gem otŋetâ yekmâ nâhât topne ekmâ nâŋgânomai.” Yawu sâm eknongop.

### Kana kapiân Yesuŋe kulem miop.

**2** <sup>1</sup>Yawu sâm eknongomu hilâm yâhâp pesuk sâmu yan kapi âlâ, kutŋe Kana sâm ya Galilaia hânân tap yan gâtŋe âlâŋe imbi membe sâm otmu bukuliŋaŋe heronŋe nâŋgâyitgim menduhuakbi. <sup>2</sup>Menduhuyehop ya amboŋaŋe Yesu ikŋe otmu mâmâŋe otmu nen hoŋ bawalipŋe dâinenekmu orowâk emetyetŋan yâhâwin. <sup>3</sup>Yâhâ menduhuakmâ nem tatmunŋe wain to ya biatmu Yesu mâmâŋaŋe yakât sâm ekuop.

<sup>4</sup>Ekumu sâop. “Meŋ, yakât ki nâŋgârâ gorâhihiâk. Anitâ ikŋjak nâŋgâmu âi topŋe katbehât nanŋan.”

<sup>5</sup>Sâmu mâmâŋaŋe emet amboŋe yakât hoŋ bawa âlâ yuwu sâm ekuop. “Nannaŋe yu me ya otŋet sâwuap yawuâk otnomai.”

<sup>6</sup>Otmu emet ya kâlehen amaŋ papato bât nombolân konok ya tatyŋgiop yakât topŋe yuwu. Yura lohimi Anitâŋe nâŋgâningimu ârândânŋ olâkgât to yaŋe mem sot nenehât senŋe âlâlâ ya piriminiwin. Otmu yapâ gâtŋaŋe to osom neminiwin. Otmu kâi bâtnenŋe piriakminiwin.

<sup>7</sup>Yakât otmâ Yesuŋe emet amboŋahât hoŋ bawalipŋe yuwu sâm ekyongop. “Ba to osom mem ga amaŋân gâiŋetâ pik sâek.” Yawu sâmu to osom ga gâiŋetâ pik sâop. <sup>8</sup>Yawu otŋetâ yuwu sâm ekyongop. “Aiop, yupâ to osom ba galemeyeŋe ya waŋetâ niâk.” Yawu sâmu osom mem ba waŋetâ niop.

<sup>9</sup>Yawu gârâmâ to yaŋe emelâk purik sâm wain olop. Yawu otmu galemeyeŋaŋe nemu ukenŋe otmu biwiŋaŋe yuwu nâŋgâop. “Wain toŋe emelâk biatningiap. Yu nemune ukenŋe oap yu wosapâ mem gai?” Yawu nâŋgâm yakât topŋe hâum pâpŋuop. Yawu gârâmâ to osom mem waŋbiŋe yakât topŋe nâŋgâwi. Yâhâ wain to ya nemu ukenŋe otmu yaŋak lok imbi miop ya yuwu sâm ekuop. <sup>10</sup>“Aŋgoânâmâ wain ukenŋe sâm bukuliŋeŋe gâim yŋiŋetâ nem biwiŋeŋe hâlim otŋetâ yakât kakŋanâmâ wain pâlâmŋe gâim yŋigimai. Yâhâ gâŋeâmâ wain to yu kuratgum tatgât bet mem ga ningirâ nem nâŋgâmune âlâ oap.” Yawu sâop.

<sup>11</sup> Yesuŋe Kana kapi yan âi topŋe katmâ kulem memu ekmunŋe âlâ kândâkdâ otmu yâkâlen biwinenŋaŋe kepeiwin.

<sup>12</sup> Otmu ya pesuk sâmu Yesuŋe imilipŋe otmu mâmâŋe meyekmu Kana kapi ya pilâm Kapanaum kapi yan orowâk gem ariwin. Gem ari yan tatmunŋe hilâm mome pesuk sâop.

**Yesuŋe opon kâmbukŋan yâhâ lok watyehop.**  
(*Mataio 21:12-13; Mareko 11:15-19; Luka 19:45-46*)

<sup>13</sup> Otmu sâp yanâmâ Yura nengât Tihit tihit Hombaŋ ya tâlâhumu Yesuŋe menenekmu Yerusalem kapiân yâhâwin. <sup>14-16</sup> Otmu opon kâmbukŋan yâhâmunŋe yan lok nombotŋaŋe kembâ puluhum tatbi otmu lama bulimakao me senŋe âlâlâ anŋi guŋgi otmâ hâmeŋe hâukum kinbi ya Yesuŋe yahatmâ yuwu sâm sâyŋgiop. “Awoŋnahât opon yu kâlehen ki orotŋe otŋetâ anŋim bero emetŋahât dop oap.” Den yawu sâm tewetsenŋe hâukum kinbi ya yengât kakŋan tat tat, tewo, me senŋe âlâlâyeŋe mem purik pilâyŋgiop. Yawu otmâ lama bulimakao ya yongom watyekmu tiok taok otmâ arim kinbi. Yawu olop. <sup>17</sup> Otmu tâmbânenne, kutŋe Dawiti sâm, yâkŋe den kulemguop ya nâŋgâmunŋe teteop ya yuwu tap.

“O Anitâ, lohimbi nombotŋaŋe gâhât opon kâlehen yâhâ tatmâ ki orotŋe otmai sâm biwinaŋe kou kâlâp siap.”

Den yawu tatmap ya nâŋgâmunŋe teteop.

<sup>18</sup> Yawu otmâ watyekmu ariŋetâ Yura papatolipnenŋaŋe ekŋetâ bâlemu yuwu sâm ekuwi. “Gâŋe oat yu nâŋgâmunŋe dondâ bâleap. Âlâŋe mâmâŋe otgihimu yu oat? Gâŋe wuân kulem mendâ nenŋe gekmâ Anitâŋe nâŋgâhahimu oat yawu nâŋgâmunŋe ârândân otbuap?” Yawu sâwi.

<sup>19</sup> Sâŋetâ sâop. “Yeŋe Anitâhât opon yu liakunomai. Otmuâmâ nâŋeâmâ sâp kâlep bia, hilâm kalimbu yakât biwiŋan tuhum maŋguwom.” Yawu sâop. <sup>20</sup> Yawu sâm ekyongomu sâwi. “Maiŋ, papatolipnenŋaŋe opon kâmbukŋe yu yambu 46 biwiŋan tuhuwi. Gârâmâ gâŋeâmâ girawu otmâmâ “hilâm kalimbu biwiŋan tuhum maŋguwom” yat. Den yat yakât nâŋgâmunŋe ki ârândân oap.” Yawu sâwi.

<sup>21-22</sup> Yesuŋe den sâop yakât topŋe yamâ âlâ miop. Yuwuhât sâop. Yâhâmâ kuŋetâ mumu hilâm kalimbu pesuk sâmu yan yahatbuap yakât topŋe sâop. Yakât otmâ mumuŋambâ yahalop sâp yanâmâ den sâop ya nâŋgâmunŋe bulâŋe olop.

<sup>23</sup> Yesuŋeâmâ Tihit tihit Hombaŋ yan Yerusalem kapiân tatmâ kulem topŋe topŋe memu lohimbi kiŋgitŋe orowâkŋe ekŋetâ bonŋe otmu yâkâlen biwiyeŋe katbi. <sup>24-25</sup> Yawu otŋetâ lohimbi nengât biwinnenŋe ekmapŋe topyeŋe ekmâ nâŋgâop. Topyeŋe nâŋgâm yaŋak yâk yengâlen ki torokalop.

**Nikotemoŋe manman kârikŋahât Yesu âikuop.**

**3** <sup>1</sup>Otmu Parisaio yengâlen gâtŋe âlâ, kutŋe Nikotemo sâmu, yâkŋe Yura nengât lok kunŋe manop. <sup>2</sup>Omoŋ âlâen lok yaŋe Yesuhâlen ari yuwu sâmu ekuop. “Kutdâ, gâhât topge naŋgain. Gâŋe kulem topŋe topŋe memaŋt yu lok nombotŋe Anitâ orop ki mansaiŋe kulem yuwuya menomaihât dop âlâ ki tap.”

<sup>3</sup>Sâmu sâop. “Âinohowe sâmu oat ya emelâk naŋgan. Yakât yuwu sâmune nâŋgâ. Lok âlâ me âlâ Anitâŋe tihityeŋe olâk sâmu mâmâlipyeŋe yengât tepyeŋambâ tetewi yakât dopŋeâk yâhâpŋe teteŋetgât naŋgan.”

<sup>4</sup>Sâmu sâop. “Bâe, nâ emelâk lok oan. Yakât girawu otmâmâ âlâkuâk meŋnahât tepŋe kâlehen yâhâ tatmune yâhâpŋe menekbuap. Ya ki orotŋe.” Yawu sâop.

<sup>5</sup>Sâmu sâop. “Yuwu sâmune nâŋgâ. Lok âlâ me âlâŋe orotmemene bâleŋe bet pilâm Anitâhâlen biwiyeŋe katnomai yamâ toen katyeknomai. Toen katyekŋetâ Wâtgât mâmâŋahât Heakŋe mâmâŋe otyiŋgimu Anitâŋe tihityeŋe otbuap. <sup>6</sup>Yakât torokatmâ yuwu sâwe. Nen kerekŋe mâmâlipnenŋe yengât tepyeŋambâ tetem towat konohâk oain. Yâhâ umut biwinenŋe yamâ Wâtgât mâmâŋahât Heakŋe mâmâŋe otniŋgim mem hewewenŋe tuhunenekmu manman kârikŋahât mâtâp teteningimâp. <sup>7</sup>Yawu gârâmâ “mâmâhahât tepŋambâ teteon yakât dopŋeâk yâhâpŋe tetewuat,” sâmu ekgohoan yakât ki nâŋgârâ sâtŋe otbuap. <sup>8</sup>Yakât den âlâen hâmu sâmune den ya nâŋgârâ keterakgihiâk. Siru ya wosapâ topŋe katmâ takamap? Otmu wosaken bâiŋe arimâp? Yakât topŋe ki nâŋgâmain. Siru pilâmap ya munŋeâk nâŋgâmain. Yakât dopŋeâk Wâtgât mâmâŋahât Heakŋe mâmâŋe otyiŋgimu biwiyeŋe hewewenŋe otmâ Anitâhâlen katmai. Biwiyeŋe âlâhâlen kinmap yakât ki eŋakmâ naŋgaŋgimai.” Yawu sâop.

<sup>9</sup>Sâmu sâop. “Bâe, den yat ya nâŋgâm pâpguan. Âlâkuâk sârâ nâŋgâwe.” <sup>10</sup>Sâmu sâop. “Gâŋeâmâ Anitâhât den Isirae lohimbi kâsikumu yiŋgirâ yakât nâŋgâhihiŋetâ yahatmap. Yakât girawuhât otmâ den yan yukât topŋe ki naŋgat? <sup>11</sup>Yakât yuwu sâmune nâŋgâ. Nenŋe sennenŋe ekmâin otmu biwinenŋan tetemu nâŋgâmain ya sâmu tetem Parisaio yen ekyongom mansain. Yawu gârâmâ yeŋeâmâ dennenŋe nâŋgâŋetâ gemu bet pilâmai. <sup>12</sup>Yâhâ nâŋe manman topŋe topŋe yakât ekyongomuneâmâ nâŋgâŋetâ ki bulâŋe otmap. Yakât otmâmâ girawu otmâ himbimâgât topŋe ekyongomune nâŋgâŋetâ bulâŋe otbuap? <sup>13</sup>Lok âlâŋe himbimân ki yâhâm purik sâmu ge yakât topŋe lohimbi ekyongomâp. Nâ konok Anitâŋe himbimâmbâ hâŋgânnohomu ge yakât topŋe ekyongom mansan.

<sup>14</sup>Emelâk Moseŋe yuwu otbomgât dop olop. Isirae lohimbiŋe lok ki manmaiângen manmâ otŋetâ bâleop yakât matŋe hambe sâtŋe metŋe yaŋe yiŋgimu muwi. Yakât otmâ Moseŋe hambe umutŋe hâwim nahân kepeim kânâŋgâmu ekmâ yan âlepŋe otbi. Yakât dopŋeâk lohimbi

kerekŋe otŋetâ bâlemap ya yengât tosayeŋe biatyinŋiâkgât Anitâŋe sâmu nâ howanân nohom kânânŋgânekŋetâ kinbom. <sup>15</sup>Howanân kinmune yapâ gâtŋaŋe lok âlâ me âlâŋe biwi nânŋân nânŋânyeŋaŋe nâhâlen kepeim mannomai yamâ tosayeŋe biatyinŋimu manman kârikŋan mannomai.” Yawu sâop.

<sup>16</sup>Anitâŋe ikŋe engatŋeâk otmâ lohimbi kerek wawaenenekmâ ikŋe nanŋe ombi bisinŋe hânŋângumu ge nengât kawenenŋan kinmu howanân kuŋetâ muop. Yawu gârâmâ yâkâlen biwinenŋe kepeim manmâ yâhânom yanâmâ manman kârikŋe ya menom. <sup>17</sup>Anitâŋe nanŋe hânŋângumu ge manman kârikŋan torokatnenehop. Yakât otmâ nenŋe yâkâlen biwinenŋaŋe kepeim manmâ yâhânom yanâmâ sâp patoen den âiân ki katnenekbuap. <sup>18</sup>Otmu nen Yesuhâlen biwinenŋaŋe hikum manmain nenâmâ emelâk manman kârikŋahât pat kuningimu tap. Yakât den âiân katnenekbuapgât dop ki tap. Yâhâ lohimbi nombotŋaŋe Anitâ nanŋahât biwiyenŋe pâlâmŋe otmu betbangim mansai yamâ emelâk kâlâwân seyekbuapgât pat kuyinŋiop. <sup>19-21</sup>Yâhâ Anitâŋe nen lohimbi kerek mem kiwilinenekmâ matŋe ningimu menom yakât topŋe yuwu tap. Nen lohimbi kerekŋe orotmeme bâleŋe otne sâm yan bukulpennŋaŋe nenekmâ nânŋâm bâleningimai sâm kurihiakmâ tihân otmâ gamain. Yâhâ nenâmâ Yesuhâlen biwinenŋaŋe kepeim tem lâuwangim mansainŋe topnenŋe ki kurihiakmain. Nenŋe lok senyeŋan kinmunŋe manmannenŋe tetekŋan ekmai. Yâhâ lohimbi nombotŋaŋe orotmemeyeŋe bâleŋe ya witgumâk otmâ mansaiŋe topyeŋe kurihiakmâ Yesu, laŋinŋe amboŋahât hâkâŋ otmâ betbangimai.

### Yoaneŋe ikŋe topŋe sâm tetem ekyongop.

<sup>22</sup>Otmu Nikotemoŋe pilâm arimu yakât kakŋan Yesuŋe nen hoŋ bawalipŋe menenekmu Yerusalem kapi pilâm Yuraia hânân ari manbin. Yan manmunŋe Yesuhât sâtŋât otmâ lohimbi nombotŋe toen mem katyekbin. <sup>23-24</sup>Otmu sâp yan Herotŋe ki sâmu Yoane mem pâi emetŋan katŋetâ talop. Sâp yan Yoaneŋe kapi âlâ, kutŋe Ainon sâm, ya Salim kapi gotŋan tap yan ariop. Yan arimu to senŋe sambe yan tap yakât ambolipŋe kiŋitŋe orowâkŋe yâkâlen ariŋetâ toen katyehop.

<sup>25</sup>Toen mem katyehop yan Yura lok âlâŋe Yoanehât hoŋ bawalipŋe yengâlen arimu Yura ambolipŋe Anitâŋe yekmu ârândân olâk sâm to piriakbi orotmeme yakât den sahaŋgiwi. <sup>26</sup>Den sahaŋŋetâ Yoanehât hoŋ bawalipŋaŋe ari yuwu sâm ekuwi. “Lok pato. Emelâk gâ orowâk Yoran to nombotgen manmunŋe lok âlâŋe gâhâlen takamu yâkât nânŋârâ yahalop. Lohimbi sesenŋâlâkŋe nânŋâninginŋetâ gemu lok yakâlenâk ariŋetâ toen mem katyeksap. Yakât nânŋâmunŋe dondâ bâleap,” yawu sâwi.

<sup>27</sup>Yawu sâŋetâ yuwu sâm ekyongop. “Anitâŋe lohimbi biwiyenŋe mem hewewenŋe tuhumu yâkât nânŋâwanginŋetâ yahatmu yâkâlen ariai.



Lohimbiņe nengâlen torokatņetgât eņgatyenjan ki kioņnom. Yamâ wongât? Anitâ ikņjak yakât amboņe oap. <sup>28</sup>Yawu gârâmâ lok yakât yai ya emelâk yâkât topņe yuwu sâm ekyongowan. “Anitâņe hoņ bawa âlâ hânġângumu ge tihitnenņe otmâ galemnongowuap ya nâ bia. Nâmâ kulet sâm mâtâp mewañġian.” Yawu sâwan.

<sup>29</sup>Yakât otmâmâ den âlâen hâum sâmunne topņe nânġâņetâ keterahâk. Lok âlâ yayalipņane imbi yâkât pat kuwaņġinomai. Pat kuwaņġinetâ manbuap. Manmâ yâhâm miakdomawot yan heroņe otnomai. Yakât dopņeâk lohimbî sesenġâlâkņe Yesuhâlen torokatņetâ heroņe oan. <sup>30</sup>Sâp yiwerenņe yupâek lohimbî kiņġitņe orowâkņe nânġâwaņġinetâ yahatmu yâkâlen torokatnomai. Yâhâ nâmâ nânġânihiņetâ gemu âi tuhum tiņ pilâm gulip otbom.” Yawu sâop.

### Yoaneņe Yesuhât topņe sâm ekyongop.

<sup>31-32</sup>Yoane den yawu sâm ekyongop yakât topņeâmâ yuwu. Nenņe menlipnenņe yenġât tepyeņambâ tetewin. Gârâmâ manmannenġahâlâk nânġâm alahu gulahu otmain. Yâhâ Anitâņe Yesu hânġângumu ġiop. Yakât otmâ kunnenņe pato otmâ âwâņahât topņe eknongom mansap. Yawu gârâmâ lohimbî getek âlâņe denņe nânġâņetâ bulâņe otmu yâkâlen biwiyeņane tiņâk kepeim mansai. <sup>33-35</sup>Anitâņe nanņe wawaemu biwiyetņe kepeiakmâ konohâk otmu tatmawot. Yawu tatmawot yamâ âwâņane âi sâm waņmâ hânġângumu ġiop. Gem yan kunnenņe manmâ Wâtġât Mâmâņahât Heakņe mâmâņe otbaņġimu âwâņahât den ya tâņ tâņâk eknongom mansap. Yâkņe den eknongop ya nânġâmunņe bulâņe otmu yâkâlen biwinnenņane kepeimain. <sup>36</sup>Yawu gârâmâ lok âlâ me âlâņe Anitâ nanġahâlen biwiyeņane kepeim mannomai yamâ manman kârikņahât pat kuyiņġiop ya menomai. Yâhâ lok âlâ me âlâņe yâkât den betbaņġim mannomai yamâ Anitâņe kuk otmâ hâhiwin yiņġimu nânġâm tatbisâi.

### Yesuņe Samaria yenġâlen ariop.

**4** <sup>1-2</sup>Lohimbî dondâņe Yoanehâlen ariņetâ toen katyehop. Yawu gârâmâ lohimbî kiņġitņe orowâkņe Yesuhât nânġâņetâ yahatmu yâkâlen takaņetâ yâkât sâtġât nen hoņ bawalipņane toen katyekbin. Toen katyekbin yakât Parisaioņe nânġâņetâ bâleop. <sup>3</sup>Nânġâņetâ bâlemu yaņak Yesuņe Yuraia hân pilâm Galilaia hânângen âwurem ariwe sâm otmu orowâk ariwin. <sup>4</sup>Ari Samaria yenġât hân tânâmġambâ hârem ariwin. <sup>5</sup>Ari kapi âlâ, kutņe Sika sâm, ya mewin. Otmu emelâk embâņânâk kapi yakât gotņan tâmbânenņe âlâ, kutņe Yakop sâm, yâkņe tohât lâm kâlep pato kendâop. Kendâmu yapâek to hindakmâ tumuņan tatmu osom nemai. Otmu lâm kendâop ya nanņe Yosep pilâwaņġiop. <sup>6</sup>Nen mâtâwân arim tatmunņe sikopņe dondâ nongop. Yakât otmâ to ya ġinjan ge tatmâ hâknenņe mewin.

**Manman kârikjahât to yakât amboje yamâ Yesu.**

<sup>7-8</sup> Yesuâmâ yan tatmu nenâmâ pilâm sot puluhune sâmb kapiân yâhâwin. Katmâ yâhâmunje yan ikjiâk tatmu imbi âlânje to osowe sâmb kapiângembâ giop. Gemu Yesuñje yuwu sâmb ekuop. “To osom niñdâ nembhât nanjan.” Yawu sâop.

<sup>9</sup> Yawu sâmbu yan biwiñaje nânğâop. “Yen Yura lohimbije nenekmâ nânğâm bâleningim nengât tera me osom bero yañje ki katmâ nemai.” Biwiñaje yawu nânğâm yakât otmâ pârâk pilâm yuwu sâop. “Gâmâ Yura lok. Yawu gârâmâ girawuhât otmâ tohât ulitnohoat? Ya kâmbukje yakâ.” Yawu sâop.

<sup>10</sup> Sâmbu sâop. “Anitânje hewewenâk otmâ lâtpnongomap yakât topñje gâñje ki nanjat. Otmu nine topne gurâ ki nanjat. Nanjat mâne emelâk manman kârikjahât to yakât ulitnohombât.” Yawu sâmb ekuop.

<sup>11</sup> Sâmbu sâop. “Lok pato, to yuâmâ lâmb kâlep pato. Yawu gârâmâ to osowuatgât wahap barahâk tat yukâ. Wuânñje mem manman kârikjahât to yat ya osowuat? <sup>12</sup> Yâhâ tâmbânenñje Yakopñeâmâ lâmb yu kendâm yupâ to osom neminiop. Otmu nanlipñje otmu lama bulimakao osom yingimu neminiwi. Yâhâmâ to yupâek nem manminiwi. Yakopñje otmâ manminiop ya wangim otbuatgât nânğâm yu yat me?”

<sup>13</sup> Sâmbu sâop. “To yuâmâ lok âlâ me âlânje neñetâ yâhâpñje tohât kân kânâk katyekbuap. <sup>14</sup> Yawu gârâmâ nine manman kârikjahât to osom yingimune nenomai. Ya nenomai yakât otmâ yengâlembâ to yañje punduñ punduñ sâmb ga takamu ya nem manman kârikñje manmâ yâhânomai. Yakât otmâ tohât kân kânâk katyekbuapgât dop âlâ ki tap.”

<sup>15</sup> Sâmbu sâop. “Maiñ, lok pato. Nâñje hilâm ârândânñje to yupâ osowe sâmb kapi pilâm gem yâhâm tatman. Yawuâk otmâ manmangât gike to osom niñdâ nemune yâhâpñje tohât ki katnekbuapgât nanjan.”

<sup>16</sup> Sâmbu sâop. “Yawu gârâmâ gâ ari lokge dâirâ orowâk takayet.”

<sup>17</sup> Sâmbu sâop. “Nâmâ lokne bia.”

Yawu sâmbu yuwu sâmb purik pilâwanjiop. <sup>18</sup> “Gâ lok imbât yañje mem pilâhekbi. Yamâ yiwereñje mengekmu mansawot yamâ lokge bulânje bia. Yamâ kombo mansawot. Yakât den yat yuâmâ bonñje.”

<sup>19</sup> Sâmbu sâop. “Maiñ, lok pato. Gâmâ Anitâhât poropete geksan. <sup>20</sup> Yawu gârâmâ ekgohomune nânğâ. Emelâk tâmbâlipnenñaje pumñje yuân yâhâ kinmâ Anitâ mepaeminiwi. Yâhâ Yura lok yeñeâmâ Yerusalem kapiân yâhâ Anitâ mepaemai. Yamâ lohimbije wosanñje bonñje otmai?” Yawu sâmb âikuop.

<sup>21-24</sup> Sâmbu sâop. “Wâe. Imbi, sâmbune nânğâ. Hâmbâi mâne yen Samaria lohimbije pumñje yuân Anitâ ki mepaenomai. Otmu nengu yawuâk Yerusalem kapiân Anitâ ki mepaenom. Anitâmâ nen yuwuya bia. Yâkât topñeâmâ ikjiâk tap. Yâhâmâ pumñje me kapi âlâen ki tatmap.

Yakât otmâmâ sâp yupâek kapi me pumje âlâen me âlâen yâhâ kinmâ Anitâ mepaenom yamâ hâlije bia. Yakât otmâ Anitâ awonnenņaje ikje Wâtġât māmānahât Heak hāngāngumu ge māmāne otningimu awonnenņahâlen biwinenņaje kepeim mepaemunje nāngāmu ârândāņ otbuap. Yen Samaria ambolipņeâmâ Anitâhât topņe ki nāngāmāk imbiāk mepaemai. Yawu gârâmâ Anitâņe hoņ bawaņe âlâ hāngāngumu ge Yura hohetnenņan tetem yen me nen kerek tihitnenņe otbuap yakât sâop. Yakât otmâ nenņeâmâ Anitâhât topņe nāngām henġenġuain.” Yawu sâop.

<sup>25</sup> Sâmu sâop. “Yawu gârâmâ Anitâņe hoņ bawaņe âlâ hāngāngumu ge tihitnenņe otbuap ya emelāk sâņetâ nāngāwan. Gem yan wuân me wuân teteningiwuap ya bunewâk eknongowuap.” Yawu sâop. Hoņ bawa yakât kutņeâmâ Kiristo.

<sup>26</sup> Sâmu sâop. “Hoņ bawa yakât yat yamâ nâ. Anitâņe hāngānnohomu ge mansan.” Yawu sâop. <sup>27</sup> Sâm tan mâne nenņe sot puluhum takam Yesuņe imbi ya orop den alahuowot ya ekmâ pârâk pilâm imbi yaņe wuân den âikuop yakât ki âikum topņe nāngāwin. Me Yesuņe wongât imbi ya orop den alahuowot yakât gurâ yawuâk.

<sup>28</sup> Yawu otmu imbi yaņe âsâpņe pilâm kapiāngen sururuk sâm ariop. Sururuk sâm ari kapi ambolipņe yuwu sâm ekyongop. <sup>29</sup> “Wâe. Lok âlâņe to lâmņe ginņan taka tatmâ biwine ekmâ otman meman ya hârohâk sâm tetem eknohoap. Anitâņe hoņ bawa âlâ hāngāngumu gewuap sâmai yaņe takap mon.” <sup>30</sup> Yawu sâmu nāngām ekne sâm kapi pilâm takawi.

<sup>31</sup> Mâtâwân gem tatņetâ nenņe sot ne sâm Yesu ekuwin.

<sup>32</sup> Ekumunņe sâop. “Tatnihiap ya nem mansan. Yeņe yakât topņe ki naņgai.”

<sup>33</sup> Yawu sâmu alahu gulahu otmâ yuwu sâwin. “Nenņe yu pilâm kapiân yahain yan lok âlâņe sot waņmu niap mon?” Yawu sâm âlâhuwin.

<sup>34</sup> Yawu sâmunņe sâop. “Nâmâ Awoņņaje hāngānnohomu ge tem lâuwangim nepņe tuhum mansan yaņe nâhât sot kâle oap.

<sup>35</sup> Otmu nengât nep topņahât nāngāņetâ keterahâkgât âlâen hâmu sâmune nāngāņet. Emetsenņe imbât pesuk sâmu yan kalamân gâtņe âlemu mem nemain. Yawu gârâmâ lohimbijeâmâ kalamân sot âlem tap yakât dopņeâk biwiyenje hewewen otmâ manman kârikņan arine sâm otmâ tai. Yeņeâmâ lohimbi dondâņe mansai ya yengât nāngām âi meņet. <sup>36-37</sup> Yakât torokatmâ sâmune nāngāņet. Lok nombotņaje nep tuhumai. Yâhâ nombotņajeâmâ âlemu mem konok tuhumai. Yâhâ lok âlâ me âlâņe nâhât nep tuhumai me yakât bonņe menomai ya yâhâp yâhâp heroņe kakņan mannomai. Yâhâ bonņe âlemu mem katņetâ tatbuap yaņeâmâ lohimbije hewewen otmâ Anitâhâlen biwiyenje kepeim manmâ manman kârikņe menomai yakât dopņeâk oap. <sup>38</sup> Otmu emelāk lok nombotņaje nâhât nep tuhuwi ya bonņe âlem kinsaiņe manman kârikņe meņetġât yen hāngānyongomune ari meyekņet.” Yawu sâop.

<sup>39</sup>Otmu Yesuŋe Samaria gâtŋe imbi yakât biwiŋe ekmâ olop miop ya tâŋ tâŋâk sâŋ tetem ekuop yakât kapi ambolipŋe ekyongomu nânġâŋetâ bulâŋe otmu Yesuhâlen takawi. <sup>40</sup>Taka “Nen orowâk torokatmâ manbuat,” yawu sâŋ ekuŋetâ nânġâyîŋgiop. Nânġâyîŋgimu kapiyeŋan yâhâ hilâm yâhâp tatbin. <sup>41</sup>Tatmunŋe den pat âlepŋe ekyongomu lohimbi dondâŋe nânġâŋetâ bulâŋe otmu yâkâlen biwiyeŋaŋe kepeiwi. <sup>42</sup>Biwiyeŋaŋe kepeim imbi ya yuwu sâŋ ekuwi. “Anġoân gâŋe den sârâ nânġâmunnŋe bulâŋe olop. Yâhâ sâp yiwereŋe yuâmâ yâkŋe sâreŋenekmâ manman kârikŋe ningiwe sâŋ ge mansap ya ikŋe lauŋambâ eknongomu nânġâmunnŋe bulâŋanâk oap. Yakât otmâ yâkâlen biwinenŋaŋe kepeiain.” Yawu sâwi.

**Yesuŋe kiap âlâhât nanŋe nânġâwanġgimu âlepŋe olop.**

<sup>43</sup>Yesuŋe hilâm yâhâp tatmâ den ekyongomu pesuk sâŋu orowâk Galilaia hânânġen ariwin. <sup>44</sup>Mâtâwân arim tatmunŋe Yesuŋe Yerusalem kapi ambolipŋe den ekyongomu nânġâŋetâ gemu bet pilâwi yakât yuwu sâŋ eknongop. “Anitâhât poropetelipŋaŋe yeŋe kapi me hep torehenlipyeŋe orowâk tatmâ den kâsikum yîŋġiŋetâ nânġâŋetâ nahat otmap.” Yawu sâop. <sup>45</sup>Galilaia hânân arimunnŋe kapi tatmâ arap ya ambolipŋe emelâk tihit tihit hombaŋ ekne sâŋ Yerusalem kapiân yâhâ Yesuŋe kulem topŋe topŋe mem ikŋe den pat âlepŋe ekyongomu nânġâŋetâ bonŋe olop yaŋe nenekmâ buku otningiwi.

<sup>46</sup>Yawu otningiŋetâ ya pilâm âwurem Yesuŋe anġoân Kana kapiân kulem âlâ memu to ya purik sâŋ wain olop yan ariwin. Arimunnŋe Kapanaum amboŋe, kiap âlâhât nanŋe ya mesek sâtŋan kinop. <sup>47</sup>Mesek sâtŋan kinmu yan âwânŋaŋe Yesuŋe Kana kapiân âwurem taka tap nânġâm kapiŋe pilâm Yesuhâlen taka ekuop. “Nanne mesek sâtŋan tatmâ pilânenekbe sâŋ oap. Yakât otmâ ari heŋġeŋguhât nanŋan.”

<sup>48</sup>Sâŋu sâop. “Bâe, Galilaia ambolipŋaŋe kulem topŋe topŋe memune ekneâk nanġai. Ekŋetâ sâtŋe otmu yanâk nâhâlen biwiyeŋe katmai.”

<sup>49</sup>Sâŋu sâop. “O, lok pato, nanne pilânenekmapġât in yawu ari heŋġeŋguhât nanŋan.” <sup>50</sup>Sâŋu sâop. “Nânġâwanġgiangât âlepŋe hâmeŋe kinbuap. Yakât otmâ gikiâk emetġan âwurem ari.” Yawu sâop ya nânġâŋu bulâŋe otmu âwurem ariop. <sup>51</sup>Mâtâwân arim tatmu hoŋ bawalipŋaŋe nanŋe talop yakembâ taka yuwu sâŋ ekuwi. “Nange yamâ emelâk âlepŋe oap.” <sup>52</sup>Yawu sâŋetâ yuwu sâŋ âiyongop. “Sâp girawuân âlepŋe oap?” Sâŋu sâwi. “Oran hilâm tânâmŋan kundatŋe sânduk sâop,” sâwi. <sup>53</sup>Yawu sâŋetâ kiapŋe yuwu nânġâop. “O, bulâŋanâk. Yesuŋe eknohop sâp yanâk nanne âlepŋe olop.” Yawu nânġâm Yesuhâlen biwiŋe kalop. Yawu otmâ ari hep torehenlipŋe yakât ekyongomu kerekŋe Yesuhâlen biwiyeŋe katbi.

<sup>54</sup>Kândikum Yesuŋe Yuraia hân pilâm Kana kapiân ari kulem memu to ya purik sâŋ wain olop. Yâhâ kulem yâhâpŋe miop yamâ naom tipiŋe ya âlepŋe olop.

**Yesuŋe lok pareŋe mem heŋgeŋgumu geretŋe l auakm  ariop.**

**5** <sup>1</sup>Yak t kakŋan Yura neng t hombarŋ  l  tetemu Anit  mepaene s m lohimbi kiŋgitŋe orow kŋe Yerusalem kapi patoen menduhuakbi. Otmu s p yan Yesuŋe menenekmu Yerusalem kapi n y h win. <sup>2</sup>Yerusalem kapi ya hawangum paŋ s h wi yak t haŋgi  l , kutŋe Lama s m, yak t giŋŋan bomba  l  tap, kutŋe Betesira s m. Otmu bomba yak t giŋŋan selep b tnombot tuhuwi. <sup>3</sup>Otmu selep yan lohimbi tatbi yam  topyeŋe yuwu. Nombotŋe pareŋe otbi, nombotŋe m  k iyeŋe goŋgoŋe, nombotŋe  l m  senyeŋe bok s  s ŋe. <sup>4</sup>Tatbi yaŋe yuwu otminiwi. S p  l en  l en Anit h t aŋelo  l ŋe himbim ngemb  ge bomba k lehen gemu luk luk s miniop. Luk luk s mu yan m  tatbi ya yeŋg len g tŋaŋe aŋgo n toen geminiop yam  wu n me wu n h hiwin ya in yawu biatbaŋgiminiop. Yawu otminiwi.

<sup>5</sup>Otmu tatbi ya yeŋg len g tŋe  l ŋe pareŋe otm  tatm  gamu yambu 38 pesuk s op. <sup>6</sup>Y h m  selep  l en tatm  aŋelo bomba k lehen gemu luk luk s mu gewe s m yak t mambotminiop. Y h  Yesuŋe lok ya s p k lep yawu otm  gamap ya ekm  n ng m  ikuop. “G   lepŋe otbeh t naŋgat me bia?”

<sup>7</sup>S mu s op. “Oŋ, yawu naŋgan yuk . Yawu g r m  to yu luk luk s mu gewe s m ok bititik ki otmune k lok dond ŋe in yawu gemai. Yak t  l ŋe t nnohomu n ŋe s m gemb m.”

<sup>8</sup>S mu s op. “B iŋ g  yahatm  geretge l uakm  lohotŋan ari.” <sup>9</sup>Yawu s mu yan k yahatm  geretŋe l uakm  ariop.

<sup>10</sup>Geretŋe l uakm  arimu lohimbi yan kinbiŋe ekm  n ng m b lewaŋgim yuwu s wi. “In tatm  naŋgain. Yawu g r m  g ŋe geretge l uakd  gekmunŋe ki  r nd ŋ oap. Papatolipnenŋaŋe tatm  n ng main s w n  i tuhunomg t samut katbi yak t otm m  pil .” Yawu s wi.

<sup>11</sup>S ŋet  s op. “Yiwereŋe lok  l  heŋgemnohoapŋe yuwu yap. “Yahatm  geretge l uakm  ari.” Yawu s mu  lepŋe otm  yaŋah m  yu oan.”

<sup>12</sup>S mu s wi. “Lok heŋgeŋgohoap ya kutŋe kund  n ng ne.” Yawu s wi. <sup>13</sup>Y h  Yesuŋe emel k yok pil m lohimbi dond  kinbi ya hohetyeŋamb  gem ba ariop. Yak t otm m  lok yaŋe Yesu ekm  tiripyongowe s m senŋe senŋe otm  y h m giop yam  ki ehop.

<sup>14</sup>Otmu yap  pil m ge opon k mbukŋan y h  Yesu mem teteop. Mem tetemu Yesuŋe yuwu s m ekuop. “Naŋgat. N ŋe heŋgeŋgohoan. Yak t otm  y h pŋe otm  hilipguwuat yam  hiliwahowuat.”

<sup>15</sup>Yawu s mu lok yaŋe Yura papatolipnenŋe yeŋg len ari “Yesuŋe heŋgemnohoap” s m ekyongop. <sup>16</sup>Y h  Yesuŋe tatm  n ng miniwin s pŋan lok ya heŋgeŋguop. Yak t otm m  Yura papatolipnenŋaŋe Yesu mem ge katne s m den hikuwi.

**Yesuhâlen biwinenŋaŋe kepeim manman bulâŋe menom.**

<sup>17</sup>Den hikunetâ benŋe Yesuŋe yuwu sâm ekyongop. “Awoŋnaŋe hilâm ârândân âi memap. Yakât otmâ nâku yawuâk âi membomgât sâm nihiop.” Yawu sâop. <sup>18</sup>Yâhâ tatmâ nânŋâ nânŋâ sâpŋan lok ya heŋŋenŋuop yakât nânŋâŋetâ bâleop. Yawu otmâ Yesuŋe Anitâhât “Awoŋne” sâmu yakât otmâ Yura papatolipnenŋaŋe yuwu nânŋâwi. “Yâhâmâ Anitâ orop dopnetŋe konohâk oap sâm ikŋahât nânŋâmu yahatsap,” yawu sâm yakât kune sâm otbi.

<sup>19-20</sup>Yawu otŋetâ Yesuŋe yuwu sâm ekyongop. “Nine topne ekyongomune nânŋâŋet. Nâŋe nine enŋatneâk âi ki meman. Âi meman yamâ awoŋnaŋe wawaenemâ tiripnohomu ikŋahâk âi memap yawuâk nâ gurâ meman. Yakât otmâ hâmbâi âi âlâ tiripnohom mâmâŋe otnihimu memune ekŋetâ âlâ kândâkdâ otbuap. <sup>21</sup>Awoŋnaŋe lok âlâ me âlâhât manmanyenŋe torokatbuapgât dop tap. Otmu nâku yawuâk manman kârikŋe yinŋiwomgât dop tap. <sup>22</sup>Otmu lohimbienŋe otŋetâ bâlem gamap ya awoŋnaŋe bâiŋe ki sâm hâreyinŋiwuap. Âi ya nânŋak bâiŋe sâm hâreyinŋiwomgât sâm nihiop. <sup>23</sup>Yâhâ lohimbienŋe Awoŋne ewe katmai yakât dopneâk nâ gurâ ewe katnekŋet sâm âi ya nihiop. Yawu gârâmâ lok âlâ me âlâŋe betnihimai yaŋe nâ betnihaiin sâm Awoŋne hânŋânnohomu gewan ya betbaŋgimai. <sup>24</sup>Lok âlâ me âlâŋe nâhât den pat âlepŋe nânŋâŋetâ bulâŋe otmu biwiyeŋe awoŋnahâlen katmâ denŋe lâum mannomai ya awoŋnaŋe emelâk manman kârikŋahât pat kuyinŋiop. Yakât otmâ manman kârikŋahât mâtâwân manŋetâ den âiân ki katyekbuap.

<sup>25</sup>Den âlâ yuwu ekyongomune nânŋâŋet. Awoŋne Anitâŋe hânŋânnohomu ge nine den pat âlepŋe ekyongom mansan. Ekyongomune lohimbibi pâlâmŋe mansai ya yenŋâlen gâtŋe nombotŋaŋe nânŋâŋetâ bulâŋe otmu nâhâlen biwiyeŋaŋe kepeim mannomai yaŋeâmâ manman kârikŋahât bulâŋe menomai. <sup>26</sup>Yakât topneâmâ yuwu. Awoŋne yamâ manman amboŋe. Yawu gârâmâ manman yakât galemŋe sâm nihimu yan dopnetŋe konok oap. <sup>27</sup>Otmu hânŋânnohomu ge lohimbienŋe otbi mewi yakât bâiŋe sâm hâreyinŋiwomgât sâm nihiop. <sup>28</sup>Yakât otmâ sâp patoen lohimbibi muwi yamâ kerek mândeyekmune mumuŋambâ yahatmâ otbi mewi yakât matŋe menomai. <sup>29</sup>Yâhâ lohimbibi nombotŋaŋe Anitâ betbaŋgim otŋetâ bâlem gaop yamâ den âiân katyekmune yakât matŋe umatŋe menomai. Yâhâ nombotŋaŋe Anitâhât tem lâuwangim âlepŋe manbi yaŋeâmâ manman kârikŋe mannomai. <sup>30</sup>Nine enŋatneâk âi ki tuhuman. Anitâŋe biwinan katmu tem lâuwangim den sâm hâreyinŋiman yamâ nânŋâmu ârândân otmap.

**Yesuŋe kulem âlâlâ miop yan ikŋe topŋe tetem heŋŋenŋuop.**

<sup>31</sup>Topne teteâkgât ninak sâman mâne nânŋâŋetâ nahat otbâp. <sup>32</sup>Awoŋne manman amboŋaŋe nâhât topne ekmâ nânŋâŋetgât kulem mem gamap

yamâ nânġawangimune bulâġanâk otmap. <sup>33</sup> Anġoân hoġ bawalipyenġe hânġânyongonġetâ Yoanehâlen arinġetâ nâhât topne bulâġanâk ekyongop. <sup>34</sup> Yâhâ Yoane me lok âlânġe nâhât topne ki sâġ tetewi mâne mâtâp âlâ tetenihimbâpġât dop otbâp. Yawu ġârâmâ yâkġe nâhât topne ekyongop ya yiwerenġe nânġânġetâ bulânġe otmu manman kârikġan manġetġât yan. <sup>35</sup> Yoanehât nânġânġetâ keterahâkġât âlâen hâum sâġmune nânġânġet. Yâkġeâmâ balamġât dop olop. Balam sem laġinġe pilâmu ekmain yakât dopġeâk yâkġe den ekyongomu biwiyenġan hâumu haġ sâyingiop. Haġ sâyingimu anġoân hewewenġâk nânġâwi. Yawu ġârâmâ sâp kâlep ki otmuâk betbaġiwi. <sup>36</sup> Nâhât topne yamâ yâkġe bulâġanâk ekyongop. Yawu ġârâmâ awoġnaġe âi sâġ nihim hânġânnohomu kulem topġe topġe memune yan nâhât topne tâġ tâġâk tetemu ekmai. <sup>37</sup> Yawu ġârâmâ awoġne ki ekâm denġeâk nânġâm gamai. <sup>38</sup> Otmu yâkâlen biwiyenġe ġurâ ki kepeim manmai. Yakât otmâ awoġnaġe poropeteliġne ekyongomu kulemġuwi ya nânġânġetâ ki keterakiġimap. Otmu nâhât ġurâ nânġânġetâ nahat otmu yawuâk nâhâlen biwiyenġe ki kepeimai. <sup>39</sup> Yeġeâmâ manman kârikġe mene sâġ poropeteliġne den kulemġuwi ya haonġmâ ârândânġ sâlikum ekâm tatmai. Yawu ġârâmâ yenġe nâhât topne ekġetâ keterahâkġât den yu poropeteliġnaġe kulemġuwi. Yu sâlikum henġenġumai mâne âlepġe nâhât topne nânġâm henġenġumbâi. <sup>40</sup> Yamâ yenġe manman kârikġe mene sâġ yan nâhât hâkânġ otmâ biwiyenġe nâhâlen ki katmai.

<sup>41</sup> Yawu ġârâmâ lok âlâ me âlânġe nâhât nânġânġetâ yahalâkġât ki gewan. <sup>42</sup> Yawu ġârâmâ biwiyenġe Anitâhâlen ki ari kinmap ya emelâk nanġan. <sup>43</sup> Yakât otmâ awoġnaġe âi sâġ nihim hânġânnohomu gewan yakât nânġânġetâ ki bulânġe otmu betnihim mansai. Yawu ġârâmâ lok âlâ me âlânġe enġatyenġeâk otmâ yenġâlen taka den ekyongomai lok yawuya yenġât nânġânġetâ yahatmu buku otyiġimai. <sup>44</sup> Yenġe yenġahâlâk nanġanġinġetâ yahatmap. Yawu ġârâmâ Anitâ ikġjak yekmu ârândânġ olâkġât ki nânġâm. Ya otmai yakât nânġânġetâ porap otmap. ġârâmâ nâhât den pat yamâ ġirawu nânġânġetâ bulânġe otbuap? <sup>45-47</sup> Yeġeâmâ nâhât den nânġânġetâ ġemu bet pilâm nâhâlen biwiyenġe ki katmai. Yamâ nânġe awoġnahât senġan kinmâ den âiân ki katyebom. Yakât yuwu sâġmune nânġânġet. Moseġe Anitâhât ġirem den kulemġuop yamâ “lâum manmunġe Anitânġe tihitnenġe otbuap.” yawu sâmai. Yawu ġârâmâ nâhât topne nânġânġetâ keterahâkġât Moseġe den ya kulemġuop. Yakât otmâmâ Moseġe den kulemġuop ya yenġe nânġânġetâ bulânġe otmap mâne emelâk biwiyenġe nâhâlen katbâi. Yawu ġârâmâ den ya nânġânġetâ porap otmap. ġârâmâ nâhât den pat yamâ ġirawu nânġânġetâ bulânġe otbuap?” Yawu sâġ ekyongomu pilâyekmâ opon kâmbukġambâ ġem ariwin.

**Lok 5,000 ya Yesuġe sot kâsikum yiġgimu newi.**  
*(Mataio 14:13-21; Mareko 6:30-44; Luka 9:10-17)*

**6** <sup>1</sup> Otmu yakât kakġan Galilaia denġân, kutġe âlâmâ Tiweria denġân, Yesuġe yakât nombotġen ariwe sâġ hoġ bawalipiġne menenekmu



orowâk ariwin. <sup>2</sup>Yâhâ emelâk Yesuŋe mesek topŋe topŋe heŋgemyongop ya ekbi yakât otmâ arimunŋe lohimbi kiŋgitŋe orowâkŋe betnenŋan watnenekbi. <sup>3</sup>Watnenekŋetâ ari lohimbi ya pilâyekmâ Yesu orop pumŋe âlâen yâhâ tatbin. <sup>4</sup>Tatmâ Tihit tihit hombaŋ ya tâlâhuop yakât alahuwin.

<sup>5</sup>Alahum tatmunŋe lohimbi dondâŋe watnenekmâ takawi ya Yesuŋe yekmâ yuwu sâm Pilip âikuop. “Lohimbi dondâ takai yu wosapâ sot puluhum yingimunŋe neŋetâ dopyeŋan otbuap?” sâm âikuop. <sup>6</sup>Yâhâ sot kâsikum yingimu neŋetâ dopyeŋan otbuap ya nâŋgâop. Yawu gârâmâ Pilipgât biwiŋe girawu talop ya sâm tetemu nâŋgânehât Pilip âikumu yuwu sâop. <sup>7</sup>“Âo, lohimbi dondâŋe taka tai. Yakât otmâ sot tipiŋe ikŋak ikŋiâk nenomai yamâ tewetsenŋe pato pilâm sot puluhunom. Lok âlâŋe emetsenŋe nombolân yâhâp biwiŋan âi tuhum hâmeŋe membuap yakât dop otbuap. Yakât otmâ gâŋe den yat yu lauhan menomgât dop bia.”

<sup>8</sup>Yawu sâmu nengâlen gâtŋe âlâ, Simon Petoro imiŋe, kutŋe Anderea sâm, yâkŋe yuwu sâm ekuop. <sup>9</sup>“Naom tipiŋe âlâ taka tapŋe baŋga mome otmu iŋan yâhâp mem tap. Yawu gârâmâ girawu otne? Sot yuŋe dopyeŋan ki otbuap yukâ.” Yawu sâop.

<sup>10</sup>Yawu sâmu Yesuŋe yuwu sâm eknongop. “Yeŋe lohimbi yu ekyongonŋetâ ge tatŋet.” Yawu sâmu lauŋan mem lok yengât dowâmâ 5,000 yawuya ekyongomunŋe ge tatbi. <sup>11</sup>Ge tatŋetâ Yesuŋe baŋga ya mem Anitâ mepaem motokmâ tipi tapi tuhum mem ningimu ârândâŋâk kâsikum yingimunŋe newi. Yâhâ iŋan gurâ yawuâk mem ningimu kâsikum yingimunŋe neŋetâ dopyeŋan olop. <sup>12</sup>Neŋetâ dopyeŋan otmu yuwu sâm eknongop. “Sot nombotŋe tap ya bâlemapgât hâwurum saka sakaen mânunŋetâ giâk.” <sup>13</sup>Yawu sâmu hâwurum mânunŋmunŋe saka saka kâiân yâhâp pik sâop.

<sup>14</sup>Yesuŋe kulem ya mem ekŋetâ sâtŋe otmu yuwu sâm alahu gulahu otbi. “Poropete âlâ hohetnenŋan tetewuap sâŋetâ nâŋgâm mambotmain ya yu mon?” Yawu sâwi. <sup>15</sup>Yawu sâŋetâ Yesuŋe biwiyenŋe ekmâ yâkŋe kutdâyeŋe mem kânâŋgânekmaihât nâŋgâm pilâyekmâ gem ba pumŋe âlâen yâhâop.

### Yesuŋe to kakŋambâ takaop.

(*Mataio 14:22-33; Mareko 6:45-52*)

<sup>16-17</sup>Emet omoŋ otmu Yesuŋe in yawu ki âwurem takaopgât nenŋe yapâ pilâm Kapanaum kapiân arine sâm dengân ginŋan gewin. <sup>18</sup>Ge wanŋa mem arim tatmunŋe siru pato pilâmu to dondâ bâleop. <sup>19</sup>Yawu otmu puli kum tânâmgum arim tatmunŋe kilomita bâtnombot me nombolân konok dop yawu olop. Yawu otmu arimunŋe Yesuŋe to kakŋambâ takaop. Takamu ekmâ “wuânŋe takap?” sâm ekmâ umutnenŋe ariop. <sup>20</sup>Umutnenŋe arimu Yesuŋe nenekmâ yuwu sâop. “Nâ ninak takan. Yawu



gârâmâ kingityenjahât ki otjet.” Yawu sâop. <sup>21</sup>Yawu sâmu tepnenje welâmnan gemu in yawu memunje wanjaen yâhâop. Wanjaen yâhâmu nenje in yawu ari kapi ya mewin.

<sup>22</sup>Kapi pilâm tohowin yakât ambolipnaje emet hanj sâmu Yesuhât pâinmâ yuwu sâwi. “Oran wanja konohâk ekbin yamâ Yesu hoj bawalipnaje yejiâk mem ariwi.”

<sup>23</sup>Yawu sâm pâinbi. Otmu Tiweria kapi ambolipnaje Yesuhât pat nângâm wanja âlâlâ mem kapiyenehembâ taka emelâk Kutdânenenaje sot mem yan Anitâ mepaem yingimu newi yanâk taka tatbi. <sup>24</sup>Taka Yesuhât pâinjetâ biatmu yanjak wanja ya yâhâpne mem Kapanaum kapiân ari pâinbi.

### **Manman kârikjahât sot yakât amboje yamâ Yesu.**

<sup>25</sup>Wanjayene Kapanaum kapiân karakmâ ge Yesu mem tetem yuwu sâm âikuwi. “Wa, lok pato gâ amâti takaon.”

<sup>26</sup>Yawu sâm âikujetâ yuwu sâm ekyongop. “Yaihât sâmune nângâjet. Nâje kulem topne topne memune ekmâ topne ki nângâm hejengegumai. Yâhâ sot yingimune nejetâ tepyeje pik sâop yakât nângâm pâinnekmâ takai. <sup>27</sup>Yakât yuwu sâmune nângâjet. Sot nemain yaje kâlep ki tatmâ yâhâwuap. Yamâ tatmâ getek nâsukne pilâmap. Yakât otmâ sot nemain yakâlâk ki nângânimai. Yawu gârâmâ sot topne âlâ iknjiâk tap ya nem manman kârikne manmâ yâhânimai yakâlâk nângânimai. Yawu gârâmâ Awojne Anitâje nângânihimu ârândânj otmu âi sâm nihim hângânnohomu ge yâkât sâtgât manman kârikjahât sot yingiwom.” Yawu sâop.

<sup>28</sup>Yawu sâmu yuwu sâm âikuwi. “Anitâhât den lâune sâm girawu tuhunomgât nanjat?”

<sup>29</sup>Sâjetâ sâop. “Anitâje nâ hângânnohomu gewan. Yakât otmâ nâhâlen biwiyeje katmâ mannomaihât nanjat.”

<sup>30-31</sup>Sâmu sâwi. “Emelâk tâmbâlipnenje lok ki manmaiângen manjetâ Anitâje hibimâmbâ sot âlâ, kutne mana sâm, yingimu nem manbi yakât topne miti pepaen yuwu tap. “Hibimâmbâ sot yingimu nem manbi.” Yawu tap. Yawu gârâmâ gâje kulem âlâ mendâ ekmunje âlâ kândâkdâ otmu den yat yu nângâmunje bulâje otbuap. Wuân mendâ topge tetemu ekmunje bulâje otbuap?” Yawu sâwi.

<sup>32</sup>Sâjetâ sâop. “Anitâje hibimâmbâ sot bulâje yingimap yakât topne nângâjetâ keterahâkgât yuwu sâmune nângâjet. Moseje hibimâmbâ sot bulâje ya ki mem tetem yingiop. Bia. Hibimâmbâ sot bulâje yamâ yiwereje Awojne yingimu mansai. <sup>33</sup>Sot bulâje yamâ Anitâje nâ hângânnohomu hibimâmbâ ge manman kârikne yingim mansan.”

<sup>34</sup>Sâmu sâwi. “Bâe. Lok pato, gâ den yat, yuâmâ sot ya haonjâ ârândânj ningirâ nem yâhânom.”

<sup>35</sup> Sâñetâ sâop. “Manman kârikjahât sot yan yuâmâ ninahât yan. Yakât otmâ lok âlâ me âlâñe biwi nângân nângânyenaje nâ kepeinekmâ mannomai. Yâhâmâ nâñe mâmâñe otyingimune manman kârikjahât sot yakât yâhâpñe ki po yingiwuap. Me manman kârikjahât to yakât yâhâpñe ki yekbuap.

<sup>36</sup> Yawu gârâmâ kulem topñe topñe memune yeñe ekmâ topñahât hâum pâpgum nâhâlen biwiyenaje ki kepeim mansai. <sup>37</sup> Yawu gârâmâ lohimbi âlâ me âlâñe nâhâlen biwiyenaje kepeim manñetgât Awoññaje meyekmu mansai. Meyekmu nâhâlen torokatmâ biwiyenaje kepeinetâ ki betyongowom. <sup>38-40</sup> Awoññaje âi sâm nihim himbimâmbâ hângânnohomu gewan. Gem yâkât tem lâum manmune lohimbi âlâ me âlâñe nekmâ topne nângâm heñgengum nâhâlen biwiyenaje kepeimai. Lohimbi yawu otmai yamâ nâñe sâp patoen mumuñambâ mem yahatyekmune manman kârikjahât pat emelâk Anitâñe kuyingimu tap yakât bulâñe yingimu menomai.” Yawu sâop.

<sup>41</sup> Yawu gârâmâ “sot bulâñe yamâ Anitâñe nâ hângânnohomu himbimâmbâ ge manman kârikñe yingim mansan,” ya sâop yakât papatolipnenñaje nângâñetâ bâlemu yuwu sâm alahu gulahu otbi. <sup>42</sup> “Nenâmâ yâkât topñe nanñain. Yâhâmâ Yosep nanñe yakâ. Âwâñe mâmâñe yetgât topyetñe nanñain. Gârâmâ wongât “Nâ himbimâmbâ gem mansan,” yap? Yakât nângâmunñe bâleap.” Yawu sâwi.

<sup>43</sup> Sâñetâ sâop. “Kâmbukñe. Nângâm bâlenihinetâ ki ârândâñ oap. <sup>44</sup> Awoññaje hângânnohomu gewan. Yakât otmâ lohimbi âlâ me âlâ meyekbuap yâkñak nâhâlen torokatnomai. Nâhâlen torokatmâ mannomai yamâ sâp patoen nâñe mumuñambâ mem yahatyekmune nâ orowâk tatmâ yâhânom. <sup>45</sup> Emelâk emet inânñan poropete âlâñe den kulemguop ya yuwu tap. “Anitâ ikñak denñe lohimbi biwiyenjan katmu nângâñetâ keterakbuap.” Yawu kulemguop. Den yakât bonñe teteâkgât awoññaje denñe lohimbi biwiyenjan katmu nângâñetâ hâumu nâhâlen torokatmai. <sup>46</sup> Yawu gârâmâ lohimbi âlâ me âlâñe Awoññahâlen ki yâhâñetâ den kâsikum yingimap. Yawu ki tap. Nâñe konok Anitâ Awoññe orop tatmâ yâkât sâtgât otmâ gewan.

<sup>47</sup> Yakât otmâ yuwu sâmunne nângâñet. Lohimbi âlâ me âlâñe nâhâlen biwiyenaje kepeim manmai yamâ manman kârikñan mannomaihat pat kuyingimune tap. <sup>48</sup> Yâhâmâ manman kârikjahât sot yingimune nem manmâ yâhânomai. <sup>49</sup> Manman kârikjahât sot yakât yâhâpñe torokatmâ sâwe. Tâmbâlipnenñaje lok ki manmaiângen manminiwi yan Anitâñe himbimâmbâ sot âlâ, kutñe mana sâm, ya yingimu nem gawi. Otmu ya gurâ emelâk mum metewi. <sup>50</sup> Gârâmâ himbimâmbâ manman kârikjahât sot yamâ nâ. Yakât otmâ lohimbi âlâ me âlâñe nine hepne sunumne nemeiñeâmâ ki hiliwahonomai. <sup>51</sup> Yâhâ manman kârikjahât bulâñe teteyingîâkgât nâñe konok himbimâmbâ ge nine hepne sunumne

yu yengât pat kuyingiwani yu yingimune nem manman kârikjan mannomai.” Yawu sâop.

<sup>52</sup> Yawu sâmu Yura nengât papatolipnenjanen nângâm alahu gulahu otmâ yuwu sâwi. “Lok yuñeâmâ ki orotje yap. Girawu otmâmâ ikje sunumje ya gahaeakmâ ningimu nenomgât yap? Ki orotje yukâ.” Yawu sâwi.

<sup>53</sup> Yawu sâmu alahujetâ Yesuje yuwu sâmu ekyongop. “Ninahât sâmune nângâjetâ ki keterakyingiap yakât âlâku sâmune nângâjet. Nâmâ lok bulâje mansan. Yakât otmâ nine hepne sunumne yu ki nenomai yamâ manman kârikjan ki mannomai. <sup>54-56</sup> Yawu gârâmâ nine hepne sunumne yuñeâmâ manman kârikje yakât bulâje oap. Yakât otmâmâ lohimbî âlâ me âlâje nine hepne sunumne nem mannomai yamâ sâp patoen mumunambâ mem yahatyekmune biwinenje kepeiakmâ konohâk otmâ orowâk manmâ yâhânom. <sup>57</sup> Awojne manman ambojanen hângânnohomu gewan. Yakât otmâ yâkât wâtjanâk kinmâ yâkje tatmap yakât dopjeâk nâ gurâ mansan. Yâhâ yengâlen gâtje âlâ me âlâje nine hepne sunumne yu nemai yen gurâ nâje manmâ yâhâwom yakât dopjeâk manmâ yâhânomai. <sup>58</sup> Yawu gârâmâ emelâk tâmbâlipnenjanen sot âlâ, kutje mana sâmu, newi yan manman kârikje ki ekbi. Yawu otmâ mum gawi. Yâhâ sâp yiwereje yuâmâ nine hepne sunumne nenomai yamâ manman kârikjan manmâ yâhânomai.” Yawu sâop. <sup>59</sup> Yesuje Kapanaum yengât miti emetjan yâhâ den yu ekyongop.

### **Yesuje manman kârikje yakât topje ekyongop.**

<sup>60</sup> Yesuje nengât papatolipnenjen yawu sâmu ekyongomu yan lohimbije denje nângâne sâmu yâkâlen torokatmâ manbi nombotjanen alahu gulahu otmâ yuwu sâwi. “Den yap yuâmâ nângâmunjen umatje oap yakât otmâ yâkât den yu âlâje nângâwuap?” Yawu sâwi.

<sup>61</sup> Yawu sâmu hâkâj otjetâ Yesuje biwiyenjen ekmâ yuwu sâop. “Den yan yukât âlâje ki ekyongop? Girawuhât otmâ nângâjetâ umatje oap? <sup>62</sup> Gârâmâ nâje hâmbâi himbimân âwurem yâhâmune nekmâ yanâmâ girawu nângânomai? Nângâjetâ bulâje otmu nâhâlen biwiyenjen katnomai me bia? <sup>63</sup> Yakât otmâ yuwu sâmune nângâjet. Lohimbî âlâ me âlâje yene engatyenjanak otmâ manman kârikjan mannomaihât dop âlâ ki tap. Yakât otmâ Anitâhât Wâtgât mâmânjahât Heak yâkjak mâmâje otyingimu manman kârikjan mannomaihât dop tap. Yakât otmâmâ den yan yu nângâjetâ bulâje otmu Wâtgât mâmânjahât Heakje mâmâje otyingimu biwiyenjen nâhâlen katmâ manman kârikje mannomai. <sup>64</sup> Yawu gârâmâ yengâlen gâtje nombotjane ki nângâjetâ bulâje otmap.” Yawu sâop. Yâhâ lohimbî nombotjanen biwiyenjen Yesuhâlen ki katbi yâhâmâ emelâk topyenen nângâop. Yâhâ lok âlâje Yesuhât betjehen kionbuap ya gurâ yawuâk emelâk topjen nângâop. <sup>65</sup> Yakât nângâm yuwu torokatmâ

ekyongop. “Emelâk ekyongoan ya âlâkuâk sâmunen nângânet. Awoŋnaŋe lohimbi âlâ me âlâ mem hewewenjuhuyekbuap yâkŋjak nâhâlen torokatnomai.” Yawu sâop.

<sup>66</sup>Yawu sâopgât lohimbi nombotŋaŋe nângânetâ umatŋe otmu pilâm âlâengen ariwi. <sup>67</sup>Ariŋetâ Yesuŋe hoŋ bawalipŋe kâiân yâhâp yuwu sâm eknongop. “Yen gurâ yawuâk pilânekmâ arine sâm oai me bia?”

<sup>68-69</sup>Sâmu Petoroŋe sâop. “Kutdâ, gâŋe konok Anitâhât nanŋe bulâŋe manmâ manman kârikŋahât topŋe eknongorâ nângâmunŋe bulâŋe otmap. Gâhât topge emelâk nângâwin yakât otmâ pilâhekmâ lok âlâhâlen ari denŋe lâum manman kârikŋan mannongât dop âlâ ki tap.” Yawu sâop.

<sup>70</sup>Yawu sâmu yuwu sâm eknongop. “Bulâŋanâk nâŋe konok meyekban. Yawu gârâmâ weke bâleŋe ya yengât amboyeŋe kutŋe Satan sâm yâkŋe yengâlen gâtŋe âlâhât biwiŋan kioŋmu yâkât tem lâum mansap.” Yawu sâop. <sup>71</sup>Yâhâ Yesuŋe den sâop yaŋe bukunenŋe Yurasi, Simon nanŋe, yamâ Karioto kapi amboŋe ya miop. Yâkŋe gâmâlâk Yesuhât betŋehen kioŋbuap yakât.

#### Anitâhât sâtgât otmâ Yesuŋe den kâsikum yingiminiop.

**7** <sup>1</sup>Otmu yakât kakŋan Yura nengât papatolipnenŋaŋe Yesu kune sâm otbi. Yawu otŋetâ yaŋak Yuraia hân panmâ kapi tipi tapi Galilaia hânân tatmâ arap ya yengâlen ari den kâsikum yingim manop. <sup>2</sup>Yan ari manmu tâmbâlipnenŋaŋe selep tuhuminiwi yakât hombaŋ ya tâlâhuop.

<sup>3-5</sup>Otmu Yesu imilipŋaŋe denŋe nângânetâ nahat otmu yuwu sâm ekuwi. “Selep tuhuminiwi yakât hombaŋ tâlâhuop. Yakât otmâ lohimbi kiŋgitŋe orowâkŋe Yerusalem kapi patoen menduhuakmâ heronŋe otnomai. Gâŋe yan kulem mendâ lohimbiŋe eknomaihât kapi yu pilâm Yuraia hânân ari. Yan ari lohimbi nombotŋaŋe gâhât den nângâne sâm otmâ mansai ya senyeŋan kulem âlâlâ mendâ ekmâ gâhât den pat sâm haok tuhunomai. Lohimbi kerekŋe gâhât nângânetâ yahalâkgât gâ tetekŋan kinmâ kulem mendâ eknomaihât nanŋain. Gârâmâ kapi tipi tapi yuânâk manbuat yamâ girawu otmâ kutge pato otbuap?” Yawu sâwi.

<sup>6-8</sup>Sâŋetâ yuwu sâm ekyongop. “Yeŋe engatyenaŋak otmâ yu me ya âlepŋe otmai. Yakât otmâ Yerusalem kapi patoen yâhâ hombaŋ ekne sâm âlepŋe ekmâ heronŋe otnomai. Heronŋe otŋetâ yanâmâ nengât papatolipnenŋaŋe yekmâ ki kuk otyinginomai. Yâhâ nâmâ engatneâk ki otman. Awoŋnaŋe sâm nihiop ya watmâ otman. Yakât otmâ lohimbiŋe orotmemeyeŋe bâleŋe otmai yakât kuk otnihimai. Yawu gârâmâ nine topne tetemu eknomaihât sâp ki tâlâhuop. Yakât otmâmâ ki yâhâwom. Gârâmâ yeŋeâmâ âlepŋe hombaŋ ari ekŋet.” Yawu sâop. <sup>9</sup>Yawu sâmu imilipŋaŋe pilâm yeŋiâk ba ariwi.

<sup>10</sup>Pilâm ariŋetâ Yesuŋe hoŋ bawalipŋe menenekmu belângen watyekmâ yâhâwin. <sup>11</sup>Yâhâmunŋe lohimbiŋe menduhuakmâ sot um nem

heroŋe otbi yan Yura nengât papatolipnennaŋe Yesuhât pâinbi. Pâinmâ “Yesu wosapâ tap?” sâŋm âiyongom yâhâm gewi. <sup>12-13</sup>Âiyongom yâhâm geŋetâ lohimbi dondâŋe kiŋgityeŋahât otmâ Yesuhât den lohotŋan alahu gulahu otbi. Alahum hioŋakmâ nombotŋaŋe yuwu sâwi. “Yesuŋe âilongo tânngom mansap,” sâwi. Yâhâ nombotŋaŋeâmâ sâwi. “Bia. Yâkŋeâmâ lohimbi kâiyongomu mâŋâp tâpikgum otmâ hilipgumai,” sâwi.

<sup>14</sup>Otmu hombaŋ ya tânângumu Yesuŋe opon kâmbukŋan yâhâ lohimbi kinbi ya den kâsikum yingioŋ. <sup>15</sup>Den kâsikum yingimu papatolipnennaŋe ekmâ pâràk pilâm yuwu sâwi. “Yâhâmâ ekap emetŋan ki yâhâop. Yawu gârâmâ miti yap yuâmâ girawu nâŋgâmapgât yap?” Yawu sâwi.

<sup>16</sup>Yawu sâŋetâ Yesuŋe yuwu sâŋm ekyongop. “Den yan yuâmâ nine den bia. Anitâŋe hâŋgânnohomu ge yâkât sâtgât otmâ denŋe ekyongoan. <sup>17</sup>Yakât otmâ nine eŋgatnaŋak ki otman ya lohimbi âlâ me âlâŋe Anitâhât tem lâumaiŋeâmâ nâŋgâm heŋgeŋgumai. <sup>18</sup>Lok âlâ me âlâŋe yeŋahâk den ekyongomai yaŋeâmâ lohimbiŋe nâŋgâyingŋetâ yahalâkgât den ekyongomai. Yâhâ nâmâ Anitâ orop biwinetŋe konohâk otmu âi sâŋm nihim hâŋgânnohop. Hâŋgânnohomu gewan yâkâlâk nâŋgâŋetâ yahalâk nâŋgâm uwawaŋŋe bia tuhum manmâ den imbiâk ki sâman. <sup>19</sup>Yawu gârâmâ yeŋe gurâ Moseŋe girem den kulemguop ya kerek ki lâumai. Yakât otmâ topŋe girawuhât otmâmâ nâ nohone sâŋm oai?” Yawu sâop.

<sup>20</sup>Yawu sâŋm ekyongomu lohimbi kinbiŋe yuwu sâwi. “Maiŋ, wonânŋe gohone sâŋm oai? Gâmâ weke bâleŋaŋe mângâehekmu biwihe hâlîm milim otmu yat.”

<sup>21</sup>Sâŋetâ sâop. “Nâmâ tatmâ nâŋgâ nâŋgâ sâŋŋan lok pareŋe âlâ heŋgeŋguwan. Heŋgeŋgumune kulem ya ekŋetâ sâtŋe olop yakât nâŋgâŋetâ bâleap. <sup>22-23</sup>Nâŋe otmune ki bâleop. Yakât yuwu sâŋmune nâŋgâm heŋgeŋguŋet. Tâmbâlipnennaŋe hâkyeŋahât torehennaŋ undip tuhuwaŋgiminiwi ya yeŋe torokatmâ otmâ yâhânomaiahât Moseŋe girem den kulemguop. Yakât otmâmâ girem den lâuin sâmai yamâ tatmâ nâŋgâ nâŋgâ sâŋŋan nanlipyeŋe ihilâk hâkyeŋahât torehennaŋ undip tuhuyingimai. Yawu gârâmâ nâŋe gurâ tatmâ nâŋgâ nâŋgâ sâŋŋan lok pareŋe heŋgeŋguwan yakât topŋe girawuhât nâŋgâŋetâ bâleap. <sup>24</sup>Lok âlâ me âlâŋe otmai memai ya yeŋeâmâ kakŋeâk kakŋeâk ekmâ yakât sâmai. Wongât otmai memai ya ki ekmâ nâŋgâm heŋgeŋgum sâmai. Yakât nâŋgâmune ki ârândâŋ oap.” Yawu sâop.

### **Kapi ambolipŋaŋe Yesuhât nâŋgâm biwi yâhâp otbi.**

<sup>25</sup>Yawu sâmu Yerusalem kapi ambolipŋe nombotŋaŋe yuwu sâwi. “Lok yuâmâ papatolipnennaŋe kune sâŋm oai. <sup>26</sup>Lok yuâmâ tetekŋanâk kinmâ den kâsikum yingim mansap. Yakât otmâmâ wongât papatolipnennaŋe ki kuwaŋgim mansai? Anitâŋe hâŋgâŋgumu giop yawu nâŋgâm yakât ki kuwaŋgimai mon? <sup>27</sup>Yâhâ Anitâŋe hâŋgâŋgumu gewuap yâkât hep

torehenlipnje ki nângânom. Otmu topnje yamâ hâum pâpgunom. Yâhâ Yesuhât hep torehenlipnje yengât hârok nângâyinjai. Yakât otmâ Anitânje ki hângângumu giop yawu oap.” Yawu sâwi.

<sup>28</sup> Yawu sânetâ Yesuje opon kâmbuknan yâhâ den kâsikum yingim yuwu sâm ekyongop. “Bulânanâk yeje hep torehenlipne yengât nangai. Yamâ benje nâhât topne nângâm hâum pâpguai. Nâmâ nine engatneâk otmâ ki gewan. Manman bulânahât ambonaje hângânnohomu gewan. Yamâ benje yâkât topneâmâ yeje ki nangai. <sup>29</sup>Nâmâ yâkje hângânnohomu gewan yakât otmâ yâkât topnje nângâm hejgenjuan.” Yawu sâop.

<sup>30</sup> Yawu sâmu papatolipnenaje nângânetâ bâlemu mem pâi emetjan katne sâm otbi. Yawu gârâmâ mumbuapgât sâp kalop ya ki tâlâhuop yakât membâihât dop ki olop. Yakât otmâ pilâwi. <sup>31</sup> Yawu gârâmâ lohimbî nombotnje denje nângânetâ bulâje otmu alahu gulahu otmâ yuwu sâwi. “Yesuje kulem topnje topnje mem gap ya Anitâhât hoj bawaje âlâ hângângumu ge tihitnenje otbuap sâmai yaje wangim âlâlâ ki membuap.” Yawu gârâmâ lok sâmai ya bulânanâk Yesu sâm yâkâlen biwiyenje katbi.

<sup>32</sup> Otmu lohimbî nombotnje yawu sâm alahu gulahu otjetâ Parisaioje nângânetâ bâlemu yakât hotom uminiwi yengâlen arijetâ den hikum Yesu mem pâi emetjan katne sâm tembe lâulipyenje hângânyongowi. <sup>33</sup> Hângânyongojetâ Yesuhâlen arijetâ yuwu sâm ekyongop. “Nâ yen orop sâp tâlâwâk manmâmâ hângânnohomu takan yâkâlen âwurem ariwom. <sup>34</sup> Âwurem arimune pâinneknomai. Yawu gârâmâ ariwom yan gurâ yeje arinomialhât mâtâp âlâ ki tap. Yakât otmâ yâhâpje ki neknomai.” Yawu sâop.

<sup>35-36</sup> Yawu sâmu yâkje yuwu sâm alahu gulahu otbi. “Pâinneknomai yan ki neknomai. Otmu ariwom yan gurâ arinomialhât mâtâp ki tap,” yap. Yakât otmâ wosaken arimu yan pâinmâ ki mem tetenom? Anitâhât dengât pâpgunumai yengâlen emelâk bukulpipnenaje den kâsikum yingim mansai. Ya orop ari manomialhât yap me wosaken ariwuapgât yap?” Yawu sâwi.

<sup>37</sup> Otmu selep tuhumiwi yakât hombaņ ya bia otbe sâm otmu yan lohimbî kerekje menduhuakmâ kai toka pato otminiwi. Yâhâ menduhuakbiân Yesuje yahatmâ kinmâ yuwu sâm ekyongop. “Lohimbî âlâ me âlâ manman kâriknahât to yakât yeksap yamâ nâhâlen ga nejet. <sup>38</sup> Emet inânņan poropete nombotnje den âlâen hâum kulemguwi yakât topnje yuwu tap. “Lohimbî âlâ me âlâje nâhâlen biwiyenje kepeim manomial yamâ biwiyenambâ manman kâriknahât to ya hindakmâ hirik hirik sâm imbuap.” Kulemguwi yakât topnje yawu tap.” Yawu sâop.

<sup>39</sup> Yesuje den yu sâop yamâ tohât ki sâop. Yâhâ Yesu himbimân ki âwurem yâhâopgât otmâ Anitânje Wâtgât mâmânahât Heak ki

hângângumu giop. Yâhâ sâp yiwerenje yuâmâ nenŋe biwi nânŋân nânŋânnenŋe Yesuhâlen katmunŋe yanâmâ Wâtgât mâmânahât Heakŋe nengâlen ge mâmânŋe otningimap yakât sâop.

<sup>40</sup>Yawu sâmu nânŋâm lohimbî nombotŋaŋe yuwu sâwi. “Yamâ poropete pato takawuap sâmain ya mat takamu eksain” <sup>41</sup>Yâhâ nombotŋaŋeâmâ yuwu sâwi. “Bulânânâk Anitânŋe lok yuŋe tihitnenŋe olâkgât hângângumu ge mansap.” Yawu sâwi. Yawu gârâmâ nombotŋaŋeâmâ nânŋâm hilipgum yuwu sâwi. “Bâe, Yesu yuâmâ Galilaia amboŋe. <sup>42</sup>Yamâ Anitânŋe lok âlânŋe tihitnenŋe otbuapgât hângângumu gewuap yamâ Dawitihât senân gâtŋe. Otmu Betelem kapiân tetewuap. Yâkât topŋe yawu miti pepaen kulemguiwi tap. Yakât otmâ Yesu yuâmâ Anitânŋe ki hângângumu giop, yawu eksain.” Yawu sâwi. <sup>43</sup>Yesuhât topŋahât yawu sâm alahum hioŋakbî. <sup>44</sup>Yâhâ nombotŋaŋeâmâ pâi emetŋan mem katne sâm otŋetâ umatŋe otmu pilâwi.

#### Parisaioŋe Yesuhât nânŋâm betbangiwi.

<sup>45</sup>Yawu otŋetâ Parisaio otmu hotom uminiwi yengât tembe lâulipyenŋe purik sâm kunlipyenŋe yengâlen arinŋetâ yuwu sâm âiyongowi. “Yen wongât Yesu ki mem takai?” <sup>46</sup>Sâŋetâ sâwi. “Yâkŋe den sâmu nânŋâmunŋe âlâ kândâkdâek otmu yaŋak inâk takain. Yâhâmâ topŋe ikŋiâk.” Yawu sâwi.

<sup>47</sup>Yawu sâŋetâ Parisaioŋeâmâ yuwu sâwi. “Bâe, Yenâmâ denŋe nânŋânŋetâ biwiyenŋe gulip oap. <sup>48</sup>Nenŋeâmâ denŋe nânŋâmunŋe porap otmap. Otmu kunlipnenŋenŋe nânŋânŋetâ nahat otmap. Yakât otmâ nenâmâ biwinenŋe alitmâ mansain. <sup>49</sup>Yamâ lohimbî inŋe mansai yaŋe Mosehât girem den ki nânŋâm heŋgenŋumai. Yakât otmâ Anitânŋe hem nâpumân pilâyekmu ge matŋe umatŋe menomai.” Yawu sâwi.

<sup>50</sup>Yawu sâŋetâ yâk yengâlen gâtŋe âlâ, kutŋe Nikotemo sâm, yâhâmâ emelâk Yesuhâlen arimu den huhuowot. Yâkŋe yuwu sâm ekyongop. <sup>51</sup>“Mosehât girem den âlâ yuwu tap. “Lok âlânŋe ikŋe topŋe ki sâm tetem sârereakmuâk yâkât tosa yakât sâm hârewaŋginomgât dop âlâ ki tap.” Den yawu tap yakât nenŋe Yesuhât in yawu sâm hârewaŋgimunŋe ki ârândânŋ otbuap.” Yawu sâop.

<sup>52</sup>Yawu sâmu bukulpŋaŋe nânŋâm bâlewangim yuwu sâwi. “Bâe, gâmâ Galilaia ambolipŋe yengât nânŋârâ yahatmap yukâ. Emelâk miti pepaen kulemguiwi ya sâlikum yuwu ekbuat. Anitânŋe Galilaia amboŋe âlâ poropete âi ki sâm waŋmap.” Yawu sâwi. <sup>53</sup>Yawu sâm gem itoŋ galon otmâ emetyenŋehen ariwi.

**Yesuhâlen biwinenŋaŋe kepeinom yanâmâ den âiân ki katnenekbuap.**

**8**

<sup>1</sup>Otmu Yesuŋe Yerusalem kapi pilâm gem Oliwa pumŋan yâhâop.

<sup>2</sup>Emet haŋ sâmu kapiân âwurem ari opon kâmbukŋan yâhâmu



lohimbi kinjitje orowâkje denje nângâne sâm menduhuakbi. Menduhuakjetâ den kâsikum yingiop. <sup>3</sup>Den kâsikum yingimu yanâmâ Parisaio otmu Mosehât girem den kâsikum ningiminiwi yaŋe imbi âlâŋe lokje betjehehen kioŋmu mem tetewi. Imbi ya dâim Yesuhâlen den âiân katne sâm ariwi. Otmu Yesuŋe den sâm hilipgumu topje mem tetenom nângâwi. <sup>4</sup>Ari yuwu sâm âikuwi. “Lok pato, imbi yuâmâ lokje betjehehen kioŋmu mem teteain. <sup>5</sup>Yawu gârâmâ imbi âlâ me âlâŋe loklipyeŋe betyejehehen kioŋnomai yamâ kâtjak yongomunje munomaihât Moseje girem den âlâ kulemguo. Bâiŋ, gâŋeâmâ girawu naŋgat?” <sup>6</sup>Yawu sâŋetâ Yesuŋe den nângânâk tatmâ bâtnaŋe hânân kulemguo. <sup>7</sup>Kulemgum tatmu witgum âikuŋetâ kuwihakmâ yuwu sâm ekyongop. “Yeŋgâlen gâtje âlâ tosaŋe bia yaŋe topje katmâ imbi yu kumu yan yen hârokje kunomai.” Yawu sâop. <sup>8</sup>Yawu sâm yâhâŋe yawuâk den nângânâk tatmâ hânân kulemguo. <sup>9</sup>Yawu sâmu nângâŋetâ umatje otmu aŋgoân kunlipyeŋaŋe sâm yahatmâ kulet sâm ariŋetâ ariŋetâ lok ya hârok arim tiŋ pilâwi. Arim tiŋ pilâŋetâ imbi yamâ Yesu orop yetjiâk kinowot. <sup>10</sup>Kinmutâ Yesuŋe kuwihakmâ yuwu sâm ekuop. “Wa tou. Den âiân katgekne sâm oai ya wosapâ arai?”

<sup>11</sup>Sâmu sâop. “Lok pato, lok ya hârok arai.”

Sâmu sâop. “Yawu gârâmâ nâŋe gurâ otdâ bâleap yakât den âiân ki katgekbomgât naŋgan. Yawu gârâmâ gâŋe otdâ bâleap yamâ yâhâŋe ki otbuat.” Yawu sâop.

### Yesuŋe laŋinŋan katnenekmu tatmain.

<sup>12</sup>Yesuŋe ekumu arimu lohimbi kinbi ya ikŋan hâum yuwu sâm ekyongop. “Nâ hânŋan kulemŋan lohimbi mansai yeŋgât laŋinŋe otmâ mansan. Yakât otmâ lohimbi âlâ me âlâŋe nâhâlen biwiyenŋe kepeinomai yamâ sâmune laŋinŋe biwiyenŋan pilâmu omoŋ bâleŋambâ ga manman kârikŋahât pat otmai.” Yawu sâop.

<sup>13</sup>Yawu sâmu Parisaioŋe yuwu sâm ekuwi. “Gâ gikgahâlâk mepaeakmâ sâm tat. Yamâ nângâmunje bonje ki oap.” Yawu sâwi.

<sup>14</sup>Sâŋetâ sâop. “Nâmâ wosakembâ gewan yakât topje naŋgan. Me wosaken âwurem ariwom yakât topje gurâ nângâm heŋgeŋguan. Yawu otmâ nâ ninahât topne sâm tetemune bonje otmap. Yawu gârâmâ yeŋeâmâ nâhât topne ki nângâm heŋgeŋguai. Yakât otmâ den yai yu nângâmunne ki dopŋan oap. <sup>15</sup>Yen gurâ loggât nângân nângân watmai. Yakât otmâ lok âlâ me âlâhât den sâm hâreyiŋgine sâm otmaiân topyeŋe kakjeâk kakjeâk nângâm sâm hâreyiŋgimai. Yâhâ nâmâ lok âlâ me âlâhât ki sâm hâreyiŋgiman. <sup>16</sup>Yawu gârâmâ sâm hâreyiŋgim mansan mâne Awoŋnaŋe âi sâm nihim hâŋgânnohomu gewan yâkât sâtgât sâm hâreyiŋgimune bonje otbâp.

<sup>17</sup>Yakât topje nângâŋetâ keterahâkgât yuwu sâmune nângâŋet. Moseje girem den âlâ kulemguo ya yuwu tap. “Lok âlâ me âlâŋe ikŋiâk



bukulipnje yengât topyene teteâkgât sâm hâreyingiwuapgât dop ki tap. Lok yâhâp me amon yaŋe denyene hikunomai ya lâuakmâ konok otmap yamâ nângâŋetâ bonje otbuap.” Yawu tap. <sup>18</sup>Yakât ninahât topne yuwu sâmune nângâŋet. Awoŋnaŋe hângânnohomu gewan yâku yawuâk nâhât topne teteâkgât mâmâŋe otnihimu kulem topne topne memune ekmâ gamai ya.” Yawu sâop.

<sup>19</sup>Sâmu sâwi. “Âwâhe wosaken mansap? Ya sârâ nângâne.” Sâŋetâ sâop. “Yeŋe nâhât topne ki naŋgai. Gârâmâ Awoŋnahât topne gurâ ki naŋgai. Yawu gârâmâ nâhât topne naŋgai mâne Awoŋnahât topne nângâwanŋimbâi.” Yawu sâop.

<sup>20</sup>Otmu opon kâmbukŋe kâlehen tewetsenŋe katŋetâ geminiop yan lohimi menduhuakŋetâ Yesuŋe den kâsikum yingio. Sâp yan Parisaio yawu sâm ekyongop. Yawu gârâmâ Yesu pâi emetŋan mem katnehât nângâwi yamâ mumbuapgât sâp ki tâlâhuop yaŋak ki mewî.

### Yesuŋe Himbim Âwâŋahât sâmu ki nângâŋetâ keterahop.

<sup>21</sup>Yesuŋe yâhâpŋe yuwu sâm ekyongop. “Nâ pilâyekmâ ariwom. Arimune yen munomaiân yanâmâ nâ ki neknomai. Ki nekmâ yan orotmemeyene bâleŋe tâtâem otŋetâ yakât matŋe umatŋe kâpekyingimu hiliwahonomai. Yâhâ nâ ari manbom yan yen gurâ watnekmâ ari mannomaihât dop âlâ ki tap.” Yawu sâop.

<sup>22</sup>Yawu sâmu yuwu sâm alahu gulahu otbi. “Nâ ari manbom yan yen gurâ watnekmâ ari mannomaihât dop âlâ ki tap,” yawu yap. Yamâ girawuhât yap? “Hiwawakbom” sâm nângâm yap mon?” Yawu sâwi.

<sup>23</sup>Sâŋetâ sâop. “Nâmâ himbimâmbâ gewan. Yenâmâ hân yuân tetem manmâ gai. Yawu gârâmâ nine topne âlâ, ikŋiâk tap. Yenâmâ hân lok bâleŋe. <sup>24</sup>Yeŋe orotmemeyene bâleŋe tâtâem otŋetâ yakât otmâ matŋe umatŋe kâpekyingimu hiliwahonomai. Yawu gârâmâ awoŋnaŋe hângânnohomu ge manman amboŋe mansan. Yakât nâhâlen biwiyeŋe katmâ orotmemeyene kiŋgoŋ bet pilânomai yamâ ki hiliwahonomai.” Yawu sâop.

<sup>25</sup>Sâmu lauyene butelim yuwu sâwi. “Gâ wuân lok kinmâ yu yat?”

Sâŋetâ sâop. “Emelâk ekyongoan ya. <sup>26</sup>Yakât otmâ nâ yengât topyene sâm tetem den âiân katyebomgât dop tap. Yawu gârâmâ hângânnohopŋe yu me ya otmap yamâ bulâŋanâk. Yakât otmâ yâkât den yawuâk ekyongoman.” Yawu sâop.

<sup>27</sup>Yawu gârâmâ Yesuŋe Himbim Âwâŋahât ekyongop yamâ ki nângâŋetâ keterahop. <sup>28</sup>Yakât den âlâ yuwu sâm ekyongop. “Yeŋeâmâ nâ lok bulâŋe howanân nohom kânângâneknomai ya ekmâ nâ manman amboŋe mansan yakât topne nângâŋetâ bulâŋe otmu keterakyingiwuap. Otmu Awoŋnaŋe den sâm nihiop yawuâk ekyongom gan ya nine eŋgatneâk ki otman ya gurâ nângâm heŋgeŋgunomai. <sup>29</sup>Hângânnohomu

gewan yâk orop biwinetŋe kepeiakmâ konohâk otmu tem lâuwangimune nekmu ârânâdânŋ otmap. Yakât otmâ ki betnohomap.” Yawu sâop. <sup>30</sup> Yawu sâmu lohimbî dondânŋe den sâop ya nânŋânŋetâ bonŋe olop.

**Parisaioŋe Awarahamgât sen manbî.**

<sup>31-32</sup> Nânŋânŋetâ bonŋe otmu benŋe yuwu sâmu ekyongop. “Yiwereŋe biwiyereŋe hewewerŋe otmu nâhât den nânŋânŋetâ bulânŋe oap. Yawu nânŋâm yâhânomai yanâmâ meyekmune nâhât hoŋ bawalipne bulânŋe otnomai. Yawu otmâ Anitâhât topŋe nânŋânŋetâ bulânŋe otmu holanŋyebom.” Yawu sâop.

<sup>33</sup> Sâmu sâwi. “Bâe, nenâmâ Awarahamgât sen mansain. Gârâmâ lok âlâ me âlânŋe ki menenekŋetâ hoŋ bayinŋim mansain. Yakât otmâ topŋe girawuhât otmâ “holanŋyebom,” yat? Den yat yakât nânŋâm hâum pâpŋuain.” Yawu sâwi.

<sup>34</sup> Sâŋetâ sâop. “Nânŋe den bulânŋe ekyongomune nânŋânŋet. Lok âlâ me âlânŋe orotmemeyereŋe bâleŋe otmaiŋe yeŋe wâtŋeŋanâk kinmâ ya bet pilâm manman âilongoân torokatmâ mannomaihât dop âlâ ki tap. Orotmeme bâleŋe ya tâtâemâk otmâ manmâ manman bâleŋahât amboŋe ya hoŋ bawanŋinomai.

<sup>35</sup> Yakât topŋe teteâkgât den âlâen hâum sâmune nânŋânŋet. Lok âlâhât nanŋaŋe âwânŋe orop haoŋmâ ârândânŋ manmâ yâhâromawot. Yawu gârâmâ âwânŋahât hoŋ bawalipŋaŋe gurâ hâmbâi pilâyelekmâ ondop yeŋgâlen ari hoŋ bayinŋim mannomai. <sup>36</sup> Yawu gârâmâ nânŋeâmâ Anitâhât nanŋe mansan. Gârâmâ nânŋe holanŋyebom yamâ manman bâleŋahât amboŋe hoŋ ki bawanŋinomai.

<sup>37</sup> Yen nombotŋaŋe Awarahamgât sen mansain sâŋetâ ya nanŋan. Yawu gârâmâ nâhât den nânŋânŋetâ gemu bet pilâm nâhâitŋe kumonŋe muâk sâmai. <sup>38</sup> Nâmâ Awoŋne orop biwinetŋan den tatmap yamâ tâŋ tâŋâk ekyongom gaman. Yâhâ yeŋeâmâ amboŋeŋahât sât lâum yu ya otmâ mansai.” Yawu sâop.

<sup>39</sup> Yawu sâmu yuwu sâmu ekuwi. “Nenâmâ Awarahamgât sen.” Sâŋetâ sâop. “Yenâmâ Awarahamgât sen bulânŋe mansai mâne yâkŋe olop miop yawuâk watmâ manbâi. <sup>40</sup> Anitânŋe den bulânŋe eknohomu nânŋâm gewan yawuâk ekyongoman. Yâhâ yeŋeâmâ ya nânŋâmâk tatmâ tatmâ nâ nohoneâk nânŋâm manmai. Yeŋe oai yu Awarahamŋe olop ya lâuap. <sup>41</sup> Yamâ yeŋeâmâ amboŋeŋaŋe olop yawuâk otmâ manmai.” Yawu sâop.

Sâmu sâwi. “Imbî kondarânŋe ki menenekŋetâ san mansain. Awoŋnenŋeâmâ Anitâ ikŋe konok tap.”

**Parisaioŋe manman bâleŋe amboŋahât tem lâuminiwi.**

<sup>42</sup> Sâŋetâ sâop. “Nine eŋgatneâk otmâ ki gewan. Anitânŋe hânŋânnohomu ge mansan. Yakât otmâmâ âwânŋeŋe Anitâ mâneâmâ

nâhât den nângâm buku otnihimbâi. <sup>43</sup>Yawu gârâmâ nâje den ekyongomune nângâjetâ umatje otmu pilâmai. Yakât otmâ den sâmune nângâjetâ biwiyenjan ki hâuyekmap. <sup>44</sup>Âwâyeje Satan manman bâleñahât amboje, yâkât tem lâunehât nângâmai. Otmu kândikum emelâk orotmeme kiŋgoŋ otmâ gawiñeâmâ yâkâlen kândiwahom otjetâ bâlem gamap. Yâhâmâ manman âlepjan ki manmâ gaopjak manmâ gamap. Yâhâmâ perâk yakât mâmâje pato oapgât ikje engatjeâk watmâ kâityongomap. Yawu gârâmâ orotmeme âlepje otbuapgât dop âlâ ki tap.

<sup>45</sup>Yawu gârâmâ yenâmâ yâkât tem lâum mansaihât nâje den bulâje yan yuâmâ nângâjetâ nahat otmap. <sup>46</sup>Yâhâ yeŋgâlen gâtje âlâje den âiân katnekmâ tosa orop mansap sâm nâhâlen gâitbuapgât dop âlâ ki tap. Yawu gârâmâ nâje den bulâje ekyongoman yamâ topje girawuhât otmâ nângâjetâ paha den otmap? <sup>47</sup>Lok âlâ me âlâje Anitâhât pat manmai yaŋe yâkât denje haonmâ ârândâŋ lâumai. Yâhâ yenâmâ Anitâhât pat ki manmai. Yakât otmâ nâhât den hâkâŋ otmâ pilâmai.” Yawu sâop.

#### **Awaraham ki manop yapâek Yesuje tatmâ gamap.**

<sup>48</sup>Yawu sâmu yuwu sâm bâlewaŋgiwi. “Bâe, Gâmâ Samaria kapi amboje. Yakât otmâ weke bâleŋaje nângân nângânge mem hâlim tuhumu den yu yat.” Yawu sâwi.

<sup>49</sup>Sâjetâ sâop. “Nâ weke bâleŋaje ki mângâenekmu den sâman. Nâmâ Awoŋne ewe katmâ tem lâuwaŋgiman. Yâhâ yeŋeâmâ nâ ki ewe katnekmâ tem lâunihim mansai. <sup>50</sup>Yawu gârâmâ lohimbije ewe katneketgât ki naŋgan. Awoŋne Anitâ ikñiâk nângânihim lohimbije ewe katnekmâ tem lâunihijetgât nângâmap. <sup>51</sup>Yakât otmâ den bulâje ekyongomune nângâjet. Lok âlâ me âlâje nâhât tem lâunihim manmai yaŋeâmâ manman kârikjan mannomai.” Yawu sâop.

<sup>52-53</sup>Sâmu sâwi. “Bâe, Awarahamâmâ emelâk muop. Otmu poropete ya gurâ emelâk muwi. Yâhâ gâŋeâmâ “nâhât tem lâum mannomaiñeâmâ manman kârikjan mannomai,” yawu yat. Yawu sâmu muwi ya yeŋgât kunyeje mansan yawu nângâmat. Ya ki orotje. Yakât otmâ bulâjanâk weke bâleŋaje mângâehekmu biwi hâlim oat yawu naŋgain. Gâ yawu sâmu mepaeaksat yakât nângâmunje dondâ bâleap.” Yawu sâwi.

<sup>54</sup>Sâjetâ sâop. Nâje nine mepaeaksan mâne nângâjetâ porap otbâp. Yawu gârâmâ Awoŋne hângânohomu gewan yâkñeâmâ mâmâje otnihimu kulem topje topje memune ekjetâ yahatmap. Yâhâ yeŋeâmâ Awoŋnahât topje ki nângâm “Anitâ Ambonenje” sâmu imbiâk kunmai.

<sup>55</sup>Nâñeâmâ yâkât topje nângâm heŋgeŋguan. Yawu gârâmâ “ki nângâwaŋgian,” sâman mâne lok perâkñe otmâ den membâm. Yeje den mem lohimi kâityongomai yakât dopjeâk otbâm. Yawu gârâmâ nâmâ yâkât topje nângâm heŋgeŋgum tem lâuwaŋgimune ârândâŋ otmap. <sup>56</sup>Tâmbâyeje Awarahamje nâ tetem âi tuhumune bulâje tetemu

ekbehâlâk nângâm nâhâlen biwiŋaŋe kepeim heronje otmâ manop.” Yawu sâop.

<sup>57</sup>Sâmu sâwi. “Bâe, Awaraham ya emelâhâk manop. Yâhâ gâmâ sihan mansat. Yawu gârâmâ girawu otmâ Awarahamgât topŋe nângâm yu yat?” yawu sâwi.

<sup>58</sup>Sâŋetâ sâop. “Nâ ninahât topne sâm tetemune nângâŋet. Embânân Awaraham ki manop yapâek tatbanjak tatmâ gawanjak tatmâ gaman.” Yawu sâop.

<sup>59</sup>Yawu sâmu nângâŋetâ bâlemu “O, Anitâ konok embânân talopjak tatmâ gamap.” Yawu nângâm kât lâum kune sâm otŋetâ misingurakmâ opon kâmbukjambâ yok pilâm gem ariop.

### Lok âlâ senje bok sâsâŋe Yesuŋe heŋgeŋguop.

**9** <sup>1-2</sup>Otmu hilâm âlâen tatmâ nângâ nângâ sâp yan nen Yesuhât hoŋ bawalipŋe mâtâwân ariwin. Ari lok âlâ senje bok sâsâŋe ekbin. Lok yamâ mâmâŋahât teŋjambâ yawuâk teteop. Ekmâ yuwu sâm Yesu âikuwin. “Kutdâ, lok yuâmâ âlâhât toсахât otmâ mâmâŋahât teŋjambâ senje bok sâsâŋe yuwuâk teteop. Iŋe orotmeme bâleŋe yakât me âwâŋe mâmâŋe yetgât tosa yakât yu olop?”

<sup>3</sup>Yawu sâm âikumunŋe yuwu sâop. “Ya bia. Iŋe orotmemeŋe bâleŋe me âwâŋe mâmâŋe yetgât toсахât bia. Yawu gârâmâ Anitâhât wâtŋan kinmâ heŋgeŋgumune ekŋetâ âlâ kândâkdâ olâkgât mâmâŋahât teŋjambâ yuwuâk teteop. <sup>4-5</sup>Yakât nângâŋetâ teteâkgât den âlâen hâum sâmunne nângâŋet. Nâŋe kulem topŋe topŋe mem den ekyongomune yan laŋŋiŋaŋe biwiŋan pilâmu haŋ sâyiŋgimap. Yakât otmâmâ nâ hâŋgânnohomu gewan yâkŋe mâmâŋe otningimu tem lâuwangim manmunŋe yan lohimbŋe yâkât wâtŋahât bulâŋe ya eknomai. Yawu gârâmâ hâmbâi katyekmâ arimune yan omoŋ sahakmu âi tuhunomaihât dop ki otbuap.”

<sup>6</sup>Yawu sâm hân mem tâpgum golanŋumu toâk toâk otmu lok yakât senŋan lâwâlem yuwu sâm hâŋgâŋguop. <sup>7</sup>“Gâ arimâmâ Siloam denŋânân senge hâmehe piriakbuat.” Yawu sâop. Otmu kut Siloam yakât topŋeâmâ yuwu, “hâŋgânnohop” yawu. Yawu sâm hâŋgâŋgumu ari to piriakmu senje suk sâmu ehop.

<sup>8</sup>Yawu otmâ âwurem arimu bukulipŋe otmu lohimbŋe emelâk topŋe nângâminiwiŋe ekmâ yuwu sâwi. “O, lok senje bok sâsâŋe mâtâp ginŋan tatmâ ulitnongomap ya yu mon?” Yawu sâm alahuwi. <sup>9</sup>Nombotŋaŋe sâwi. “Lok ya yukâ,” sâwi. Yâhâ nombotŋaŋeâmâ sâwi. “Bia, lok yuâmâ lok yai yawuya,” sâwi.

Yawu sâŋetâ lok ya iŋahâk yahatmâ sâop. “Yai, yamâ nâ yukâ.” Yawu sâop. <sup>10</sup>Yawu ekyongomu yuwu sâm âikuwi. “Gâ girawu otmâ senge hâreakmu eksat?”

<sup>11</sup>Sâretâ sâop. “Lok âlâ, kutje Yesu sâm, yâkne hân mem tâpgum golaŋgum sennan lâwâlem yuwu sâm eknohoap. “Gâ Siloam dengânân ari senge hâmehe piriak.” Yap yawuâk watmâ ari piriakmune senne hâreakmu eksan.”

<sup>12</sup>Yawu sâmu âikum sâwi. “Lok ya wosapâ tap?” sâwi. Sâretâ “Nâ ki nanŋan,” sâop.

### Parisaioŋe âi pâi tuhuwi.

<sup>13-14</sup>Yawu gârâmâ Yesuŋe tatmâ nâŋgâ nâŋgâ sâpŋan lok ya heŋgeŋguop. Yakât otmâ lok nombotŋe ekmâ kinbiŋe lok ya mem den âiân katne sâm Parisaio yengâlen dâim ariwi. <sup>15</sup>Dâim ariŋetâ Parisaioŋe girawu otmâ senŋe hâreakmu ehop yakât âikuwi. Âikuŋetâ yuwu sâm ekyongop. “Yesuŋe hân mem tâpgum golaŋgum sennan lâwâlemu yaŋak ari Siloam dengânân piriakmune senne hâreakmu eksan.” Yawu sâop.

<sup>16</sup>Yawu sâmu Parisaio nombotŋaŋe yuwu sâwi. “Yesuŋe tatmâ nâŋgâ nâŋgâ sâpŋan hân mem tâpgum golaŋguop yamâ âi miop yawuhât dop oap. Yakât otmâ ekmunŋe Anitâŋe ki hâŋgâŋgumu giop oap.” Yawu sâwi. Yâhâ nombotŋaŋeâmâ yuwu sâwi. “Orotmeme bâleŋe otmâ manmap mâne kulem yuwuya ki membâp.” Yawu sâm hioŋakbi.

<sup>17</sup>Hioŋakmâ yaŋak witgum lok ya yuwu sâm âikuwi. “ “Mem sennan lâwâlemu hâreakmu eksan,” yat. Yakât otmâ topŋe tipiŋe nâŋgâwaŋgiat ya sârâ nâŋgâne.” Yawu sâwi.

Sâretâ sâop. “Yâhâmâ Anitâhât sâtgât heŋgemnohop yakât ekmune poropete oap.” Yawu sâop.

<sup>18</sup>Yâhâ Parisaio nombotŋaŋe senŋe hâreakmu ehop yakât den pat nâŋgâŋetâ ki bulâŋe olop. Yakât otmâ topŋe yâhâpŋe sâretâ nâŋgâne sâm âwâŋe mâmâŋe yuwu sâm âiyotgowi. <sup>19</sup>“Nanyetŋe senŋe bok sâsâŋe yawuâk teteop sâmawot. Yamâ yiwereŋeâmâ girawu otmâ eksap? Yakât sâmutâ nâŋgâne,” sâm âiyotgowi.

<sup>20-23</sup>Yâhâ emelâk Yesuŋe lok ya ki heŋgeŋguop yan Parisaioŋe den yuwu hikuwi. Anitâŋe tihitnenŋe otbe sâm Yesu hâŋgâŋgumu giop yakât “lohimbi âlâ me âlâŋe yawu sânomai yamâ kewilâyekmunŋe miti emetŋan ki yâhâm yaehen mannomai.” Yawu sâwi. Yawuhât âwâŋe mâmâŋaŋe kewilânelekŋetâ yaehen manmait sâm kiŋgityetŋahât otmâ yuwu sâowot. “Netgât nannetŋe yu bulâŋanâk senŋe bok sâsâŋe yawuâk mem ga katbit ya nanŋait. Yawu gârâmâ topŋe girawuhât otmâ senŋe hâreakmu eksap ya ki nanŋait. Yamâ yâkne ŋaŋa tap mâne yâkât topŋe ekyongombâit. Gârâmâ ikŋe âikuŋetâ topŋe ekyongoâk.” Yawu sâowot.

<sup>24</sup>Yawu sâmutâ nanyetŋe yâhâpŋe yuwu sâm âikuwi. “Anitâhât senŋan kinsat yakât otmâ den bulâŋanâk sârâ nâŋgâne. Nenâmâ Yesuhât topŋe nanŋain. Yâhâmâ lok bâleŋe. Gâŋe yâkât girawu nanŋat?”

<sup>25</sup>Yawu sâm âikuŋetâ sâop. “Bâe, yeŋe lok bâleŋe yai yamâ ki nanŋan. Nâmâ senne bok sâmu manminiwan yamâ sâp yiwereŋe lok yaŋe senne lâwâlemu hâreakmu eksan yamâ nanŋan.” Yawu sâop.

<sup>26</sup>Yawu sâmu kunyeje kârikne otmâ sâwi. “Sârâ nânġâne. Gâ girawu otgihimu yan senge yu hâreahop?” Yawu sâwi.

<sup>27</sup>Sâġetâ sâop. “Âo, nâmâ emelâk ekyongoan. Wongât yeje usut usulâk âi pâi tuhuneksaï? Yeje yâkât hoġ bawaġine sâam âinohom tai me?” Yawu sâop.

<sup>28</sup>Yawu sâmu sârekguwi. “Wae, gâġeâmâ yâkât den lâuon. Yâhâ nenġeâmâ Mosehât girem den lâumain. <sup>29</sup>Aġġoân Anitâġe girem den Mose ekuop yamâ naġgain. Yâhâ lok yuâmâ âlâhât sâtġât otmâ âi memap? Topġe ki naġgain.” Yawu sâwi.

<sup>30</sup>Sâġetâ sâop. “Bâe, yai ya nânġâmune nahat oap. Lok yaġe sennan lâwâlemu hâreakmu ekban yamâ yeje girawuhât otmâ âlâhât sâtġât otnihop yakât nânġâm pâpġuai? <sup>31</sup>Yawu gârâmâ nenâmâ yuwu naġgain. Orotmeme bâleġe otmâ manmaiġe âi tuhune sâam Anitâ ulitġuġetâ ki nânġâyġimâp. Yâhâ lohimbi âlâ me âlâġe ewe katmâ tem lâuwaġimâġe ulitġuġetâ âlepġe nânġâyġimâp. <sup>32</sup>Yawu gârâmâ kândikum emelâk Anitâġe lohimbi katyelekmu yapâek tetem gawiân kulem yuwu yakât pat âlâ ki nânġâman. Yakât otmâmâ yuwu naġgan. <sup>33</sup>Lok yuâmâ Anitâġe ki hânġâġumu ġiop mâne ki heġġemnohombâp.” Yawu sâop.

<sup>34</sup>Sâmu sâwi. “Bâe, Gâmâ mâmâhaġe meġġehop yapâek manman bâleġe manmâ gamat. Yakât gâġe girawu otmâ den kâsikum ningiwe sâam oat? Pilâm ânâ ari,” sâam watġetâ ba ariop.

### **Senġe bok sâsâġe heġġeġuop yaġe Yesuhâlen biwiġe kalop.**

<sup>35</sup>Watġetâ ariop yakât den pat Yesuġe nânġâop. Lok ya mem tetem yuwu sâam ekuop. “Gâġe lok bulâġahâlen biwihaġe kepeim mansat me bia?”

<sup>36</sup>Sâmu sâop. “Lok pato, gâ âlâhât yat? Yiwereġe tiripnohorâ ekmâ biwinaġe yâkâlen kepeim manbehât naġgan.” Yawu sâop. <sup>37</sup>Sâmu sâop. “Nâ ninahât yan.”

<sup>38</sup>Sâmu sâop. “Kutdâ, biwine gâhâlen katsan,” sâam mepaeop.

<sup>39</sup>Yawu sâam mepaemu yuwu sâop. “Nâ lohimbi topyeġe ekmâ kâsipyongowehât gewan. Lok nombotġeâmâ “emelâk nânġâmain” sâam mepaeakmai yamâ hâum pâpġunomai. Yâhâ nombotġaġeâmâ “ki nânġâmain” sâamai yamâ sâamune nânġâġetâ haġ sâyġiġiwuap.” Yawu sâop.

<sup>40</sup>Yawu sâmu Parisaio yan kinbiġe nânġâm yuwu sâam âikuwi. “Maiġ, nenġe mepaeakmaingât hâum pâpġum ki naġgaingât yat me?”

<sup>41</sup>Sâġetâ sâop. “Nâhât topne nânġâm biwiyeġe nâhâlen kepeimai mâne emelâk tosayeġe biatyiġimbâp. Yâhâ yeġeâmâ “emelâk nânġâm pesuk pilain” sâam biwiyeġe nâhâlen ki kepeimai yakât otmâ tosayeġe ya yawuâk tatmâ yâhâwuap.” Yawu sâop.

**Yesuŋe tihit otningimap.**

**10** <sup>1</sup>Yesuŋe ikŋan hâum yuwu sâm ekyongop. “Yuwu sâmune nâŋgâŋet. Lama amboyeŋaŋe peke tuhum lama ya kâlehen katyekmu kinmai. Yâhâ lok âlâ me âlâŋe lama kombo mene sâm lama galemŋe tirek topŋan kinmap yakât otmâ peke betŋehembâ mem pitik pilâm yâhâm kâlehen kioŋmâ kombo membuaŋ. <sup>2</sup>Yâhâ lama amboyeŋaŋe dâiyekmâ nak sândukŋehen katyekmu kinŋet sâm peke betŋehembâ ki kioŋmap. <sup>3</sup>Yâkŋeâmâ tirek tâŋ tâŋâk yakât galemŋe ekumu nâŋgâwaŋgimu kâlehen ba lama kutyeŋe ikŋiâk ikŋiâk yongomap. <sup>4</sup>Yongonmu ga peke hindâmu denŋe nâŋgâm amboyeŋe watmâ arimai. <sup>5</sup>Yâhâ lok ondopŋe pup taka dâiyekmâ ariwe sâm yongonbuaŋ yamâ eŋgat towatŋe aŋgo nâŋgâm ki betŋan watnomai.” Yawu sâop.

<sup>6</sup>Yesuŋe den yu ikŋan hâum sâmu nâŋgâŋetâ ki keterahop.

<sup>7</sup>Nâŋgâŋetâ ki keterahopgât yuwu sâop. “Nâmâ lama yengât amboyeŋe bonŋe. <sup>8</sup>Aŋgoân nâ hânân ki gewan yanâmâ lok komborâ nombotŋaŋe Anitâhât lama taka dâiyekmâ âlâengen arine sâm yongonŋetâ denyeŋe ki nâŋgâyiŋgiwi. <sup>9</sup>Nâmâ tirek galemŋe kinman. Lohimbi âlâ me âlâŋe manman sânduhân manne sâm otmai yamâ nâhâlembâ gam ba peke kâlehen kinŋetâ tihityeŋe otmune kilik milik mannomai. <sup>10</sup>Otmu lok komborâ yâhâmâ lohimbi mem bâleyekmâ itit kiom tuhuyiŋgimai. Yâhâ nâmâ manman kârikŋe yiŋgimune yan manmâ yâhâŋetgât gewan. Yawu.

<sup>11</sup>Otmu âlâkuâk ninahât sâwe. Nâmâ lama galemyeŋe âlepŋe mansan. Yakât otmâmâ lok bâleŋe âlâ me âlâŋe nâhât lama hilipyongone sâm takanomai yamâ in yawu sârereyekmune nohonomai. <sup>12-13</sup>Yâhâ lama amboyeŋaŋe nep lok meyekmu yâkât lama galemयोगom yan hâmeŋahâlâk nâŋgâmai. Yawu gârâmâ soso hulin âlâŋe lama neyekbe sâm takawuap yamâ kiŋgityeŋahât otmâ pilâyekmâ arinomai. Ariŋetâ soso yaŋe nombotŋe neyekmu nombotŋe tiok taok otmâ arim kinnomai. Yawu.

<sup>14-15</sup>Otmu torokatmâ yuwu sâwe. Anitâ orop biwinetŋe hikuakmâ konohâk otmu naŋgaŋgiait. Yakât dopŋeâk nine lama orop biwinenŋaŋe kepeiakmâ konohâk otmu naŋgaŋgiain. Yakât otmâmâ nâŋe tihityeŋe otmâ sârereyekmune nohoŋetâ mumune yâkŋe manman sânduhân mannomai. <sup>16</sup>Nohoŋetâ mumbom yakât kakŋan nine lama nombotŋe emelâk Anitâŋe manman kârikŋahât pat kuyiŋgimu wosapâ me wosapâ mansai, ya gurâ yongonmune denne nâŋgâm yengâlen torokatmâ komot konohâk otŋetâ nâ ninak amboyeŋe otmâ yâhâwom.

<sup>17-18</sup>Yâhâ tihityeŋe otmâ sârereyekmâ mumbomgât awoŋnaŋe hâŋgânnohomu gewan. Gem biwinetŋe konok oap yakât otmâ lauŋe lâum heweweyâk otmâ kaweyeŋan kinmune nohoŋetâ mumbom. Yakât otmâmâ awoŋne orop biwinetŋe kepeiakmâ konohâk otmait.



Otmu nine manmannahât topne nanngagian yakât otmâ lok âlâ me âlâne yerahât otmâ hilipnohonomaihât dop bia. Yawu gârâmâ hâmene ki kinbuap sâwangât nohojetâ mumbom. Yanak benje mumuambâ yahatbom yangât yawuâk otbom.” Yawu sâop.

<sup>19</sup>Yesuje den yawu sâmu Parisaioŋe nânġâm hionakmâ nombotŋaje yuwu sâwi. <sup>20</sup>“Weke bâleŋaje mânġâemu biwi hâlim otmâ den yu yap. Yakât otmâ wongât ki kuwanġiai?” <sup>21</sup>Yâhâ nombotŋajeâmâ yuwu sâwi. “Weke bâleŋaje lok senyeŋe bok sâsâne heŋgemyongonomaihât dop ki tap. Yâkŋe den sâmu nânġâmunŋe sâtŋe otmap. Gârâmâ weke bâleŋaje lok mânġâeyekmu den ihilâk mahilâk sâmai yakât dop ki oap.” Yawu sâwi.

### Parisaioŋe Yesu kâtŋak kune sâm otbi.

<sup>22</sup>Otmu emelâk hâkulipnenŋaje yâhâŋe opon kâmbukŋe mem miwirikum yanak hotom um Anitâ mepaewi yakât hombaŋ tâlâhuop. Otmu hombaŋ ya gelâk sâpŋan teteop. <sup>23</sup>Gârâmâ emelâk opon ya tuhuwi yan gelâk ningimap sâm selep bârârâhâk kâlep tuhuwi yakât kutŋeâmâ Solomongât selep yan Yesuje yâhâop. <sup>24</sup>Yan yâhâmu Parisaioŋe mem hawam mewam tuhum âi pâi tuhum yuwu sâm âikuwi. “Wongât topge kurihiakdâ nenŋe eŋgat yâhâp oain? Anitâne hânġângumu gewuap sâminiwi ya gâ me? Me âlâhât mambotnom? Topge tâŋ tâŋâk eknongorâ nânġâne.” Yawu sâwi.

<sup>25</sup>Sâŋetâ sâop. “Nâ yakât emelâk ekyongom gaman. Yamâ yeŋe nânġâŋetâ ki bulâne otmap. Yâhâ Awoŋŋaje mâmâne otnihimu kulem topŋe topŋe memune ekŋetâ yan topne tetemap. <sup>26</sup>Yawu gârâmâ yenâmâ nâhât lama bulâne ki manmai. Nâhât lama bulâne manmai mâne kulem memune ekŋetâ bulâne otmu biwiyenŋe nâhâlen katbâi. <sup>27</sup>Yawu gârâmâ nâhât lama bulâne ya yeŋgât topyeŋe nânġâm yongonmune betnan watnekmai. <sup>28</sup>Yawu otmai yamâ nâhât wâtŋan kinmâ manman kârikŋan mannomai. Yamâ lok âlâ me âlâ, me wahap yu me yaŋe nâhâlembâ mem dâiyekŋetâ hiliwahonomaihât dop âlâ ki tap. <sup>29-30</sup>Yâhâ Awoŋŋe kunnenŋe pato tatmapŋe nâhât lama yaŋe nâ orowâk mannomgât pat kuyiŋim wawaeyekmap. Yakât otmâmâ lok âlâ me âlâ, me wahap yu me yaŋe yâkâlembâ mem dâiyekŋetâ hiliwahonomaihât dop gurâ ki tap. Yâhâ Awoŋ orop dopnetŋe konohâk oap.” Yawu sâop.

<sup>31</sup>Yesuje yawu sâmu nânġâŋetâ bâlemu kâtŋe mem kune sâm otbi. <sup>32</sup>Kune sâm otŋetâ sâop. “Awoŋŋaje âi sâm nihiop ya âilonġo mem gamune ekmai. Yakât otmâmâ wuân otmune bâleapgât kâtŋe mem nohone sâm oai?” Yawu sâop.

<sup>33</sup>Sâmu sâwi. “Âi âilonġo mem gaman yat yakât bia. Gâŋe “Anitâ orop dopnetŋe konok oap,” sâmat yakât nânġâmunŋe bâlemu gohone sâm oain. Gâmâ lok bâleŋe.” Yawu sâwi.



<sup>34</sup>Sânetâ sâop. “Bâe, Anitâne den sâop ya yengât miti pepaen lok âlâne kulenguop ya yuwu tap. “Yenâmâ nâhât dowâk mansai.” Anitâne den yawu sâop ya kulenguop. <sup>35</sup>Yâhâ miti pepaen den hârok kulenguwi tap ya bulâne. Yawu gârâmâ Anitâne tâmbâlipyene yengât galemlipyene âi sâm yingim yan “Yenâmâ nâhât dowâk mansai,” sâm ekyongop. <sup>36</sup>Otmu yâk yengât sâop yawuâk nâhât sâm âi nihim hângânnohomu gewan. Yakât otmâ “Nâ Anitâhât nanne mansan,” yawu sâm ekyongomune ya nângâmâk tatmâ nâhâitne Anitâhât kawenjan kinbe sâm oap sâmai ya nângâmune ki ârândân oap. Anitâne emelâk yâk yengât sâop yawuâk nâhât sâop. <sup>37</sup>Yâhâ nâne kulem topne topne mem gaman ya ekjetâ Awonahât dop ki otmap otmuâmâ âlepne denne nângânetâ tânjât otbuap. Yawu gârâmâ kunyene kârikne otmâ denne nângânetâ gemu betnihim mansai. <sup>38</sup>Yakât otmâ kulem meman ya ekmâ nângâm Awon orop dopnetne konohâk oap yakât nângânetâ keterakyingiâk.” Yawu sâop.

<sup>39</sup>Yawu sâmu nângânetâ bâlemu mem pâi emetjan katne sâm otjetâ hohetyenambâ gem ba ariop.

<sup>40</sup>Ari Yoran to nombotgen emelâk Yoane ne lohimbi mem toen katyekmu manbi yan ari manop. <sup>41-42</sup>Yan manmu lohimbi kiŋgitne orowâkne arim ekmâ yâkâlen biwiyenane kepeim yuwu sâm alahu gulahu otbi. “Yoane ne kulem âlâ ki miop. Yawu gârâmâ yâkne Yesuhât topne eknongop yamâ bulâjanâk sâop.” Yawu sâwi.

### Lasaro bâleop.

**11** <sup>1-2</sup>Otmu sâp yakât kakjan lok âlâ, Betani kapi amboŋe mesek sâtjan kinop, kutne Lasaro sâm, touyâhâtne Maria yet Mata. Yâhâ mesek ki kuop yan Mariaŋeâmâ to kukne suk suk âlâ mem Yesuhât kâinjan moselemu gemu pirim somotnane kereŋ mewangiop. <sup>3</sup>Yâhâ mesek sâtjan kinmâ pilâyelekbe sâm otmu touyâhâtne Yesuhât yuwu sâm den katmutâ ariop. “Lok pato, gâ nângâ. Bukuhe yamâ mesek sâtjan kinsap.” Yawu sâowot. <sup>4</sup>Den yawu katmutâ Yesuŋe nângâm matne yuwu sâm katmu âwureop. “Imiyetnane ki pilânenekbuap. Mesek sâtjan kinsap yakât huhopne yamâ lohimbi dondâne Awonne netgât nângânetâ yahatbuap.” Yawu sâop. <sup>5</sup>Yâhâ Yesuŋe Mata Maria, Lasaro yâk yengât tepne dondâ nângâop. <sup>6</sup>Yawu gârâmâ den pat ya nângâm hilâm kalimbu pesuk sâmu yanak nen hoŋ bawalipne yuwu sâm eknongop. <sup>7</sup>“Yahatjetâ Yuraia hânân âwurem arine.”

<sup>8</sup>Yawu sâmu nenŋe yuwu sâm ekuwin. “Lok pato, nengât papatolipnenneŋe yâhâlenâk gâ gohone sâm otbi. Yakât yiwerene âwurem arinom yamâ gohonomai yakâ.”

<sup>9</sup>Yawu sâmunŋe Yesuŋe den âlâen hâum yuwu sâm eknongop. “Anitâne emet hangât me omongât dop yawu katmu tetemap. Yawu gârâmâ hilâmân nenŋe

mâtâp ekmâ kilik milik arim gamain. Yawu otmâ kâinenjan ki terj sâmap. <sup>10</sup>Yâhâ omondâne ki ekmâ hejengegum arim gamain. Yawu otmâ kâinenjan terj sâmap. <sup>11</sup>Yiwerejeâmâ hilângât dop otmu mansain. Yakât otmâ bukenenje Lasaro in aman pâlâmne iap gârâmâ ari mândemune yahatbuap.” Yawu sâop.

<sup>12-13</sup>Otmu Lasaro yamâ emelâk bâleop. Yâkne den kelangatmâ eknongomu nânngâmunne ki keterakmu yuwu sâm ekuwin. “Kutdâ, yamâ aman in iapgât yahatbuap. Yakât otmâ ki arinehât nanngain.”

<sup>14</sup>Yawu sâmunne Yesune den tân tânâk yuwu sâm eknongop. “Lasaronne emelâk bâleop. Gârâmâ orowâk tatbit mâne ki bâlembâp. <sup>15</sup>Emelâk bâleop. Gârâmâ kulem memune ekmâ topne nânngâm hejengegum biwiyenane nâhâlenâk kepeinomai. Yakât otmâ tepne herone oap. Bâin, yahatnetâ arine,” yawu sâop.

<sup>16</sup>Yawu sâmu bukenenje âlâ, kutne Toma sâm, kutne âlâmâ Boho boho, yuwu sâm eknongop. “Kutdânenne arinom nanngap. Yakât âlepne nen hârok arimunne nongonetâ muneâyâ.” Yawu sâop.

#### **Yesune mumujambâ mem yahatnenekbuap.**

<sup>17</sup>Yawu sâmu yahatmâ Betani kapiân ariwin. Yâhâ “Lasaro ya emelâk bâlemu kurihinetâ hilâm imbât oap” yawu sâm eknongowi. <sup>18-19</sup>Yâhâ Betani kapi yamâ Yerusalem kapi pato ya hâlânmaek tap yakât otmâ bukulipyene dondâne kapi pilâm kahân takawi.

<sup>20</sup>Yâhâ Matane “Yesu mâtâwân takam tap,” sânetâ nânngâm garije pilâm penewangiwe sâm giop. <sup>21</sup>Gem ekmâ yuwu sâm ekuop. “Kutdâ gâ nen orowâk tatbin mâne iminetnane ki pilânenekbâp. <sup>22</sup>Yawu gârâmâ gâne wuân me wongât Anitâ ulitguwat ya âlepne nânngâhiiwuap.” Yawu sâm ekuop.

<sup>23</sup>Sâmu sâop. “Imihe âlepne mumujambâ yahatbuap.”

<sup>24</sup>Sâmu sâop. “Hâmbâi sâp patoen yahatbuap yamâ nanngan.”

<sup>25</sup>Sâmu sâop. “Manman amboje yamâ nâ. Otmu mumujambâ yahatmâ mannomai ya gurâ amboje nâek. <sup>26</sup>Yakât otmâmâ lohimbi âlâ me âlâne biwiyene nâhâlen katmâ manmai ne munomai yakât kaknan mumujambâ yahatmâ mannomai. Manmâ yâhâpne munomaihât dop âlâ ki tap. Den yan yu nânngârâ bonje oap me bia?” Yawu sâop.

<sup>27</sup>Sâmu sâop. “Kutdâ, yat yamâ nânngâmune bonje oap. Otmu Anitâne tihitnenne olâk sâm nanne hânngângumu gewuap sâmain yamâ gâ ya nanngan.” Yawu sâop.

#### **Yesune weje nânngâop.**

<sup>28</sup>Yawu sâm âwurem ari garije den halowâk ekuop. “Kutdânenne mâtâwân taka kinmâ gâhât yap.”

<sup>29-30</sup>Yawu sâmu Mariane Yesu penewangiwe sâm yahatmâ sururuk sâm ariop. <sup>31</sup>Yahatmâ arimu bukulipne kak takawi yane “Mariane weje nânngâm sumângen ari isewe sâm oap,” sâm yahatmâ betnan watbi.

<sup>32</sup>Mariaje sururuk sâmi ari Yesu penewangim isem kinmâ yuwu sâmi ekuop. “Kutdâ, gâ nen orowâk tatbin mâne iminetnaje ki pilânenekbâp,” Yawu sâop. <sup>33</sup>Yawu sâmi isemu bukulpnje watbinje orowâk isewi. Isejêtâ yekmâ Yesuje tepnje nângâyinjim yuwu sâmi âiyongop. <sup>34</sup>“Yâk wosapâ kurihiwi?”

Sâmu sâwi. “Pato, yuân ga ek,” sâwi.

<sup>35</sup>Yawu sâjêtâ Yesuje yekmâ tepnje nângâyinjim isem kinop. <sup>36</sup>Yakât otmâ lohimbi kinbinje ekmâ yuwu sâwi. “Eknet. Nângân nângânje yâkâlen kepeim manmapgât yawu oap.” Yawu sâwi. <sup>37</sup>Yâhâ nombotnajeâmâ yuwu sâwi. “Lok senje bok sâsâje ya emelâk senje lâwâlemu hâreakmu ehop. Yawu gârâmâ Lasaro henjengguop mâne ki mumbâp. Ki henjengguop yakât nângâmunje bâleap.” Yawu sâwi.

### **Yesuje Lasaro mumuñambâ mem yahalop.**

<sup>38</sup>Yawu sâjêtâ Yesuje nângâmu ki ârândânj otmu sumângen ariop. Lasaro yamâ kârikin kâlehen katjêtâ tatmu kât pato âlâje mâtâpnje manguwi. <sup>39</sup>Ya ekmâ “Kât ya hâpunjêtâ ariâk,” sâmi ekyongop.

Ekyongomu Mataje sâop. “Kutdâ, kurihimunje hilâm imbât pesuk yap. Yakât emelâk tâtuk sâmi korokje pilap.” Yawu sâop.

<sup>40</sup>Sâmu sâop. “Yamâ nâhâlen biwihaje kepeim manbuat yanâmâ naje Anitâhât wâtjan kinmâ kulem membom ya ekdâ âlâ kândâkdâ otbuap yakât emelâk ekgohowan.” Yawu sâop.

<sup>41</sup>Yesuhât sâtgât otmâ kât pato ya hâpunjêtâ arimu yâkje himbimân pak sâmi ekmâ yuwu sâmi ulitguop. “Awoj, gâ ulitgohomune nângânihimat ya nanjan. <sup>42</sup>Yawu gârâmâ lohimbi kinsai yuje gurâ gâje hângânnohorâ gewan ya ekmâ nângâjêtâ bulâje olâkgât senyenjan kinmâ ulitgohowan.” <sup>43</sup>Yawu sâmi purik pilâm Lasaro kunop. “Lasaro, yahatmâ ge.” <sup>44</sup>Sâmu uk sâmi yahalop. Yâhâ kâije bâteje yamâ mem sângum kaok yaje sâhâm kuratguwi. Otmu kun kundenje ya gurâ sângumjak sâhâm kurihiwi. Yakât otmâ Yesuje yuwu sâmi ekyongop. “Sângum ya holañmâ pilâjêt.” Yawu sâop.

### **Kaipa otmu Parisaioje Yesu mumbuap sâmi den hikuwi.**

*(Mataio 26:1-5; Mareko 14:1-2; Luka 22:1-2)*

<sup>45</sup>Yesuje kulem miop yan lohimbi dondâje kak taka kinbinje ekmâ biwiyeje yâkâlen katbi. <sup>46</sup>Yâhâ nombotnajeâmâ kulem miop yakât den pat Parisaio ekyongowi. <sup>47</sup>Ekyongojêtâ yajak Parisaioje hotom uminiwi ya yengât kunlipyeje ari yuwu sâmi ekyongowi. “Lok yuje kulem topje topje memap yakât girawu otne? <sup>48</sup>Mâtâp ki manguwanginom yamâ lohimbi kerekje yâkâlen torokatnomai. Yâkâlen torokatjêtâ Roma kunlipnenjaje nângâjêtâ bâlemu tembe lâulipyeje hângânyongojêtâ taka nengât opon kâmbukje kândonjâmâ itit kiom tuhuneneknomai.” Yawu sâwi.

<sup>49</sup>Yawu sânetâ hotom uminiwi ya yengâlen gâtje lok âlâ, kutje Kaipa sâmb, yamâ yambu yan hotom uwi ya yengât kunyeje pato manop. Yâkneâmâ yahatmâ yuwu sâmb ekyongop. “Yenâmâ nângâm hâum pâpgumai. <sup>50</sup>Yakât otmâmâ yuwu sâmb ekyongomune nângâjet. Nen Yura lohimbi kerekje hiliwahomaingât lok yuñahâk muâk sâmb.” Yawu sâop. <sup>51</sup>Yawu gârâmâ den sâop ya ikñahâk ki sâmb teteop. Yâhâmâ yambu yakât hotom uwi ya yengât kunyeje manop. Yawuhât den ya sâop yakât bulâje yamâ Yesuje kawenenñan kinmu kuñetâ muop. <sup>52</sup>Yâhâ Yura nengâlâk ki muop. Lohimbi wosapâ me wosapâ mansaije Anitâhâlen biwiyenje katnomai kerek menduhunenekmu komot konohâk otnom. Otmâ emelâk manman kârikñahât pat kuningiop ya menomgât kawenenñan kinmu kuñetâ muop. <sup>53</sup>Otmu Kaipaje sâop yapâek toñje katmâ Yesu muâkgât den hikum mâtâpgât pânimâ gawi. <sup>54</sup>Yakât otmâ Yesuje hoñ bawalipje menenekmu Yurâia hân pilâm, kapi âlâ, kutje Eparaim sâmb ya lok ki manmai yakât horatñehen ariwin. <sup>55</sup>Yakât kakñanâmâ nengât Tihit tihit hombañ tâlâhumu yan lohimbi dondâje Anitâje nângâyinjimu ârandâñ olâkgât toen piriakne sâmb Yerusalem kapi patoen yâhâwi. <sup>56-57</sup>Sâp yanâmâ hotom uminiwi yengât kunlipyeje otmu Parisaioje lohimbi yuwu sâmb ekyongowi. “Yesu takawuap otmâmâ lok âlâ me âlâje ekmâ ga eknongomu nenje pâi emetñan mem katnom,” sâwi. Yakât otmâmâ Yesu ekñetâ biatmu opon kâmbukñan yâhâm yuwu sâmb alahu gulahu otbi. “Yen girawu nanjai. Yesu hombañ yu kakje ki mon ekbuap.” Yawu sâwi.

**Mariaje to kukje âilonjo moselemu Yesu kâinjan giop.**

*(Mataio 26:6-13; Mareko 14:3-9)*

**12** <sup>1</sup>Yâhâ Yura lohimbiñe menduhuakmâ Yesuhât mambotñetâ bialop. Otmu yakât kakñan hilâm nombolân konok pesuk sâmb Tihit tihit hombañ tetewuap ya utâpgumu Yesuje menenekmu Eparaim kapi pilâm Betani kapiân ariwin. Yâhâ Betani kapi yamâ Yesuje Lasaro mumuñambâ mem yahalop. <sup>2</sup>Yan arimunje kapi ambolipje nombotñaje Yesuhât heroje otmâ orowâk menduhuakmâ sot uñetâ newin. Nem tatmunje Lasaroje Yesu hâlânjâ talop. Otmâ Mataje sot um hâum ningimu newin. <sup>3</sup>Nem tatmunje gariñaje nak âlâ toñje kukje suk suk, hâmeje yahat yahatje, moselemu Yesuhât kâinjan gemu somotje kâlep pato yaje mem gowasiñmâ kereñ mewañgiop. Otmu kukje yaje pindindiñ sâmb hâmenenñan yâhâop. <sup>4</sup>Kukje nângâm nengâlen gâtje âlâ, kutje Yurasi, Karioto kapi amboje yamâ gâmâlâk Yesuhât betñehen kioñbuap yaje sâop. <sup>5</sup>“Bâe. To kukje suk suk yu mem ari lok nombotje yinjimunje yakât hâmeje, wan tausen kina yawuya ninginetâ lohimbi umburuk mansai kâsikum tânyongombâingât dop.” Yawu sâop. <sup>6</sup>Otmu yâhâmâ den yu sâop yuâmâ lok umburuk manbi ya tânyongonehât ki

sâop. Yâhâmâ nengât tewetsenŋe katipŋe galemŋum kinmâ yapâ kombo meningiminiop. Yakât otmâ ikjahât nâŋgâm sâop. 7-8 Yawu sâmu Yesuŋe yuwu sâmu ekuop. “Kâmbukŋe, ki sâmu guhuŋmâ tatŋet. Kulem miap yu ekmune ârândâŋ oap. Yawu gârâmâ nâ getek nohoŋetâ mumbom yan to torehenŋe tap yuŋe mem yâhâpŋe pirinekbuaŋ. Yawu gârâmâ yu ki mem hâŋgâŋum tewetsenŋe mem lohimbi umburuk tânyongomai. Yamâ wongât? Yâhâmâ yen orop sâp kâlep manŋetâ tânyongonomai.” Yawu sâop.

<sup>9</sup>Otmu Yesuŋe Betani kapiân yâhâ talop yan lohimbi dondâŋe nâŋgâm ekne sâmu takawi. Otmu yakâlâk bia. Emelâk Yesuŋe Lasaro mumuŋambâ mem yahalop ya nâŋgâwihât ekne sâmu takawi. <sup>10-11</sup>Taka Lasaroŋe mumuŋambâ yahalop yakât ekŋetâ âlâ kândâkdâ otmu biwiyenŋe Yesuhâlen katbi. Yakât otmâmâ hotom uminiwi yengât kunlipyeyenŋe nâŋgâŋetâ bâlemu den yuwu sâmu hikuwi. “Lohimbi kiŋgitŋe orowâkŋe Yesuŋe Lasaro mumuŋambâ mem yahalop ya nâŋgâm yâkâlen torokatmaiât yâhâp yâhâp yotgomunŋe mundomawot,” sâwi.

**Yesuŋe Yerusalem kapiân yâhâmu heronŋe otbaŋgiwi.**

*(Mataio 21:1-11; Mareko 11:1-11; Luka 19:28-40)*

<sup>12</sup>Emet haŋ sâmu nenŋe yahatmâ Betani kapi pilâm Yerusalem kapiân yâhâwin. Betani kapi pilâmunŋe lohimbi dondâŋe Tihit tihit hombaŋ ekne sâmu Yerusalem kapiân taka tatbiŋe Yesu kapiân takawuap ya nâŋgâwi.

<sup>13</sup>Ya nâŋgâm kapi pilâm gem matuk yawuyaek yakât esenŋe hârem mâtâwân kinŋetâ gamunŋe heronŋe otbaŋgim sâwi. “Anitâŋe Isirae nengât tihitnenŋe otbuat sâmu kunnanŋe katgekma âi sâmu gihim hâŋgâŋohomu mat takat. Yakât otmâ Anitâ mepaeain,” sâmu heronŋe otbi. <sup>14</sup>Heronŋe otŋetâ Yesuŋe doŋgi nanŋe âlâ mem kakŋan yâhâ tatmâ kapiân yâhâop. Otmu yâhâop yakât emet inânŋan poropete âlâŋe den kulemguop ya yuwu tap.

<sup>15</sup>“Yen Yerusalem kapi ambolipŋe nâŋgâŋet. Yengât kutdâyeŋe doŋgi nanŋe kakŋan tatmâ yengâlen takamu ekmâ heronŋe nâŋgâwâŋginomai. Yakât otmâ âlâkuâk ki gorâyinŋiwuap.”

Den kulemguop ya yawu tap. <sup>16</sup>Otmu sâp yanâmâ hoŋ bawalipŋe nenŋe doŋgi ya dâim ge waŋmunŋe kakŋan tatmâ kapiân yâhâop. Kapiân yâhâop yan den yakât bulâŋe teteop yakât hâmu pâpŋuwîn. Yâhâ Yesuŋe himbimân âwurem yâhâop yakât kakŋan yukât nâŋgâmunŋe keterahop.

<sup>17-18</sup>Otmu emelâk Yesuŋe Lasaro mumuŋambâ mem yahalop yakât lohimbi dondâŋe ekbi. Otmu yâkŋe bukulipyenŋe ki ekbi ya ekyonŋoŋetâ nâŋgâwihât Yesu ekne sâmu mâtâwân ge penewaŋgim heronŋe otmâ orowâk kapiân yâhâwi. <sup>19</sup>Heronŋe otbaŋgiŋetâ Parisaio nombotŋenŋe ekmâ nâŋgâm bâlewaŋgim yuwu sâmu alahu gulahu otbi. “Bâe, nenŋe lohotŋe ot tatmunŋe lohimbi kiŋgitŋe orowâkŋe Yesuhâlen torokatnomosai yukâ. Yakât otmâ girawu otmunŋe yan Yesu watmâ tai yu pilâŋet?” Yawu sâwi.

**Yesuŋe mumbuap yakât Pilip yet Anderea ekyotgop.**

<sup>20</sup>Otmu sâp yanâmâ Girik kapi ambolipŋe nombotŋaŋe Anitâ mepaene sâm Yerusalem kapiân yâhâwi. <sup>21</sup>Kapiân yâhâ Yesu ekne sâm bukunenŋe âlâ, Pilip sâm, yamâ Besaita kapi yamâ Galilaila hânân tap yan gâtŋe, yâkâlen toho Yesuhât âikuwi. <sup>22</sup>Yesuhât âikuŋetâ Pilipŋe bukuŋe Anderea ekumu orowâk Yesuhâlen ari den ya ekuowot. <sup>23</sup>Ekumutâ nâŋgâm matŋe yuwu sâm ekyotgop. “Bâiŋ, Anitâŋe nâ lok bulâŋe hâŋgânnohomu gewan. Nâhât topne tetemu nâŋgâŋetâ âlâ kândâkdâ otmu mepaeneknomaihât sâpŋe tâlâhuap. <sup>24</sup>Yakât den âlâen hâum sâmune nâŋgâmutâ keterahâk. Senjo alikŋe ki mondotmâ hân kâlehen katmain yamâ kâmŋe ki gamu bonŋe ki otmap. Yâhâ senjo alikŋe hân kâlehen katmunŋe tatmâ kâmŋe pururuk sâm yahatmâ esenŋe huhumap. Yawu otmâ suriŋe pilâm yaŋak bonŋe otmap. Yawu gârâmâ senjo alikŋe konok yapâek bonŋe pato tetemap. Yakât dopŋeâk nohoŋetâ mumune hânân katnekŋetâ gemune yapâ gâtŋaŋe lohimbi dondâŋe manman bulâŋe mem tetenomai. <sup>25</sup>Yakât yuwu sâmune nâŋgâyet. Lohimbi âlâ me âlâŋe yeŋe manmanyenjahâlâk mem mete tuhum mannomai yamâ hâmbâi hiliwahonomai. Yâhâ lok âlâ me âlâŋe manmanyenjahât ki mem mete tuhum nâhâlâk biwiyenŋe katmâ mannomai yaŋeâmâ manman kârikŋan mannomai. <sup>26</sup>Yâhâ lok âlâ me âlâŋe nâhâlen torokatmâ hoŋ banihinomai yaŋeâmâ tem lâunihim mannomai. Yawu manŋetâ Awoŋnaŋe meyekmâ nâhâlen torokatyekmu biwinnenŋaŋe hikuakmâ konohâk otmâ orowâk manbisâin.

<sup>27</sup>Yawu gârâmâ sâp yiwerenŋe yu biwine umatŋe oap. Biwine umatŋe otmu yakât girawu sâwom. Yuwu mon sâwom? Awoŋ, umatŋe bâleŋe yu kaknan yâhâmapgât nâŋgânihirâ pilâm ariwehât naŋgan. Yamâ benŋe yawu bia. Umatŋe yu kaknan yâhâmu sâtŋum mumbehât hâŋgânnohorâ gewan. <sup>28</sup>Yakât otmâ sârâ umatŋe yu me ya kaknan yâhâwuap yu ekmâ lohimbi dondâŋe mepaehekŋetgât naŋgan.” Yawu sâop.

Yawu sâmu himbimâmbâ âwâŋaŋe yuwu sâop. “Emelâk kulem topŋe topŋe mem garâ ekŋetâ âlâ kândâkdâ otmu mepaenekmâ gamai. Yawu gârâmâ âlâkuâk kulem mendâ ya ekmâ mepaeneknomai.” Yawu sâop.

<sup>29</sup>Yawu sâmu lohimbi yan kinbiŋe denŋe nâŋgâm sâwi. “Âo, himbim guŋguruŋ sâmu naŋgain.” Yâhâ nombotŋaŋe sâwi. “Bia, aŋelo âlâŋe den ekumu ombenŋe munŋaŋe ŋawaŋ ŋawaŋ sâm arimu naŋgain,” yawu sâwi.

<sup>30</sup>Yawu sâŋetâ Yesuŋe yuwu sâm ekyongop. Anitâŋe den yiwerenŋe eknohomu naŋgai yuâmâ biwine houŋ sâmapgât ki yap. Yeŋe nâhât nâŋgânihinŋetâ keterahâkgât yap. <sup>31</sup>Sâp yiwerenŋe yupâek Anitâŋe lohimbi yengât biwiyenŋe ekmâ mem kiwiliyekmâ sâm hâreyiŋgiwuap. Yâhâ lohimbi bâleŋe yengât amboyenŋe, kutŋe Satan sâm, ya mem ge katmune yâkât wâtŋe pesuk sâwuap. <sup>32</sup>Yakât topŋeâmâ yuwu. Nâ howanân nohom

kânângânekŋetâ kinbom. Yawu otbom yan lohimbi kerek dâiyekmune nâhâlen torokatnomaihât nanŋan.” Yawu sâop. <sup>33</sup>Mem âlâlâ tuhuŋetâ mumbuap yakât topŋe nânŋâŋetâ keterakŋiŋgiâkgât Yesuŋe yawu sâm ekyongop.

<sup>34</sup>Yawu sâm ekyongomu lohimbi yan kinbiŋe nânŋâŋetâ ki ârândân otmu yuwu sâm âikuwi. “Bâiŋ, yat yawu bia. Moseŋe den âlâ kulemuŋop ya yuwu tap. Anitâŋe hânŋâŋumu gewuap yamâ manman kârikŋan manmâ yâhâwuap. Yawu gârâmâ gâŋeâmâ yuwu sâmat. “Anitâŋe lok bulâŋe hânŋânohomu gewan,” ya sâmat. Yamâ girawuhât otmâ “Howanân nohom kânângâneknomai” yat. Yakât otmâ Anitâŋe lok bulâŋe hânŋâŋumu gewuap yakât topŋe yamâ nânŋâm hilipgumat. Yakât otmâ lok âlâhât yat?” Yawu sâwi.

<sup>35-36</sup>Sâŋetâ sâop. “Sâp yiwereŋe yuâmâ sâmune laŋinŋaŋe biwiyeŋan pilâmu haŋ sâyinŋimap. Yawu gârâmâ laŋinŋe bok sâmu omoŋ bâleŋe sahakmapgât yeŋe laŋinŋahât amboŋahâlen biwiyeŋe kepeim laŋinŋanâk mannomai. Yâhâ sâp ki kâlep otmâek laŋinŋe bok sâmu yan omoŋ sahakbuap. Yawu otmu omoŋân mannomaiŋe bam gane sâm mâtâp ki ekmâ awawi guwawi otmâ ari hiliwahonomai.” Yawu sâop. Yesuŋe den sâm tiŋ pilâm pilâyekmâ ge misinŋurahop.

#### **Lohimbi kiŋgitŋe orowâkŋe biwiyeŋe Yesuhâlen ki katbi.**

<sup>37</sup>Yesuŋe hânân manop yan kulem topŋe topŋe memu Yura lohimbiŋe yakât topŋe ekŋetâ ki keterakmu yanak yâkâlen biwiyeŋe ki katbi.

<sup>38</sup>Yâkâlen biwiyeŋe ki katbi yakât emet inânŋan poropete âlâ, kutŋe Yesaia sâm, kulemuŋop yakât bulâŋe teteop.

“Kutdâ, gâhât den pat âlepŋe ekyongomunŋe kapi ambolipŋaŋe nânŋâŋetâ ki bonŋe otmap. Otmu gâŋe mâmâŋe otningirâ kulem topŋe topŋe memunŋe ekŋetâ ki keterakmap. Yakât otmâ gâhâlen biwiyeŋaŋeâmâ ki kepeimai.” Yawu kulemuŋop. <sup>39</sup>Anitâhâlen biwiyeŋaŋe ki kepeiwi yakât topŋe teteâkgât Yesaiaŋe den âlâ kulemuŋop ya yuwu tap.

<sup>40</sup>“Lohimbi nombotŋaŋe Anitâhât hâkâŋ otmâ nânŋâm kâkâsuk mansai. Yakât otmâ biwiyeŋe alitmâ hiliwahonŋetgât yâkŋe nânŋân nânŋânyeŋe mem gulip tuhuyinŋimu ki nânŋâŋetâ hâumap. Otmu senyeŋe mem kâtâpgumu ki ekŋetâ keterakmap.” Yawu kulemuŋop.

<sup>41</sup>Yâhâ Yesu âwâŋaŋe âi sâm waŋop ya tuhumi tiŋ pilâm mumuŋambâ yahatmu ekŋetâ âlâ kândâkdâ otbuap ya Yesaiaŋe emet inânŋan ekmâ nânŋâm kulemuŋop.

#### **Miti emetŋahât galem nombotŋaŋe biwiyeŋe Yesuhâlen katbi.**

<sup>42-43</sup>Yawu gârâmâ Yura nengât miti emetŋahât galem nombotŋaŋeâmâ biwiyeŋe Yesuhâlen katbi. Yawu gârâmâ bukulipyenŋe nânŋâyinŋiŋetâ



yahalâkgât lohotŋanâk manbi. Yawu manbi yakât Anitâŋe nâŋgâmu ârandân oap me bia yakât ki nâŋgâwi. Yawu nâŋgâm Parisaioŋe nâŋgâm bâleyingim miti emetŋambâ kewilâyekŋetâ yaehen manmaihât Yesuhâlen biwiyenŋe kepeiwi yakât ki sâwi.

<sup>44-45</sup>Yesuŋe torokatmâ yuwu sâop. “Lohimbi âlâ me âlâŋe nâhâlen biwiyenŋe kepeimai yamâ biwiyenŋe nâhâlen kepeiaim sâm awoŋne hâŋgânnohomu gewan yâkâlen kepeimai. Yâhâ lohimbi âlâ me âlâŋe nâhâlâk nâŋgâmai yamâ nâŋgânihiain sâm awoŋne hâŋgânnohomu gewan yâk nâŋgâwaŋgimai. <sup>46</sup>Yâhâ balam sem laŋinŋe pilâmu lohimbiŋe ekmâ heŋgeŋgumai yakât dopŋeâk nâŋe hohetyenŋan ge manmune nâhât manmannahât laŋinŋenŋe biwiyenŋan pilâmu haŋ sâyŋingimap. Yawu otmâ lohimbi âlâ me âlâŋe omoŋân torokatmâ manmaihât biwiyenŋe nâhâlen kepeim manŋetâ haŋ sâyŋiŋiâkgât gewan.

<sup>47</sup>Nâŋe lohimbi den âiân katyekomâ matŋe yŋiŋiwehât ki gewan. Nâmâ sârereyekomâ manman kârikŋan mem torokatyekbe sâm gewan. Yakât otmâ lohimbi nombotŋenŋe nâhât den nâŋgâŋetâ gemu bet pilâm manmai yamâ den âiân ki katyekomâ matŋe yŋiŋiwom yakât topŋe yuwu. <sup>48</sup>Den ekyongomune nâŋgâŋetâ gemu bet pilâmai den yuŋahâk sâp patoen topyenŋe mem tetemu Anitâŋe matŋe yŋiŋiwuap. <sup>49</sup>Nâŋe den ekyongom gaman yuâmâ nine eŋgatneâk ki ekyongoman. Awoŋnane den yu ekyongowuat sâm hâŋgânnohomu gewan. <sup>50</sup>Yakât topŋe yuwu tap. Awoŋnahât den ekyongom gaman yu lâum mannoma yamâ manman kârikŋan manmâ yâhânoma ya nâŋgâmune bulâŋe otmap. Yakât otmâmâ awoŋnane den yu ekyongowuat sâm nihiop. Yawuâk ekyongoman.” Yesuŋe yawu sâop.

### Yesuŋe hoŋ bawalipŋe yengât kâiyenŋe piriop.

**13** <sup>1</sup>Emet omoŋ otmu haŋ sâwuap yan Tihit tihit hombaŋ tetemu Yesuŋe pilânenekmâ âwâŋahâlen âwurem yâhâwuap yakât nâŋgâop. Yakât otmâ nen wawaenenekmâ manmâ gaop yawuâk torokatmâ manbuap yakât nâŋgâmunŋe keterahâkgât menenekmu emet âlâen menduhuakmâ sot um newin. <sup>2</sup>Otmu bukunenŋe âlâ orowâk um nem tatbin yamâ Simon nanŋe, kutŋe Yurasi sâm, Karioto yan gâtŋe. Yamâ Satanŋe emelâk yâkât biwiŋan kioŋmu Yesu betŋehen kioŋbuap yakât biwiŋe kalop. <sup>3</sup>Yawu gârâmâ Yesu âwâŋenŋe wâtŋe waŋmâ hâŋgângumu ge wuân me wuân otbuapgât dop tatbaŋgiop yakât nâŋgâop. Yawu gârâmâ umatŋe tetewaŋgimu yakât kakŋan âwâŋahâlen âwurem yâhâwuap yakât gurâ nâŋgâm manmanŋe ki alilop. <sup>4</sup>Yawu otmâ nenŋe bukulpnenŋe yengât nâŋgâm hoŋ bayŋingehât Yesuŋe nem tatbin yapâ uk sâm yahatmâ sâŋgum kâlep mânuaŋahop ya tuhum pilâm kereŋ âlâ mem pânjan kepeiop. <sup>5</sup>Yawu otmâ yahatmâ to mem kondoân gâiop. To gâim katmâ nen hoŋ bawalipŋe konok konok kâinenŋe piringiŋiop.



Pirimâmâ kereŋ meningiop. <sup>6</sup>Yawu otmâ, Simon Petoro yâkât kâiŋe piriwaŋgiwe sâŋ otmu yakât Petoroŋe nâŋgâmu umatŋe otmu yuwu sâŋ ekuop. “Kutdâ, girawuhât otmâ kâine piriwe sâŋ oat? Pilâhât naŋgan.”

<sup>7</sup>Sâmu sâop. “Wongât kâihe pirihihian yakât ki naŋgat. Hâmbâi mâne gâmâ topŋe nâŋgârâ keterakbuap.”

<sup>8</sup>Sâmu sâop. “Gâmâ kâine ki piri. Kâmbukŋe, pilâ.”

Sâmu sâop. “Nâŋe kâihe ki piriwom yamâ gâ nâ pilânekmâ gikiâk manbuatgât naŋgan.”

<sup>9</sup>Sâmu sâop. “Bâiŋ, âlepŋe gâŋe pirinekbê sâŋ oat gârâmâ kâine konohâk ki piriwuat. Gâŋe bâtne otmu senne hâmene ya orowâk pirinekbuatgât naŋgan.”

<sup>10</sup>Sâmu sâop. “Yen kerekŋe omoŋânâk piriaksaihât salehâk tai. Yawu gârâmâ mâtâp tâlim takai yakât otmâmâ kâiyeŋe konok pirian. Yawu gârâmâ yen tai yu osetyeŋan gâtŋe âlâmâ salehâk ki mansap.” Yawu sâop. <sup>11</sup>Yurasine ikŋe betŋehen kioŋbuap yakât nâŋgâm sâop.

<sup>12</sup>Otmu kâiyeŋe ya kerehâk pirim pesuk pilâm sâŋgumŋe holaŋmâ kalop ya yâhâpŋe mem mânuaŋahop. Mânuaŋakmâ gewâkŋan ge tatmâ yuwu sâŋ eknongop. “Yiwereŋe kâiyeŋe piriyeksan yukât topŋe nâŋgâŋetâ keterahâkgât yuwu sâŋmune nâŋgâŋet. <sup>13</sup>Yeŋeâmâ “Patonenŋe” me “Kutdânenŋe” sâŋ nohonmai. Nâŋe yengât kunyeŋe manman yakât nohonmai ya nâŋgâŋmune ârândâŋ oap. <sup>14-15</sup>Yawu gârâmâ nâŋe kunyeŋe oan yakât otmâmâ yeŋe hoŋ bawaŋgiakmâ mannomaihât dop kum kâiyeŋe pirian. Yakât otmâ yengu towat tiripyongoan yuwuâk otmâ mannomai. <sup>16</sup>Yakât yuwu sâŋmune nâŋgâŋet. Yeŋe hoŋ banihim mansai. Yakât otmâ kutdâlipne mannomaihât dop ki tap. Yawu gârâmâ nâŋe hoŋ hâŋgânyongomune nâhât tem lâum mannomai. Yawu otŋetâ amutyenŋan manbomgât dop bia. <sup>17</sup>Yakât nâŋgâm sâp yiwereŋe yu hoŋ bayŋgian yakât dopŋeâk hoŋ bawaŋgiaknomai. Yawu otnomai yanâmâ Anitâŋe nâŋgâmu ârândâŋ otmu biwi herone mannomai.

#### **Yesune ikŋe betŋehen Yurasine kioŋbuap yakât sâop.**

<sup>18</sup>Nâmâ biwiyenahât topŋe nâŋgâm tem lâunihim manŋetgât meyekmune mansain. Yawu gârâmâ kerek yengât ki yan. Miti pepaen den âlâ yuwu tap. “Bukune lau konok niat yaŋeâmâ mem purik pilânehop.” Den yawu tap yakât bonŋe teteâkgât yen tai yu osetyeŋan gâtŋe âlâŋe mem bâlenekbuap. <sup>19</sup>Nâŋe sâp yiwereŋe yu den ekyongoan yukât bonŋe tetewe sâŋ oap. Tetemu ekmâ yan Anitâ orop dopnetŋe konohâk oap yakât topŋe ekmâ nâŋgâm heŋgenŋunomai. <sup>20</sup>Yakât yuwu sâŋmune nâŋgâŋet. Lohimbi âlâ me âlâŋe buku otnihimai yaŋe nâ otnihian sâŋ yan awoŋne hâŋgânnohomu gewan yâk otbaŋgimai. Yawu gârâmâ nâŋe yawuâk hâŋgânyongomune ariŋetâ buku otyiŋginomai. Yawu otyiŋginomai yaŋe yen otyiŋgiain sâŋ yan nâ otnihinomai” Yawu sâop.

**Yurasije Yesu betnehen kionjbuapgât sâop**  
(Mataio 26:20-25; Mareko 14:17-21; Luka 22:21-23)

<sup>21</sup> Yesuje yawu sâmbiwiŋe umatŋe otmu yuwu sâop. “Bulânânâk ekyongomune nânġâŋet. Yen tai yu osetyeŋan gâtŋe âlânġe betnehen kionjbuap.” <sup>22</sup> Den sâop yamâ âlâhât sâop ya ki nânġâmune teteop. <sup>23-24</sup> Yâhâ nâ otmu Yesu biwinetŋe hikuakmâ konohâk olopgât nâmâ yâk hâlânġmâ tatban. Yakât otmâmâ Petoroŋe senŋaŋak otmu ândâp katmune halowângen eknohom sâop. “Ya ekum ehâ. Yu âlâhât yap?” Yawu sâop.

<sup>25</sup> Yawu sâmbiwiŋe nânġâm nânġe Yesu yuwu sâmbiwiŋe. “Bâe, gâ yat yamâ âlâhât yat? Ya sârâ nânġâwe.” <sup>26</sup> Âikumune sâop. “Sot mem motokmâ waŋmune nembuap yakât yan.” Yawu sâmbiwiŋe sot mem motokmâ Yurasi waŋmu miop. <sup>27</sup> Miop yanâk Satanŋe biwiŋan kionjop. Biwiŋan kionjmu yaŋak Yesuje nânġâm yuwu sâmbiwiŋe ekuop. “Gâ yiwereŋe yu me ya otbehât naŋgat. Ya âlepŋe otbuat.” Yawu sâop. <sup>28</sup> Yesuje Yurasi yawu sâmbiwiŋe ekuop yakât topŋe bukuliŋŋe ki nânġâwi. <sup>29</sup> Yâhâ Yurasije nengât tewetsenŋe galemġum manminiop. Yakât otmâ bukuliŋŋe nombotŋe yuwu nânġâwi. “Yurasije tewetsenŋe mem ari sot puluhuâkgât Yesuje ekuap,” yawu nânġâwi. Yâhâ nombotŋeâmâ “Yurasije tewetsenŋe sâlikum nombotŋe hârem lok umburuk mansai ya yingâkgât ekuap,” yawu nânġâwi. <sup>30</sup> Yesuje sot mem motokmâ waŋmu miop yanâk Yurasije yahatmâ pilânenekmâ ariop.

**Biwinenŋe kepeiakmâ buku oraŋgim mannom.**

<sup>31-32</sup> Yurasi gem arimu Yesuje yuwu sâmbiwiŋe eknogop. “Anitânġe nâ lok bulânġe hânġânnohomu gewan yakât topŋe lohimbi kerekŋe nânġâm heŋġenġetgât kulem âlâ nâhâlen tetewuap. Tetemu lohimbi dondânġe ekmâ nânġânġetâ âlâ kândâkdâ otmu mepaenekomai. Yâhâ nânġe Anitâhât tem lâumune kulem tetemu ekŋetâ ewe membe otmu yaŋak Anitâ mepaenomai.

<sup>33</sup> Bukuliŋne, emelâk Parisaio ekyongowan ya yawuâk ekyongomune nânġânġet. Sâp kâlep ki otmuâk pilâyekmâ ariwom. Yawu gârâmâ ariwom yan gurâ yeŋe arinomaihât dop âlâ ki tap. Yakât otmâ pâinnekomai yamâ ki nekomai. <sup>34</sup> Yawuhât den âlâ yuwu ekyongomune lâum mannomai. Nânġe biwinenŋe kepeiyekmâ mansan yakât dopŋeâk yengu biwiŋenŋe kepeiakmâ buku oraŋgim mannomai. <sup>35</sup> Yawu oraŋgim mannomai yanâmâ yeŋe nâhât hoŋ banihim mansai yakât yen yekmâ nânġâyinġim heŋġenġunomai.” Yawu sâop.

**Petoroŋe Yesu betguwuap yakât Yesuje sâop.**  
(Mataio 26:31-35; Mareko 14:27-31; Luka 22:31-34)

<sup>36</sup> Yesuje yawu sâmbiwiŋe Petoroŋe yuwu sâmbiwiŋe. “Kutdâ, gâ wosaken ariuwat?”

Sâmu sâop. “Yen pilâyekmâ arimune watneknomaihât dop ki tap. Yawu gârâmâ hâmbâi sâp âlâenâmâ nâhâlen torokatnomai.” Yawu sâop.

<sup>37</sup>Sâmu sâop. “Kutdâ, wongât gâ orop ki arinom yat? Yâhâ kasalipganje gohojêtâ mumbuat yamâ nâ orowâk notgonomaihât nanġan.”

<sup>38</sup>Sâmu sâop. “Bukune, yuwu sâmune nânġâ. Gânġe nâ betnohom topne kurihiwuât. Betnohorâ kalimbuġe otmu gokorok isewuap.” Yawu sâop.

**Yesuġe himbimân kawenenġe heġġeġuwuap yakât sâop.**

**14** <sup>1</sup>Yesuġe torokatmâ yuwu sâm eknongop. “Nânġe pilâyekmâ ariwom yakât ki nânġâm ketet otnomai. Yeġe Anitâ tihit tihit amboġahâlen biwiyeġaġe kepeim manmai yakât dopġeâk nâhâlen gurâ biwiyeġaġe kepeim mannomai. <sup>2</sup>Awoġe tatmap yan emet biwiġe dondâ tap. Yawu ki tap mâne, nânġe emelâk yakât sâm tetem ekyongombâm. Nâ in ki ariwom. Yeġġât kawe memune yan ari tatnomaihât ariwom. <sup>3</sup>Ari kaweyeġe heġġeġum yanâmâ âwurem taka meyekmune nâ orowâk ari mannom. <sup>4</sup>Yâhâ nânġe Anitâhât tem lâum âi sâm nihiop ya tuhum metem âwurem yâhâwomġât mâtâp ya emelâk ekyongowan.”

**Yesuhâlen biwinenġaġe kepeinom otmuâmâ Anitâhâlen yâhânôm.**

<sup>5</sup>Yawu sâmu bukunenġe âlâ, kutġe Toma sâm, yâkġe yuwu sâm âikuop. “Kutdâ, gâ wosaken ariwuât ya ki nanġain. Yakât otmâmâ nengu mâtâp girawu ya watmâ gâhâlen takanom?”

<sup>6</sup>Sâmu sâop. “Nâ ninak Anitâhâlen arinomai yakât mâtâp oan. Otmu Bulânġe Amboġeâmâ nâ mansan. Yakât otmâ lohimbi âlâ me âlâ Anitâhât den ekyongomune nânġâġetâ bulânġe otmu nâhâlen torokatmâ mannomai yaġe manman kârikġan mannomai. <sup>7</sup>Yeġe nâhât topne nânġâm metewi mâne Awoġnahât topġe emelâk nânġâmbâi. Yawu gârâmâ sâp yupâek nâ nekmâ nânġânomai yamâ Awoġnahât topġe nânġâm heġġeġunomai.” Yawu sâop.

<sup>8</sup>Yawu sâmu Pilipġe sâop. “Kutdâ, awoġnenġe tiripnongorâ eknehât nanġain. Ekmunġe biwinenġe huruġ sâwuap.”

<sup>9</sup>Sâmu sâop. “Pilip, yenâmâ nâ orop sâp kâlep manmâ gain. Yakât otmâ girawuhât otmâ nâhât topne ki nanġat? Anitâ orop dopnetġe konohâk oap. Yakât otmâ lok âlâ me âlânġe nâhât topne nanġap yamâ Awoġnahât topġe gurâ nanġap. Topnetġe yawu tapġât wongât “awoġnenġe tiripnongorâ ekne” sâm eknohoat? <sup>10</sup>Nâmâ Awoġ orop biwi nânġân nânġânnetġe hikuakmâ dop konohâk otmu tatmait yakât topġe nanġat.” Yawu sâm ekum yuwu sâm eknongop. “Nânġe den ekyongoman yuâmâ nine eġgatneâk me ninahâlâk otmâ ki sâman. Awoġ orop biwi nânġân nânġânnetġe konohâk otmâ tatmait. Yakât otmâ yâkġe mâmânġe otnihimu yâkât wâtġan kinmâ kulem topġe topġe mem gaman. <sup>11</sup>Yawu gârâmâ Awoġ orop biwi nânġân nânġânnetġe hikuakmâ konohâk tatmait

ya nângânetâ bulâŋe olâkgât nanŋan. Ya nângânetâ ki bulâŋe otbuap otmuâmâ kulem topŋe topŋe mem gamune ekmai yakât nângânomai yanâmâ netgât nângânetâ bulâŋe otbuapgât nanŋan. <sup>12</sup>Bulânjanâk ekyongomune nângânet. Awoŋnaŋe mâmâŋe otnihimu yâkât wâtŋan kinmâ âi memune bulâŋe tetemap. Yakât otmâ Awoŋnahâlen âwurem yâhâwom yanâmâ âi bulâŋe pato tetemu eknomai. Dop yawuâk lohimbi âlâ me âlâŋe nâhâlen biwiyenâŋe kepeim manŋetâ mâmâŋe otyiŋgiwom. Yawu otyiŋgimune nâhât wâtŋan kinmâ âi meŋetâ bulâŋe tetewuap. <sup>13</sup>Awoŋnahâlen arimune yan yeŋe biwiyenâŋe nâhâlen kepeim yu me yakât ulitnohomai yamâ âlepŋe nângâyîŋgiwom. Nângâyîŋgimune bulâŋe tetemu lohimbîŋe ekmâ Awoŋne mepaenomai. <sup>14</sup>Yakât yâhâpŋe sâmunne nângâm heŋŋenŋuŋet. Yeŋe nâhâlen biwiyenâŋe kepeim yu me yakât ulitnohomai yamâ âlepŋe nângâyîŋgiwom.

**Wâtgât mâmâŋahât Heak gewuap yakât Yesuŋe sâop.**

<sup>15</sup>Yeŋe nâhâlen biwiyenâŋe kepeim mannomai yakât bonŋe yamâ nâhât tem lâum mannomai. <sup>16</sup>Yawu manŋetâ nâŋe Awoŋne ulitgumune yâkŋe ikŋe Wâtgât mâmâŋahât Heak hâŋgângumu ge mâmâŋe otyiŋgimu yâkât wâtŋan mannomai. <sup>17</sup>Yâhâ yeŋe yâkât wâtŋan mansai. Yakât otmâ yeŋe yâkât topŋe nanŋai. Yâhâ hâmbâi yâkŋe biwiyenâŋe ge mâmâŋe otyiŋgiwuap. Lohimbi biwiyenâŋe pâlâmŋe otmâ belâŋen mansaiŋe yâkât topŋe ki nanŋai. Yakât otmâmâ ya yeŋgâlen ki ge mâmâŋe otyiŋgiwuap.

<sup>18</sup>Nâ yiwereŋe pilâyekmâ ariwomai. Yâhâ yen mandu yawu otmâ manmaiŋe nâŋe âwurem gewom. <sup>19</sup>Yâhâ pilâyekmâ yâhâwom yakât kakŋan lohimbi biwiyenâŋe pâlâmŋe otmâ belâŋen manmaiŋe âlâkuâk ki neknomai. Yawu gârâmâ yenâmâ âlâkuâk neknomai. Otmu nâŋe mumuŋambâ yahatmâ manman kârikŋan manmâ yâhâwom. Yakât otmâ yeŋe gurâ mumuŋambâ yahatmâ nâhâlen torokatŋetâ orowâk manmâ yâhânom. <sup>20</sup>Yâhâ mumuŋambâ yahatbom yanâmâ nâ Awoŋ orop biwi nângân nângânnetŋe hikuakmâ konohâk tatmait yakât topŋe yeŋe nângâm heŋŋenŋunomai. Otmu yen orop biwi nângân nângânneŋe hikuakmâ konohâk mansain ya gurâ nângânetâ keterakbuap.

<sup>21</sup>Lohimbi âlâ me âlâŋe nâhâlen biwiyenâŋe kepeim manmai yamâ nâhât den nângâm tem lâunihimai. Otmu nâhâlen biwiyenâŋe kepeim mannomai yamâ Awoŋnaŋe wawaeyekmâ tihityeŋe otbuap. Otmu yeŋe nâ orop konohâk otŋetâ yanâmâ nâŋe biwiyenâŋe gemune topne nângâm heŋŋenŋunomai.” Yawu sâop.

<sup>22</sup>Yawu sâmu Yurasi Simon nanŋe yâkât nambenâŋe yuwu sâm ekuop. “Kutdâ, sârâ nângâwe. Biwinenŋe gâ orop kepeiakmâ konohâk otmu yan biwinenŋan gerâ topge nângâm heŋŋenŋunom. Yâhâ wongât otmâ lohimbi belâŋen mansai ya yeŋgât biwiyenâŋe ki gerâ topge nângânomai?” Yawu sâop.

<sup>23</sup>Sâmu sâop. “Lohimbi âlâ me âlâŋe nâhâlen biwi nâŋgân nâŋgânyenâŋe kepeim manmaiŋe nâhât denne nâŋgâm lâumai. Lohimbi yawuya Awoŋnaŋe wawaeyekmâ tihityeŋe otmu net orowâk manmâ yâhânomai. <sup>24</sup>Yâhâ lohimbi âlâ me âlâŋe biwi nâŋgân nâŋgânyenâŋe nâhâlen ki kepeim manmaiŋe nâhât den ki lâumai. Yâhâ nâŋe den kâsikum yingim gaman yuâmâ nine engatneâk otmâ ki kâsikum yingiman. Awoŋnaŋe sâm nihiop ya kâsikum yingiman. <sup>25</sup>Yâhâ sâp yiwereŋe yu pilâyekmâ yâhâwom yakât topŋambâek ekyongoan. <sup>26</sup>Yawu gârâmâ pilâyekmâ yâhâmune yakât kakŋan Awoŋnaŋe ikŋe Wâtgât mâmâŋahât Heak hâŋgângumu ge nâhât âi torokatmâ tâtâem mâmâŋe otyingimu nâŋe den kâsikum yingiminiwan ya bunewâk nâŋgâŋetâ keterak yingiwuap.

<sup>27</sup>Nâ pilâyekmâ yâhâwoman. Biwiyeŋe itoŋ galaŋ otmapgât biwi sânduhân katyeksan. Otmu lohimbi belângen manmaiŋe yen biwi sânduhân katyekne sâm otnomai yamâ imbiâk otnomai. Yâkŋe otnomai yawu ki otbom. Nâŋeâmâ yen orowâk manmâ biwi sânduhân katyekmune yanâk manmâ yâhânomai. Yakât nâŋgâm ki gorâyingîâk. <sup>28</sup>Emelâk yuwu sâm ekyongoan. “Nâ pilâyekmâ yâhâwom. Hâmbâi mâne âwurem gewom.” Ya nanŋai. Yâhâ yeŋe nâhâlen biwiyeŋe kepeim mansai mâne nâŋe Awoŋnahât sâtgât âi tuhumm pesuk pilâm yâkâlen âwurem yâhâwom yakât nâŋgâm heroŋe nâŋgâmbâi. <sup>29</sup>Nâŋe yiwereŋe den ekyongoan yukât bulâŋe tetemu eknomai. Tetemu ekmâ yan topŋe nâŋgâm heŋgeŋgunomai. <sup>30</sup>Yiwereŋe manman bâleŋahât amboŋe hoŋ bawalipŋe hâŋgânyongomu taka meneknomai. Yakât otmâ nâŋe yen orop den kâlep huhunomgât sâp bia. Yamâ benŋe manman bâleŋahât amboŋe yakât amutgen ki mansan. <sup>31</sup>Yawu gârâmâ nâŋe Awoŋnahâlen biwinâŋe kepeim yâkât amutgen manman ya lohimbi kerekŋe nâŋgâŋetgât Awoŋnahât tem lâuwangiman. Lâuwangim umatŋe tetenihiwuap yu ki tetenihiâk sâm ki ulitguwom. Yakât otmâmâ yahatŋetâ arine.” Yawu sâop.

### Yesuŋe wain tâkŋan hâum ikŋahât topŋe sâop.

**15** <sup>1</sup>Yesu ikŋan hâum yuwu sâm eknongop. “Nâ wain tâkŋe yan hâum ninahât topne sâm ekyongomune nâŋgâŋet. Nâmâ wain topŋe yawuya. Yâhâ yenâmâ wain kele awatŋe yawuya. Yâhâ Awoŋneâmâ wain kalam yakât amboŋe yawuya. Ikŋahâk wain bulâŋe kiŋgitŋe orowâk kinâkgât hârâtŋe kum heŋgeŋgumap. <sup>2</sup>Yâhâ awatŋe âlâhât bonŋe ki kinmap yamâ Awoŋnaŋe hârem panmu hâlâlâŋ sâmap. Yâhâ awatŋahât bonŋe kinmap yamâ bonŋe kiŋgitŋe orowâk kinâkgât hârâtŋe kum heŋgeŋgumap.

<sup>3</sup>Yakât dopŋeâk nâŋe den kâsikum yingim gaman ya nâŋgâŋetâ bulâŋe otmu biwiyeŋe nâhâlen torokatmai. <sup>4</sup>Nâhâlen torokatŋetâ

biwinnenje hikuakmâ konohâk otmu nâhât wâtнан manmâ yâhânomai. Yakât torokatmâ hâum sâwe. Wain awatņe pak sâm gewuap otmuâmâ yan bonņe âlâ ki kinbuap. Yakât dopņeâk yeņe nâhâlembâ dâiakmâ mannomai yanâmâ bonņe yeņgâlen ki tetewuap.

<sup>5</sup>Nâņeâmâ wain topņe yakât dop oan. Yâhâ yeņeâmâ wain kele awatņe yakât dop oai. Gârâmâ yeņe nâhâlen torokatņetâ orowâk mannom yamâ yeņgâlen bonņe âilonņo tetewuap. Yâhâ yeņe nâ pilâneknomai yamâ yeņgâlen bonņe âlâ ki tetewuap. <sup>6</sup>Yâhâ wain awatņe âlâņe bonņe ki tetewuap yamâ hârem panmu hâlâlâņ sâwuap. Hâlâlâņ sâmu kâlâwân uņetâ sewuap. Yakât dopņeâk lohimbî âlâ me âlâņe pilâneknomai yamâ Awoņņe panyekmu hem nâpumân ge kionņetâ kâlâņe seyekbuap. <sup>7</sup>Yâhâ yeņe nâhât den lâum manņetâ biwinnenņe hikuakmâ konohâk otbuap yan yeņe yu me yakât ulitnohonomai yamâ âlepņe nâņgâyiņiwom. <sup>8</sup>Yeņe nâ orop manmâ tem lâunihinomai yanâmâ yakât bonņe manman âilonņo yeņgâlen tetewuap. Yeņgât manman tetemu lohimbîņe yekmâ nâhât hoņ bawalipne sâm Awoņņe mepaenomai. <sup>9</sup>Yâhâ Awoņņe wawaenekmâ tihitne otmâ gap yakât dopņeâk nâku yawuâk wawaeyekmâ tihityeņe otmâ gan. Yakât otmâmâ ki betnohonomai hât naņgan. <sup>10</sup>Nâņe Awoņnahât tem lâum manmune yaņak yâkņe biwiņe kepeinekâm gamap. Yakât dopņeâk yeņe nâhât tem lâum mannomai yanâmâ nâku yawuâk biwiņe kepeiyekmâ yâhâwom.

<sup>11</sup>Yeņe nâhât den nâņgâm biwiyeņan katmâ heroņe kakņan manņetgât nâņe ninan hâum ekyongoan. Yakât otmâ tem lâunihim mannomai. Yanâmâ yeņgât nâņgâm nâku yawuâk biwi hero nâņgâyiņiwom. <sup>12</sup>Yâhâ den âlâ yuwu sâm ekyongomune lâum manņetgât naņgan. Nâ orop biwinnenņe kepeiakmâ konohâk otmu buku oraņgiain yakât dopņeâk yengu yawuâk biwiyeņe kepeiakmâ konohâk otmu buku oraņgim mannomai. <sup>13</sup>Yâhâ lok âlâ me âlâņe buku âlâhât tep âlep nâņgâwaņgim sârereņetâ yakât yongoņetâ munomai yuņe buku orotgât mâtâp âlâlâ kerek wangiap. <sup>14</sup>Otmu yeņe nâhât tem lâum mannomai yamâ nâhât bukulipne yawu mannomai.

<sup>15</sup>Yâhâ lok kunņe âlâņe ikņe biwiņan den tatmap ya hoņ bawalipņe ki ekyongomap. Yawu gârâmâ Awoņņe den eknohomap yamâ nâņe kerehâk ekyongom gan. Yawu otman yakât nâņgâm hoņ bawalipne ki sâyiņiwom. Yamâ bukulipneâk sâmune ârândâņ otbuap. <sup>16</sup>Yawu gârâmâ yeņe ki menekbi. Nâņe yen meyekmâ âi sâm yiņgim hâņgânyongomune arinomai. Ari lohimbî nâhât den pat âlepņe ekyongoņetâ nâņgâņetâ bulâņe otmu manman kârikņan mannomai. Yakât otmâ yeņe wuân me wongât nâņgâm nâhât wâtнан kinmâ Awoņņe ulitgunomai yamâ âlepņe nâņgâyiņiwuap. <sup>17</sup>Yakât den emelâk yan ya yâhâpņe sâmune nâņgâņet. Yeņe biwiyeņe kepeiakmâ konohâk otmâ buku oraņgim mannomai.

**Lohimbî belângen manmaiņe Yesuhât komot yeņgât hâkâņ otmai.**

<sup>18</sup>Lohimbî belângen manmaiņe kasa otyiņginomai yanâmâ ki pârâk pilânomai. Kândikum emelâk nâ kasa otnihiwi yawuâk yeņgât kasa

otyinginomai. <sup>19</sup>Yâhâ orotmeme bâleŋe otmâ mansai ya yeŋgâlen torokatmâ yawuâk otmâ mâne buku otyiŋgimbâi. Yawu gârâmâ yenâmâ emelâk nâŋe nine pat kuyiŋgim meyekmune nâhâlen torokatbi. Yawu torokatbi yakât otmâ lohimbi yaŋe yeŋgât hâkâŋ otmâ mem ge katyekne sâm otmâ.

<sup>20</sup>Nâŋe emelâk den yuwu ekyongowan ya biwiyenjan katmâ nâŋgânomai. Lohimbiŋe lok kunŋe otmu yakât hoŋ bawalipŋe yamâ kapam dop konohâk yongom hâhiwin yiŋginomai. Yawu gârâmâ nâ mem âlâlâ tuhunekmâ hâhiwin nihim mansai yakât dopŋeâk yen yawuâk mem âlâlâ tuhuyeknomai. Yâhâ lohimbi nombotŋaŋe nâ buku otnihim denne nâŋgâmai mâne yen gurâ yawuâk lohimbi nombotŋaŋe buku otyiŋgim denyenŋe nâŋgâmbâi. <sup>21</sup>Lohimbi belâŋen mansaiŋe Awoŋnaŋe hâŋgânnohomu gewan yâkât topŋe ki naŋgai. Topŋe ki naŋgai yakât otmâ yen gurâ kasa otyiŋgim mem âlâlâ tuhuyeknomai. <sup>22</sup>Yawu gârâmâ nâŋe hânân yu ki ge Awoŋnahât topŋe ekyongowan mâne yâkŋe betnihimbâi yakât tosa ki membâi. Yamâ tosa miai yakât âlâ me âlâhâlen gâitmâ tâwâyeknomaihât dop âlâ ki otbuap. <sup>23</sup>Yawu gârâmâ lohimbi âlâ me âlâŋe nâhât hâkâŋ otmâ betnihim manmai yaŋe nâ otnihaiŋ sâm Awoŋne otbaŋgimai. <sup>24</sup>Yakât torokatmâ sâwe. Nâŋe hohetyenjan manmâ kulem topŋe topŋe ki orotŋe ya mewan mâne ki ekŋetâ tâŋât otmu tosa membâi. Yawu gârâmâ kulem meman ya ekmai yamâ Awoŋnâit betnitgim mansai. <sup>25</sup>Yawu gârâmâ yeŋgât miti pepaen den âlâ tap yakât bonŋe teteâkgât yawu oai. Den ya yuwu tap. “Lokŋe imbiâk kasa otnihai.” Den yawu tap.

<sup>26</sup>Nâmâ hâmbâi Awoŋne ekumune ikŋe Wâtgât mâmâŋahât Heak hâŋgângumu gewuap. Ge lohimbi biwiyenjan kioŋmu nâhât den pat âlepŋe nâŋgâŋetâ bulâŋe otbuap. <sup>27</sup>Otmu yenâmâ nâ orowâk manmâ âi topŋe katmâ gain yakât mem hewewenŋ tuhuyekmu nâhât den pat âlepŋe sâm haŋ tuhunomai.”

**16** <sup>1</sup>Yesuŋe den âlâ yuwu sâm eknongop. “Lohimbi belâŋen manmaiŋe mem âlâlâ tuhuyekmâ hâhiwin yiŋginomai yanâmâ ekmâ ki pârâk pilâm betnihim biwiyenŋe âlâhâlen katmaiŋhât den yu ekyongoan. <sup>2</sup>Yakât torokatmâ sâwe. Lohimbiŋe yeŋgât hâkâŋ otmâ miti emetŋambâ kewilâyekŋetâ ge yaehen mannomai. Yâhâ hâmbâi mâne belâŋen mannomai yaŋe Anitâhât sâtgât oain sâm yongonŋetâ munomai. <sup>3</sup>Yamâ Awoŋ orop netgât topnetŋe ki nâŋgâm heŋgeŋgum mem âlâlâ tuhuyeknomai. <sup>4</sup>Yâhâ emelâk yakât ki ekyongowan. Yawu gârâmâ pilâyekmâ ariwoman yakât emet inânŋan den yu ekyongoan. Arimune yenjiâk tatŋetâ mem âlâlâ tuhuyeknomai yanâmâ den ekyongoan yu nâŋgâm mannomai.

#### Wâtgât mâmâŋahât Heakgât nep

<sup>5</sup>Nâmâ hâŋgânnohomu gewan yâkâlen purik sâm âwurem yâhâwom. Yawu gârâmâ yeŋgâlen gâtŋe âlâ me âlâŋe nâhât topŋe girawuhât



yâhâwuât sâam ki âinohomai. <sup>6</sup>Nâñe katyekmâ yâhâwom sâamune nâñgâñetâ biwiyeñe umatñe oap.

<sup>7</sup>Bukulipne, bulâñanâk sâamune nâñgâñet. Nâñe ki pilâyekmâ âwurem yâhâwom mâneâmâ Anitâhât Wâtgât mâmâñahât Heakñe ki ge mâmâñe otyiñgiwuap. Yawu gârâmâ pilâyekmâ âwurem yâhâwom yanâmâ hâñgâñgumune ge mâmâñe otyiñgim biwi sânduhân katyekbuap. <sup>8-9</sup>Gem yan lohimbine nâhâlen biwiyeñeñe ki kepeim tosa otmai ya eñgatyeyan gemu nâñgâñetâ keterakiñgiwuap. <sup>10</sup>Otmu Anitâñe lohimbini yekmu ârândân olâkgât âi sâam nihiop ya tuhum tiñ pilâm katyekmâ âwurem yâhâwom yakât topñe gurâ nâñgâm heñgeñgunomai. <sup>11</sup>Otmu Anitâñe manman bâleñahât amboñe sâam hârewañgim mem ge kalop yakât nâñgâñetâ keterakbuap. Yawu nâñgâm heñgeñgum nâhâlen biwiyeñeñe kepeim mannomai.

<sup>12</sup>Nâñe sâp yiwereñe den umatñe topñe topñe tap ya kâsikumu yinçimbâm. Yamâ yiwereñe yakât topñe nâñgânomaihât dop bia. <sup>13</sup>Hâmbâi mâne Anitâñe ikñe Wâtgât mâmâñahât Heak hâñgâñgumu ge den bulâñe ekyongomu nâñgânomai. Yawu otmu yâkât topñe nâñgâm heñgeñgunomai. Yâkñeâmâ ikñe eñgatñeâk ki watmâ ekyongowuap. Anitâhât den ya konohâk ekyongom mâmâñe otyiñgimu yu me ya tetewuap ya ekmâ topñe nâñgâm heñgeñgunomai. <sup>14</sup>Yâhâ lohimbini nine pat mannomai ya yeñgât biwi nâñgân nâñgânyeñe mem kusânyeñgimu nâhât topne nâñgâñetâ keterakiñgiwuap. Nâñgâñetâ keterakiñgimu nâhât nâñgâñetâ yahatmu mepaeneknomai. <sup>15</sup>Otmu den bulâñe Awonñahât nâñgân nâñgânñan tap ya eknohomap. Yawu eknohomu yañak nâku yawuâk Wâtgât mâmâñahât Heak ekumune topñe sâam tetem ekyongowuap.

### **Yesuhât hoñ bawalipñeñe eñgat hako sâp kâlep ki nâñgâwi.**

<sup>16</sup>Nâ yen orop sâp kâlep ki mannom. Pilâyekmâ yâhâwom. Manmâ sâp kâlep ki otmuâk âwurem gewom.” <sup>17</sup>Yesuñe yawu sâam eknongomu nâñgâm pâpñguwin. Nâñgâm pâpñgum nenñahâk yuwu sâam alahu gulahu otbin. “Yamâ girawuhât yawu yap. “Nâ pilâyekmâ Awonñahâlen yâhâmune ki neknomai.” Otmu “pilâyekbom ya kâlep ki otmuâk âwurem gemune neknomai.” yawu yap. <sup>18</sup>Yawu yap yamâ topñe girawuhât otmâ yap?” sâam yakât topñe pâpñgum alahu gulahu otbin.

<sup>19</sup>Yawu sâam alahu gulahu otmâ yakât Yesu âikune sâam otbin. Yawu nâñgâmunñe biwinenñe ekmâmâ yuwu sâam eknongop. “ “Nâñe pilâyekmâ yâhâwom gârâmâ sâp kâlep ki otmuâk âwurem gewom,” yawu ekyongomune nâñgâm biwi yâhâp otmâ topñahât âinohone sâam oai. <sup>20</sup>Yakât yuwu sâam ekyongomune nâñgâñet. Nâñe pilâyekmâ ariwom yan nâhât isem eñgat hako nâñgânomai. Eñgat hako nâñgânomai yanâmâ lohimbini belângen mansaiñe kândâtyeñe kuwiknomai. Otmu yeñgât biwi nâñgân nâñgânyeñe umatñe

otbuap yamâ sâp kâlep ki otbuap. Yakât kakŋanâmâ âlâkuâk heronje pato nâŋgânômai. <sup>21</sup>Den yukât topŋe nâŋgâŋetâ keterahâkgât den âlâen hâum sâmunne nâŋgâŋet. Imbilipnenŋe naom mene sâm hâliliakmâ tatmâ memai. Otmu naom ya kionmu yan hâkyeŋe sânduk sâmu heronje pato nâŋgâm yakât kakŋan hâhiwin nâŋgâmai ya nelâmyongomap. <sup>22</sup>Yakât dopŋeâk nâŋe pilâyekmâ arimune eŋgat hako nâŋgânihinômai. Otmu sâp kâlep ki otmuâk âwurem gemune nekmâ tepyeŋe sânduk sâmu heronje pato nâŋgânômai. Heronje nâŋgâŋetâ lok âlâ me âlâŋe yâhâpŋe eŋgat hakoân ki katyeknomai. <sup>23</sup>Yâhâ sâp yan nine topne ki nâŋgâm pâpŋunômai. Yakât otmâ âi pâi ki tuhuneknomai. Den bulâŋanâk sâmunne nâŋgâŋet. Yeŋe biwiyenŋe nâhâlen kepeim wuân me wongât nâŋgâm awoŋne ulitgunômai yamâ âlepŋe nâŋgâyinŋiwuap. <sup>24</sup>Yamâ emelâk âi topŋe katbin yapâek yeŋe wuân me wuângât awoŋne ki ulitgum gaŋetâ yu oap. Yâhâ sâp yiwereŋe yupâek âlepŋe nâhâlen biwiyenŋe kepeim awoŋne ulitgum manŋetâ nâŋgâyinŋimu heronje kakŋan manmâ yâhânômai.

<sup>25</sup>Nâŋe yu me yakât den âlâen hâum ekyongoman. Gâmâlâhâmâ awoŋnahât topŋe ya nâŋgâŋetâ keterakbuapgât tâŋ tâŋâk ekyongowom. <sup>26</sup>Sâp yanâmâ nâhâlen biwiyenŋe kepeim awoŋne tâŋ tâŋâk ulitgunômai. Yakât otmâmâ nâŋe yeŋgât kaweyenŋan kinmâ hilâm ârândân ki ulitguwom. <sup>27</sup>Nâmâ âi topŋe ki katmâek awoŋne orop embânâmbâek tatmâ gam yanak pilâm hânân yuân gewan ya nâŋgâŋetâ bulâŋe otmu biwiyenŋe nâhâlen kepeim mansai. Yawu mansai yakât Awoŋnâŋe wawaeyekmâ tihityeŋe otmap. <sup>28</sup>Bulâŋanâk nâ Awoŋnahâlembâ gewan. Yakât otmâ âi tuhumm pesuk pilâm âwurem yâhâwe sâm oan.” Yawu sâop.

<sup>29</sup>Yesuŋe yawu sâmu yuwu sâm ekuwin. “Yiwereŋeâk eksain. Gâŋe den tâŋ tâŋâk eknongorâ yakât topŋe tetemu nâŋgâmunŋe âlepŋe oap. <sup>30</sup>Gâŋe biwinnenŋe kerek ekmâ nâŋgâmat. Yawu gârâmâ biwinnenŋan tap yakât ki hâum pâpŋumat. Yakât otmâ Anitâŋe hâŋgâŋohomu ge mansat yakât nâŋgâmunŋe bulâŋe oap.” Yawu sâwin.

<sup>31</sup>Sâmunŋe sâop. “Âlepŋe nâhât topne yiwereŋe nâŋgâm biwiyenŋe nâhâlen tiŋâk kepeim mansai. <sup>32</sup>Yawu gârâmâ sâp kâlep ki otmuâk kiŋgityenŋahât otmâ pilânekemâ tiok taok otmâ âlâhu kapiŋan kapiŋan arinômai. Ariŋetâ nâmâ niniâk ki tatbom. Awoŋne orowâk tatdom. <sup>33</sup>Yawu gârâmâ yuwu sâmunne nâŋgâŋet. Yeŋe nâhâlen torokatŋetâ biwi nâŋgân nâŋgânnenŋe kepeiakmâ konohâk otmu biwi sânduhân mannomaihât den yu ekyongoan. Yeŋe yawu manŋetâ lohimbî belâŋen manmaiŋe mem âlâlâ tuhuyeknomai yanâmâ ki lohotŋe otnômai. Yamâ nâŋe emelâk manman bâleŋahât amboŋe mem ge katmâ kunyeŋe pato mansan ya nâŋgâm mannomai.”

**Yesuŋe hoŋ bawalipŋe yeŋgât nâŋgâm Anitâ ulitguop.**

**17** <sup>1</sup>Yesuŋe den yawu sâm eknongom senŋe pak sâm himbimân ekmâ âwâŋe yuwu sâm ekuop. “Awoŋ, lohimbîŋe nekŋetâ

yahatmu mepaeneknomaihât sâp tâlâhuap. Yawu gârâmâ gâŋe mâmâŋe otnihirâ tem lâuhihim mansan. Yakât otmâ lohimbi kerek wawaeyekmâ tihityeŋe otbe sâm oat yakât bulâŋe ekmâ mepaehekmâ mannomai.

<sup>2</sup>Emelâk “Lohimbi kerek yengât kunyeŋe otmâ manbuat” sâm âi nihion. Yakât otmâ emelâk lohimbi yengât manman kârikŋahât pat kuyiŋgion yamâ biwiyeŋe mem heweweŋ tuhurâ nâhâlen torokatnomai yamâ yakât bulâŋe yingiwom. <sup>3</sup>Yâhâ manman kârikŋahât topŋe yuwu. Gâ konok Anitâ bulâŋe tatmâ gamat. Otmu gâŋe tihityeŋe otbe sâm nâ hâŋgânnohorâ gewan. Ya lohimbiŋe nâŋgâŋetâ bulâŋe otmu netgâlen biwiyenŋe kepeim mannomai yamâ manman kârikŋe yingimune menomai. <sup>4</sup>Gâŋe âi sâm nihim hâŋgânnohorâ gewan ya tuhumm pesuk pilâwom yanâmâ lohimbi kiŋgitŋe orowâkŋe ekmâ mepaeheknomai. <sup>5</sup>Awoŋ, embâŋân hân himbim ki kândikyotgon yan biwinetŋe konohâk otmâ orowâk tatmâ gawit. Yawu gârâmâ himbim pilâm hân yuân ge mansan. Yakât otmâ sâp yiwereŋe yuâmâ gâhâlen âwurem gamune emelâk orowâk tatmâ gawit yawuâk orowâk tatmâ yâhârom.

<sup>6</sup>Awoŋ, aŋgoân lok kâiân konok yu lok bâleŋe yengâlembâ meyehon. Meyekdâ nâhâlen torokatŋetâ gâhât topge sâm tetem ekyongoman. Ekyongom gamune yan nâhât tem lâum manmai. <sup>7-8</sup>Gâŋe den eknohon yamâ kerehâk sâm tetem ekyongomune nâŋgâŋetâ bulâŋe otmap. Otmu gâŋe hâŋgânnohorâ gewan ya gurâ yawuâk nâŋgâŋetâ bulâŋe otmap.

<sup>9-10</sup>Yawu nâŋgâm nâhât âi torokatmâ tuhumm tiŋ pilâm net orop mannongât mâmâŋe otyiŋgihât naŋgan. Mâmâŋe otyiŋgirâ nâhât wâtnan kinmâ den pat âlepeŋe ekyongoŋetâ lohimbi kiŋgitŋe orowâkŋe nâŋgâm mepaenekmâ mannomai. Yawu otmâ ya yengât nâŋgâm ekgohoan. Yâhâ lohimbi belângen manmai ya yengât ki ekgohoan. <sup>11</sup>O, Anitâ Awoŋne. Topge ikŋiâk tap. Tat tatge âlâ kândâkdâ tatmâ gaonŋak tatmâ gamat. Otmu tatmâ yâhâwuat. Yiwereŋeâmâ hoŋ bawalipne pilâyekmâ gâhâlen âwurem gawom. Yawu gârâmâ nâhât hoŋ bawalipne yuŋe yuân torokatmâ lok bâleŋe yengât hohetyeŋan mannomai yamâ gâŋe mâmâŋe otyiŋgim tihityeŋe otbuat. Mâmâŋe otyiŋgirâ netŋe biwinetŋe konohâk otmap yakât dopŋeâk lok yuŋe biwi konok otmâ mannomai. <sup>12</sup>Yawu gârâmâ hoŋ bawalipne yu orowâk manmâ gain yuŋe pilânekmâ ari hiliwahomaihât mâmâŋe otyiŋgim gaman. Yâhâ gâŋe mâmâŋe otnihimat yawuâk mâmâŋe otyiŋgiman. Otmu miti pepaen den âlâ tap yakât bulâŋe teteâkgât bukuyeŋe âlâ osetyeŋan gâtŋe âlâŋe pilânenekmâ arap. Yâhâmâ hem nâpumân ge hiliwahowuapgât pat mansap.

<sup>13</sup>Yâhâ nâ gâhâlen gawoman. Yakât otmâ âi sâm nihion ya memune heroŋe nâŋgânihimat yakât dopŋeâk hoŋ bawalipnane nâhât âi torokatmâ tuhunomai yan heroŋe nâŋgâyiwom. Yakât topŋe nâŋgâm heroŋe kakŋan mannomaihât nâŋe senyeŋan kinmâ den ekgohoan yu naŋgai. <sup>14</sup>Yâhâ emelâk

nâmâ himbimâmbâ ge gâhât den kâsikum yingimune nângânetâ bulâne otmu orotmemeyenê bâlenê bet pilâm nâhâlen torokatmâ himbingât pat oai. Yakât otmâ lok bâlenjanê ya yengât nângâm hâkâj otmâ. <sup>15-16</sup>Yâhâ nâhâlen torokatmâ himbingât pat mansai. Yakât otmâ gâne mem dâiyekdâ pilâm gâhâlen yâhânetgât ki nanjan. Yawu gârâmâ Bâlenjahât Ambojanê mem hilipyongomapgât mâmâne otyingihât nanjan. <sup>17</sup>Mâmâne otyingirâ orotmeme bâlenjambâ keterakmâ gâhât den bulâne lâum manmâ yâhânomai. <sup>18-19</sup>Gâne angoânâk âi sâm nihim hângânnohorâ ge tem lâuhihim gâhât den pat âlepne ekyongom gan. Yakât dopneâk nâku âi sâm yingim hângânyongomune ari lohimbî den pat âlepne yakât ekyongonomai.

**Yesuê ikne komolipne nengât nângâm Anitâ ulitguop.**

<sup>20</sup>Awoj, sâp yiwerenê yuâmâ nâhâlen torokatmâ mansai ya yengâlâk ki sâm ulitgohoan. Hâmbâi lohimbî dondâne nâhât den pat âlepne nângânetâ bulâne otmu biwiyenê nâhâlen katnomai ya yengât ulitgohomune nângâ. <sup>21</sup>Awoj, gâ orop biwi nângân nângânnetjanê kepeiakmâ konohâk oait. Yakât dopneâk lohimbî yanê netgâlen biwiyenjanê kepeim konohâk otmâ mannomaihât nanjan. Yâhâ biwi konohâk otmâ mannomai yanâmâ lohimbî belângen mansainê manmanyenê ekmâ yuwu nângânomai. “Anitâne Yesu hângângumu ge mâmâne otyingimu yanak biwi konok otmâ buku oranjimai.”

<sup>22-23</sup>Otmu gâne hângânnohom mâmâne otnihirâ ge hohetyenjan manmune biwinetne konohâk otmait yakât topne nângâm hejengeuai. Yakât dopneâk nâne hângânyongom mâmâne otyingimune nâ orop biwiyenê konohâk otmâ mannomai. Yawu mannomai yanâmâ lohimbî hânjan kulemjan mansainê gâne wawaenekmat yawuâk wawaeyekmâ tihityenê otbe sâm nâ hângânnohorâ gewan yakât topne nângâm hejengegunomaihât ulitgohoan.

<sup>24</sup>Awoj, lohimbîne biwiyenê nâhâlen katmai yamâ nâ orowâk himbimân tatnom yakât emelâk pat kuyingion. Otmu gâne embânân hân himbim ki kândikyotgon yan biwihanê kepeinekmâ gâ orowâk himbimân tatbisâit yakât sâm nihion. Yakât otmâ pat kuyingion yakât bulâne tetemu himbimân net orowâk tatmâ mepaeneleknomaihât ulitgohoan.

<sup>25-26</sup>Awoj, lohimbî belângen mansainê gâhât topge ki nanjai. Yawu gârâmâ nâneâmâ gâhât topge nângâm lok yunê nâhâlen biwiyenê katmâ mansai ya ekyongomune tipinê nângânetâ keteraksap. Yakât otmâ gâne wawaenekmâ hângânnohorâ gewan ya nângâm hejengeuai. Yâhâ nâne kulem membom yan gâne wawaeyekmat yakât topne nângâm hejengegunomai.” Yawu sâop.

**Parisaio yengât tembe lâulipyenjanê Yesu mewî.**  
(*Mataio 26:47-56; Mareko 14:43-50; Luka 22:47-53*)

**18** <sup>1</sup>Yesuê yawu sâm âwânê ekumu pesuk sâmu hoj bawalipne nen menenekmu ba to tipinê âlâ, kutne Kitoron sâm, ya hâtikguwin.

Ya hâtikum nak âlâ, kutje Oliwa, ya kambatje kâmetbi yan yâhâwin. <sup>2</sup>Yâhâ emelâk manmâ gawin yan Yesuje menenekmu yan yâhâ tatmâ nângâminiwin. Yakât otmâ Yurasi kapi ya nângâop. <sup>3</sup>Yakât otmâ Yurasiŋe betjeheh kionmâ Parisaio otmu hotom uminiwi ya yengât sâtgât otmâ tembe lâulipyenje dâiyekmu unam, tewet, kapamgât senje âlâlâ miakmâ balam saum nengâlen tohowi. <sup>4</sup>Toho mem tetenekjetâ umatje yu Yesu kakŋan yâhâwuap ya emelâk nângâop yakât otmâ katnenekmâ gotyerjan ba yuwu sâm âiyongop. “Yen âlâhât pâinsai?” sâop.

<sup>5-6</sup>Sâmu sâwi. “Nenâmâ lok âlâ, kutje Yesu, yamâ Nasaret kapi amboŋe yâkât pâinsain,” sâwi.

Sâŋetâ sâop. “Lok yamâ nâ yu.”

Sâmu Yurasi otmu orowâk takawiŋe denje nângâm pârâk pilâm umutyenje arimu hânân ge pare iwi.

<sup>7</sup>Yawu otmâ yâhâpŋe âiyongom sâop. “Yen âlâhât pâinsai?”

Sâmu yahatmâ kinmâ sâwi. “Lok âlâ, kutje Yesu, yamâ Nasaret kapi amboŋe,” sâwi.

<sup>8</sup>Sâŋetâ sâop. “Nâ emelâk ekyongoan. Lok yamâ nâ yu. Nâ pâinneksai yakât otmâ hoŋ bawalipne yu pilâyekjetâ yahatmâ ariŋetgât nanŋan.” Yawu sâop. <sup>9</sup>Yawu sâm yan den emelâk yuwu sâop yakât bulâŋe teteop. “Awoŋ, gâŋe lok yu mâmâŋe otyiŋgirâ nâhâlen biwiyenŋe kepeim mansai yu yengât tihityenje otmune âlâ ki hiliwahoap.” <sup>10</sup>Yawu sâmu Petoroŋe tewetje mem yahatmâ hotom um manbi ya yengât kunyenje manop yâkât hoŋ bawaje, kutje Maiko sâm, yamâ ândâpŋe nombot ya topŋambâek kârâm hâreop. <sup>11</sup>Kârâm hâremu Yesuje ekmu bâlemu yuwu sâm ekuop. “Yawu otdâ bâleap. Umatje yu tetenihimu sâtgum mumbomgât Awoŋnaje mâtâp sâm nihiop ya ki watbomgât nanŋat hâ? Âlâŋe yakât ki ekgohop?” Yawu sâop.

### Yesu mem Anasihâlen ariwi.

<sup>12-13</sup>Yesuje yawu sâm ekumu Roma tembe lâu ya yengât kunyenŋe sâmu tembe lâulipŋe otmu Parisaio yengât tembe lâulipyenŋe Yesu mem bâteŋe sâhâm menduhuwi. Yawu tuhum mem lok sombo âlâ, kutje Anasi sâm, yâkât emelan yâhâwi. Anasi yamâ lok âlâ, kutje Kaipa sâm, yâkât lamatje. Yâhâ Kaipa yamâ hombaŋ yakât hotom uminiwi ya yengât kunyenje pato manop. <sup>14</sup>Yawu gârâmâ Kaipaŋeâmâ nen Yura lohimbi kerekŋe hiliwahomaingât Yesu konok mumbuapgât nângâm papatolipnenŋe ekyongop.

### Peteroŋe Yesu betguop.

(Mataio 26:69-70; Mareko 14:66-68; Luka 22:55-57)

<sup>15</sup>Yâhâ Yesu mem Anasihât emelan yâhâŋetâ Petoro otmu bukunenŋe âlâŋeâmâ Yesu watmâ ariowot. Yâhâ Anasiŋeâmâ bukunenŋe ya

nângâwangimap. Yakât otmâmâ Yesu mem emelan yâhânetâ yawuâk watyekmâ betyenjan yâhâop. <sup>16</sup>Yawu otmâmâ Petoroŋeâmâ emet hawiŋan peke yakât hâŋgi hâlâŋmâ kinop. Yawu gârâmâ bukuŋe Anasihât emelambâ ge hoŋ bawa imbi âlâŋe hâŋgi galemgum kinop ya ekumu hâŋgi hindâmu yanâk Petoro gurâ kâlehen yâhâop. <sup>17</sup>Kâlehen yâhâmu imbi yaŋe ekmâ sâop. “Âo gâmâ Yesu hoŋ bawaŋgim manmat. Yawu geksan.”

Sâmu sâop. “Yu yat yamâ imbiâk yat,” sâop.

<sup>18</sup>Otmu sâp yanâmâ bâlâpŋe bâleŋe olop. Yakât otmâ tembe lâu nombotŋe kâlâp uŋetâ semu hoŋ bawa nombotŋe orowâk menduhuakmâ kâlâp nâŋgâm kinbi. Kâlâp nâŋgâm kinŋetâ Petoroŋe hohetyenjan ga kinmâ kâlâp nâŋgâop.

### **Kaipanŋe Yesu âi pâi tuhuop.**

*(Mataio 26:59-66; Mareko 14:55-64; Luka 22:66-71)*

<sup>19</sup>Yesuŋe nen hoŋ bawalipŋe menenekmâ den kâsikum ningiminiop. Otmu otbin mewin yakât topŋe hotom uminiwi ya yengât kunyeŋeŋe nâŋgâwe sâm âikuop.

<sup>20-21</sup>Âikumu sâop. “Wongât âinohoat? Kapi ambolipŋe orop miti emetŋan me opon kâmbukŋan yâhâ menduhuakŋetâ den kâsikum yingim gaman. Otmu kapi tipi tapi tatmâ arap, me wosapâ me wosapâ kapi ambolipŋe menduhuakmai yan lok senyenjanâk kinmâ den ekyongom gaman. Nâmâ tik tik ki ekyongoman. Yakât otmâ nâ ekyongomune nâŋgâmai ya âiyongorâ yâkŋe sânomai.” Yawu sâop.

<sup>22</sup>Yawu sâmu tembe lâu âlâŋe yahatmâ Yesu ândâpŋe huhum yuwu sâm ekuop. “Gâmâ girawu otmâ hotom umai yengât kunyeŋe ya nekamŋan yat?” Yawu sâop.

<sup>23</sup>Sâmu sâop. “Nâ den bâleŋe yan otmuâmâ yakât topŋe sârâ nâŋgâwe. Nâmâ den âlepŋe yan. Yamâ girawuhât ândâpne huhuat?” Yawu sâop.

<sup>24</sup>Benŋe, Anasiŋe sâmu Yesu bātŋe sâhâm menduhuwi ya ki holaŋmâek mem lamatŋe, kutŋe Kaipa sâm, yâkâlen dâim ariwi.

### **Petoroŋe Yesu âlâkuâk betguop.**

*(Mataio 26:71-75; Mareko 14:69-72; Luka 22:58-62)*

<sup>25</sup>Yâhâ Petoro yamâ yawuâk kâlâp nâŋgâm kinop. Nâŋgâm kinmu lohimbi orowâk kinbiŋe towatŋe ekmâ nâŋgâmâmâ yuwu sâm ekuwi. “Gâ gurâ Yesu orowâk manmat, yawu geksein.” Yawu sâŋetâ topŋe kurihiakmâ “Nâ bia,” sâm irelahop.

<sup>26</sup>Sâmu hotom umai ya yengât kunyeŋahât hoŋ bawa âlâhât ândâpŋe Petoroŋe kârâm hâreop yakât hep torehenŋe âlâ orowâk kinbiŋe Petoro ekmâ yuwu sâop. “Bulâŋjanâk Yesu miai yan gâ orowâk kinŋetâ yeksan.” Yawu sâm ekuop.

<sup>27</sup>Yawu sâmu “nâ bia” sâmu irelahop. Irelakmu yanâk gokorok isiop.

**Yesu mem Pilatohâlen ariwi.**

(*Mataio 27:1-2,11-14; Mareko 15:1-5; Luka 23:1-5*)

<sup>28</sup>Otmu Yesu mem Kaipahât emelan arijetâ yan mumbuapgât den sâmu hârewaŋgiwi. Otmu emet haŋ sâmu emelambâ mem ge Roma lok yengât kiap âlâ, kutŋe Pilato sâmu, yâkât emelan ariwi. Yawu gârâmâ Tihit tihit hombaŋ yan lama gâim um neminiwi sâp yan lohimbije angoân pâku lohimbije yengât emetyeŋan yâhâmai sâmu samut katbi. Yakât otmâ Yesu mem ari Pilatohât emet umbiŋan kinbi. <sup>29</sup>Emet umbiŋan kinjetâ Pilatoŋe emelambâ ge yuwu sâmu âiyongop. “Lok yuâmâ wongât nâhâlen mem takai?”

<sup>30</sup>Âiyongomu sâmu. “Lok yuŋe otmu bâleap. Yâhâ ki otmu bâleap mâne wongât yuwu mem takambâin.” Yawu sâmu.

<sup>31</sup>Sânetâ sâmu. “Yeŋe girawu otbaŋginom naŋgai ya âlepŋe yeŋe girem den watmâ otbaŋjet.” Yawu sâmu.

Sâmu sâmu. “Emelâk mumbuapgât den sâmu hârewaŋgiain. Yawu gârâmâ nenŋe lok âlâ kumunŋe mumbuapgât mâtâp maŋguningiwi. Yawuhât otmâ gâŋe konok sâmu hârewaŋgirâ mumbuapgât gâhâlen mem takain.” Yawu sâmu.

<sup>32</sup>Yâhâ angoânâmâ Yesuŋe “Nohom howanân kânâŋgâneknomai,” sâmu yakât bonŋe teteâkgât Yura nengât kunlipnenŋe Yesu mem Pilatohâlen ariwi.

<sup>33</sup>Bâiŋ, yawu sânetâ Pilatoŋe purik sâmu emetŋan yâhâ Yesuhât sâmu mem gaŋetâ yuwu sâmu âikuop. “Yura yengât lok kutdâ sâmai ya gâ me?”

<sup>34</sup>Sâmu sâmu. “Gike engatgeâk otmâ yat me lok âlâŋe ekgohomu nâŋgâm yat?”

<sup>35</sup>Sâmu sâmu. “Nâmâ Roma gâtŋe. Nâŋe Yura yengât topyeŋe ki nâŋgâman. Gâŋe girawu olongât papatolipŋeŋe mengekâm nâhâlen takai?”

<sup>36</sup>Sâmu sâmu. “Nâmâ lohimbije yu yengât lok kutdâ ki manbe sâmu oan. Yâhâ nâŋe yâk yengât lok kutdâ manbe sâmu oan mâne papatolipnenŋeŋe menekmai sâmu nine hoŋ bawalipnaŋe yahatmâ tânnohom kapam kumbâi. Nâmâ yuân mansai yengât kutdâyeŋe mansan.” Yawu sâmu.

<sup>37</sup>Sâmu sâmu. “Gâ bulâŋanâk lok kutdâ mansat?”

Sâmu sâmu. “Yu yat yakâ. Nâmâ den bulâŋe yakât topŋe ekyongowehât hân yuân gewan. Yakât otmâ lohimbije den bulâŋe nâŋgâne sâmu otmai yaŋe nâhâlen torokatmâ mansai.” Yawu sâmu.

<sup>38</sup>Sâmu sâmu. “Wuân den bonŋe ondop âlâ tap yakât yat? Yamâ ki tap.”

**Pilatoŋe Yesu muâkgât sâmu hârewaŋgiop.**

(*Mataio 27:15-31; Mareko 15:6-20; Luka 23:13-25*)

Yawu sâmu benŋe emet umbiŋan gem Yura nengât papatolipnenŋe yuwu sâmu ekyongop. “Lok yukât tosa ki eksan. <sup>39</sup>Yawu gârâmâ Tihit



tihit hombaŋ ârândâŋ pâi emetŋan lok tatminiwi yapâ gâtŋe âlâ kapi ambolipŋaŋe sâŋetâ holaŋyekmune geminiwi. Yakât otmâ Tihit tihit hombaŋ yuân lok kutdâ yu sâmunne holaŋetâ ge manâkgât naŋgai me bia? Me lok âlâ sâmunne holaŋetâ gewuap?” Yawu sâop.

<sup>40</sup> Yawu sâmu yahatmâ halahum yuwu sâwi. “Yawu bia. Barawa ya pâi emetŋambâ holaŋdâ giâk.” Yawu sâwi.

Yawu gârâmâ Barawahât topŋeâmâ yuwu. Yâhâmâ lok yongomu yakât otmâmâ pâi emetŋan katŋetâ talop.

### Pilatohât tembe lâulipŋaŋe Yesu mem âlâlâ tuhuwi.

**19** <sup>1</sup> Yawu sâŋetâ Pilatoŋe ikŋe tembe lâulipŋe ekyongomu Yesu mem tâk âlâ sâtŋe metŋe yaŋe kândâtŋan lawitmâ hâkŋe orowâk mem gahaewi. <sup>2</sup> Lawitmâ tâk âlâ, sâtŋe metŋe, kon pan pan me hatman yawuya yaŋe mem kunŋan pân pân kepeiwaŋgiwi. Yawu otmâ sâŋgum kuriŋ pâwâwâŋ yamâ lok kutdâŋe katmâ manminiwi yawuya ya mem latbaŋgiwi. <sup>3</sup> Yawu otmâ senŋan gem yuwu sâm ekuwi. “Bâe. Yura yengât lok kutdâ pato. Gâŋe torokatmâ kinmâ yâhâwuatgât naŋgain.” Yawu sâm ândâpŋe huhuwi. <sup>4</sup> Yawu otbaŋŋetâ sâtŋum kinmu benŋe Pilatoŋe emet umbiŋan ge yuwu sâm lohimbi ya ekyongop. “Yengât lok kutdâ yukâlen tosa âlâ ki eksan. Yakât otmâ sâmunne mem geŋetâ yeŋe senyeŋaŋe ekŋet.” Yawu sâop. <sup>5</sup> Yawu sâmu Yesu tâk sâtŋe metŋe ya kunŋan kepeiwaŋgiwi otmu sâŋgum kuriŋ latbaŋgiwi ya yawuâk tatmu mem geŋetâ yuwu sâm ekyongop. “Yengât lok kutdâ yu holaŋmune giâkgât naŋgan.” Yawu sâm ekyongop.

<sup>6</sup> Yawu sâm ekyongomu hotom uminiwi ya yengât kunlipyeŋe otmu tembe lâulipyeŋaŋe Yesu ekmâ kârikŋan halahuwi. “Howanân kuŋetâ muâk,” sâm yawuâk yawuâk sâwi.

Sâŋetâ sâop. “Ki otmu bâleap yakât tosa âlâ yâkâlen ki eksan. Yawu gârâmâ naŋgai ya yeŋahâk mem ari howanân kunomai.”

<sup>7</sup> Sâmu sâwi. “Lok yuŋe “Nâ Anitâhât nanŋe mansan,” sâop. Yawu sâop yaŋe nengât girem den loŋgâeop. Yakât matŋe muâkgât sâm hârewaŋgiain.” Yawu sâwi.

<sup>8</sup> Yawu sâŋetâ nâŋgâm kiŋgitŋahât dondâ otmâ purik sâm Yesu mem emet kâlehen yâhâop. <sup>9</sup> Yâhâ yuwu sâm âikuop. “Gâ wonân gâtŋe?” Sâmu den olotoŋâk kinop. <sup>10</sup> Yawu kinmu sâop. “Wongât olotoŋâk kinsat? Holaŋgekŋetâ ge manbuat me howanân gohoŋetâ mumbuat yamâ nâhât sâlâk watnomai.” Yawu sâop.

<sup>11</sup> Sâmu sâop. “Anitâŋe papatolipge ya biwiyenŋan kioŋmu galem sâm katgekbi. Yakât otmâ lok kasa otnihim gâhâlen hâŋgânnohomu takan yaŋeâmâ tosa miat ya wangim tosa amokŋan miap.” Yawu sâop.

<sup>12</sup> Yawu sâmu Pilatoŋe holaŋmune ariâk sâm nâŋgâm ketet olop. Nâŋgâm ketet otmu hotom uminiwi yengât kunlipyeŋaŋe tâtâemâk yuwu

sâm ekuwi. Lok âlâ me âlâŋe “Nâ lok kutdâ pato mansan,” sâmapŋe gâhât patohe, kutŋe Sisa sâm, ya mem ge katbe sâm oap. Yesuŋe yawu oap ya eksain. Yakât otmâ gâŋe Yesu yu holaŋdâ ariwuap yanâmâ Sisa ki buku otbaŋgiuwat. Yakât otmâ umatŋe teteap yukât Sisa ekumunŋe sâm hârehihiuwat.” Yawu sâwi.

<sup>13</sup>Yawu sâŋetâ Yesu mem yaehen katmu kinmu ikŋeâmâ sâm hâre hâre kawenjan yan ge talop. Yâhâ kawe yakât kutŋe yamâ Yura nengât denân “Gawata” yawu. Yâhâ yakât topŋeâmâ yuwu tap. “kawe konŋak tuhuwi” yawu. <sup>14</sup>Yâhâ emetsenŋe purik sâwe sâm otmu yan Pilatoŋe kawe yan ge talop. Yâhâ emet omoŋ otmu yan Tihit tihit hombaŋ ya tetemu âi ki menomaihât sâwi. Yakât otmâ Pilatoŋe yuwu sâm ekyongop. “Ekŋet. Lok yuâmâ yengât lok kutdâ.”

<sup>15</sup>Sâmu sâwi. “Lok yuŋe muâkgât nanŋain. Yakât otmâ howanân kuŋetâ muâk,” yawu sâwi.

Sâŋetâ sâop. “Lok kutdâyeŋe yu howanân kuŋetâ muâkgât nanŋai hâ?”

Sâmu hotom uminiwi ya yengât kunlipyeŋe yuwu sâwi. “Nengât lok kutdâ âlâ ki tap. Sisa konohâk mansap,” yawu sâwi.

<sup>16</sup>Yawu sâŋetâ Pilatoŋe Yesu ya howanân kuŋetâ muâkgât sâm hâreop. Sâm hâremu dâim ariwi.

### **Yesu dâim ari howanân kuwi.**

*(Mataio 27:32-44; Mareko 15:21-32; Luka 23:26-43)*

<sup>17</sup>Yesu ikŋahâk howanŋe ya lâuakmu ariwi. Otmu kapi pato ya pilâm gem hân âlâ, kutŋe yamâ Yura nengât denân Golihata sâm, yan gewi. Yâhâ kut yakât topŋeâmâ yuwu tap. “Lok Kunŋe Hahitŋe,” yawu.

<sup>18-19</sup>Yan mem ge howanân kuwi. Kuŋetâ Pilatoŋe den âlâ yuwu sâm howan kunŋan kulemguop. “Yesu, Nasaret kapi amboŋe, Yura yengât lok kutdâ.” Yawu kulemguop. Yâhâ den kulemguop yamâ Yura nengât denân, Roma yengât denân, Girik yengât denân kulemguop. Yawu kulemgumu lâum kânâŋgâwi. Otmu sâp yanâk lok yâhâp yotgom lâum kânâŋgâyelekŋetâ nombot nombot kinowot. <sup>20</sup>Yâhâ Yesu yamâ Yerusalem kapi pato yakât nombotgen kuwi. Yakât otmâ Yura lohimbi dondâ bam gawiŋe ekmâ sâlikuwi. <sup>21</sup>Yâhâ hotom umai ya yengât kunlipyeŋe ya nanŋâm Pilatohâlen ari yuwu sâm ekuwi. “ “Yura yengât lok kutdâ,” yawu kulemgum katsat ya ekmunŋe ki ârândâŋ oap. Yawu gârâmâ ya gulipgum yuwu kulemgu. “Lok yuŋeâmâ “Nâmâ Yura yengât lok kutdâ,” yawu sâmap.” Yawu kulemgu.” Yawu sâwi.

<sup>22</sup>Sâŋetâ sâop. “Kulemguan ya pilâŋetâ yawuâk talâk.” Yawu sâop.

<sup>23</sup>Otmu tembe lâu Yesu mem howanân kuwiŋe yâkât senŋe âlâlâ mem kâsikuŋetâ komot imbât olop. Otmu âlâku konok konok anŋim miakbi. Yâhâ sâŋgumŋe âlâ yamâ kâlep pato ya ewakembâ giop yamâ ki gâre gâreŋe. <sup>24</sup>Yakât otmâmâ ekmâ yuwu sâwi. “Yu nenŋan gâtŋe konokŋe

hâluulâek miakbuap yamâ âlepŋe,” sâwi. Yawu sâm pepa tipi tapi mem duhatmâ kutyeŋe ikŋiâk ikŋiâk kulemgum amanân mânunetâ ge talop. Mânunetâ tatmu mem gulip malap tuhuwi. Gulip malap tuhum pepa âlâ mewi yan lok kutŋe teteop yaŋe sâŋgum ya hâluulâek miop. Yawu otbi. Otbi yakât emelâk lok âlâŋe miti pepaen kulemguop yakât bulâŋe teteop yamâ yuwu.

“Nâhât senŋe âlâlâ yamâ mem kâsikum anŋim miaksai. Otmu sâŋgumne kâlep pato ya âlâhât kutŋe teteap yaŋe hâluulâek miaksap.”

Yawu kulemguop yakât bulâŋe teteâkgât orotmeme yu otbi.

<sup>25-26</sup> Yesu howanân kuŋetâ kinop yakât gotŋan imbi imbât kinbi yamâ yuwu. Âlâmâ ikŋe mâmâŋe, âlâmâ mâmâŋahât gariŋe, âlâmâ Maria ya Kelopa apetŋe, otmu bâiŋeâmâ Maria, Matala kapiân gâtŋe yâk orowâk kinbi. Yâhâ nâmâ Yesu mâmâŋahât gotŋan kinban. Yawu kinmunŋe Yesuŋe mâmâŋe ekmâ tepŋe nâŋgâm yuwu sâm ekuop. “Meŋ, pilâyekboman. Gâmâ Yoane orop mandâ galemge otbuap.” <sup>27</sup> Yawu sâm ekum yuwu sâm eknohop. “Buku, meŋnetŋe yuâmâ gâŋe galemguuat,” sâm eknohop. Yawu sâmu yapâek nâhâlen torokatmu orowâk manmâ galemguwan.

#### Yesu bâleop.

(*Mataio 27:45-56; Mareko 15:33-41; Luka 23:44-49*)

<sup>28</sup> Otmu sâp yan âwâŋaŋe Yesu âi sâm waŋop ya tuhum pesuk pilâop ya nâŋgâop. Nâŋgâm yan miti pepaen den âlâlâ kulemguwi yakât bulâŋe bunewâk teteâkgât kândâtŋe kuwihakmâ den kârikŋe halahum yuwu sâop. “Nâ tohât neksap.” Yawu sâop.

<sup>29</sup> Yawu sâmu kondo âlâ talop yan wain to yakât ukenŋe biatmu pâlâmŋe olop ya gâiŋetâ yan giop. Otmu yan kinbiŋe kereŋ wahapŋe mem keleân sâhâm menduhum wain kâlehen katŋetâ ge bârâtguop. Bârâtgumu mem yâhâ Yesu lauŋan katŋetâ niop. <sup>30</sup> Nem yan “Âi sâm nihiop ya dopŋan oap.” sâop. Yawu sâm goselek sâm bâleop.

<sup>31</sup> Yâhâ emetsâpŋan bâlemu omoŋ otmu yan Tihit tihit hombaŋ pato ya tetewuawân howanân yawuâk kinmaiŋhât hotom uminiwi yengât kunlipyeŋaŋe ari Pilato yuwu sâm ekuwi. “Yura nengât Tihit tihit hombaŋ tetemu yan lok bâleŋe ya howanân kinŋetâ yekmunŋe bâlewup. Yawu gârâmâ gâŋe tembe lâulipge ekyongorâ ari in yawu kâiyeŋe kum lotohoyekŋetâ munomai. Muŋetâ yanâmâ howanâmbâ mem kâpekyeknomai.” Yawu sâwi.

<sup>32</sup> Yawu sâŋetâ tembe lâulipŋe hâŋgânyongomu ari lok yâhâp yawuâk kâiyetŋe kum lotohoyelekŋetâ muowot. <sup>33</sup> Kâiyetŋe kum lotohoyelekmâ Yesuhâlen ba eksain mâne emelâk muop yakât otmâ kâiŋe ki kum lotohowi. <sup>34</sup> Yawu gârâmâ tembe lâu âlâŋe iŋgepŋe mem

Yesuhât gasumņan hâumu yapâ hep otmu toto gam giop. <sup>35</sup>Yâhâ nâmâ gotyeņanâk kinmâ yekban. Yakât otmâ den kulemguan yu sâlikum nâņgâņetâ bulâņe otmu Yesuhâlen biwiyeņeņe kepeim manņetgât yu tâņ tâņjâk kulemguan. <sup>36</sup>Yâhâ miti pepaen den âlâ tap yamâ otbangiwi yan yakât bulâņe teteop ya yuwu.

“Yakât चाहित्ते konok âlâ ki kum lotohonomai.”

<sup>37</sup>Yâhâ den bulâņe âlâ yawuâk teteop ya yuwu.

“Lok âlâ hâuņetâ kinmâ mumbuap ya eknomai.” Yawu tap.

**Yesu howanâmbâ membe sâm Yosepņe Pilatohâlen ariop.**

*(Mataio 27:57-61; Mareko 15:42-47; Luka 23:50-56)*

<sup>38</sup>Yawu otmâ lok âlâ, kutņe Yosep, yâhâmâ Arimata kapi amboņe. Yâkņe biwiņe Yesuhâlen katmâ manmap. Yawu gârâmâ emelâk Yura nengât papatolipnenņe yeņgât kiņgitņahât otmâ topņe kurihiakmâ manop. Yakât otmâ Yesu howanâmbâ membe sâm yok pilâm ari Pilato ekuop. Ekumu nâņgâwaņgimu ari bukulipņe meyekmu ari Yesu mewi.

**Yesu lâum ari hanguwi.**

<sup>39</sup>Yâhâ Nikotemo yamâ aņgoân omoņ âlâen Yesuhâlen arimu den huhuowot yâkņeâmâ Yesu piriwe sâm otmâ to kukņe suk suk âlâ miop. Yawu gârâmâ to yamâ umatņe pato yakât lok âlâ memu Yosepgâlen lâum ariowot. <sup>40</sup>Yâhâ Yosep yet Nikotemoņe hangure sâm Yura nengât orotmeme watmâ yuwu olowot. Yesu mem to kukņe yaņe piriowot. Pirim sâņgum kâkâlep yaņak katipguowot. <sup>41</sup>Yâhâ Yesu howanân kuwi yaken ya kalam âlâ talop. Kalam yan kât giopņe âlâ emelâk kusânâmâ mem tiņgâlonețâ in kamen kinminiop. <sup>42</sup>Yawu gârâmâ Yura nengât Tihit tihit hombaņân yu me ya tuhumain sâm samut katbi. Yawu gârâmâ Tihit tihit hombaņ ya tâlâhuop. Yakât otmâ lâum kâlepņehen arinomaihât sâp biatmu lâm ya kâlehen lâum ba katbi.

**Yesu mumuņambâ yahalop.**

*(Mataio 28:1-8; Mareko 16:1-8; Luka 24:1-12)*

**20** <sup>1</sup>Emet eņgatņe nâņgâm Maria, Matala kapi amboņe, sumângen ariop. Ari kât pato âlâ hâpunņetâ ge lâm mâtâpņe kum bâp maņguop ya hindakmu mâtâpņe kinop ya ehop. <sup>2</sup>Ekmâ pârâk pilâm purik sâm Petoro orop netgâlen taka yuwu sâm eknotgop. “Papatolipnenņe Kutdâ sumâmbâ lâum ari wosaken âlâ misiņgutsai?” Yawu sâop.

<sup>3-4</sup>Yawu sâmu net gurâ sumângen ariwit. Nâņe sururuk sâm Petoro wangim kulet sâwan. <sup>5</sup>Kulet sâm ariwan yamâ lâm kâlehen ki bawan. Yâhâmâmâ lâm sâtņanâk kinmâ olelem eksan mâne sâņgum kâkâlep mem Yesu katipgum katbi yaņahâk tatmu ekban. <sup>6</sup>In ekmâ kinmune

Petoroŋe belângen takaop yaŋak burunduŋak gam kâlehen baop. Kâlehen ba sâŋgum kâkâlep yawuâk ehop. <sup>7</sup>Otmu sâŋgum tipiŋe mem Yesu kunŋe katipguwi ya âlâŋe kitâ mem ketetmâ heŋgeŋgum katmu talop ya ehop. <sup>8</sup>Yawu otmuâmâ nâku yawuâk kâlehen bawan. Yâhâ kunŋe katipguwi yawuâk ekmâmâ Yesu mumuŋambâ yahalop nâŋgâwan. <sup>9</sup>Yawu gârâmâ sum kamen kinmu ekbit yakât poropete nombotŋaŋe emet inânŋan Yesu mumuŋambâ yahatbuap yakât topŋe kulemguiwi ya ki nâŋgâmutŋe keterahop. <sup>10</sup>Yawu otmâ benŋe purik sâm âwurem ariwit.

**Yesuŋe Maria, Matala kapi amboŋe, tetewaŋgiop.**

*(Mareko 16:9-11)*

<sup>11</sup>Otmu Mariaŋe betnetŋan taka lâm sâtŋan isem kinop. Isem kinmâ kâlehen ehop. <sup>12</sup>Ekmu aŋelo yâhâp yaŋe Yesu katŋetâ iop ya hâlânâmâ nombot nombot talowot. Konokŋeâmâ kunŋehen talop. Yâhâ âlâ yaŋeâmâ kâiŋehen ge talop. <sup>13</sup>Yawu tatmâ yuwu sâm âikuowot. “Wongât isem kinsat?”

Sâmutâ sâop. “Kutdâne yupâ lâum ari wosaken âlâ misiŋgutsai?” yawu sâop.

<sup>14-15</sup>Yawu sâm kambeŋe kakŋambâ olelem Yesu ehop. Ekmâ yan “Yuâmâ kalam yukât amboŋe mon?” nâŋgâop. Yawu nâŋgâmu Yesuŋe âikuop. “Imbi, gâmâ âlâhât pâinmâ isem tat.” Yawu sâop.

Sâmu sâop. “Lok pato, gâŋe sârâ Yesu lâum ari âlâengen misiŋgutsai otmuâmâ âlepŋe eknohorâ bukulipŋe ari ekyongomune taka menehât naŋgan.”

<sup>16</sup>Yawu sâmu kunop. Kunmu purik sâm Yesu towatŋe ekmâ nâŋgâm Yura nengât denân “Kutdâ” sâop. Den yukât topŋe yamâ “Kutdâne.”

<sup>17</sup>Sâmu sâop. “Nâ Awoŋnahâlen irak yâhâwoman yakât otmâ ki wâinek. Gâŋe âwurem ari bukulipne ekyongowuat. Ekyongom nâhâtŋe yamâ “Anitâ awoŋnennahâlen ewun âwurem yahap” sâm ekyongowuat.” Yawu sâop. <sup>18</sup>Yawu sâmu Mariaŋe taka den ya nen hoŋ bawalipŋe eknongop.

**Yesuŋe hoŋ bawalipŋe teteyiŋgiop.**

*(Mataio 28:16-20; Mareko 16:14-18; Luka 24:36-49)*

<sup>19</sup>Otmu emet omoŋ otmu yanâmâ nen hoŋ bawalipŋe papatolipnenŋe yengât kiŋgitnennahât otmâ emet âlâen yâhâ menduhuakmâ gahatŋe kârikŋe maŋgum tatbin. Menduhuakmâ tatmunŋe Yesuŋe hohetnennan pâràk sânsânâk teteningiop. Teteningim eknongop. “Biyeyeŋe huruŋ sâek.” Yawu sâop. <sup>20</sup>Yawu sâmâmâ biriŋe bâtŋe kuwi otmu iŋgepŋe gasumŋan hâuop yakât gut tiripnongomu ekbin. Tiripnongomu ekmâ biwinenŋe heronŋe olop. <sup>21</sup>Yawu otmâ kinmunŋe yâhâpŋe sâop. “Yen biyeyeŋe huruŋ sâek. Awoŋnaŋe nâ hâŋgânnohomu gewan yakât

dopɽeāk nâku yen hângânyongomune arinomai,” sâop. <sup>22</sup>Yawu sâm kahapumɽaje hângutnenekmâ yuwu sâm eknongop. “Yenâmâ Anitâhât Wâtgât mâmâɽahât Heakɽe mâmâɽe otyiŋgimu yâkât wâtɽan kinnomai. <sup>23</sup>Wâtɽan kinmâ yâkât sâtgât lok âlâ me âlâhât tosa pilâyiŋginomai yamâ Anitâɽe buku otyiŋgiwuap. Yâhâ lok âlâ me âlâhât tosa ki pilâyiŋginomai yamâ matɽe umatɽe yiŋgiwuap.” Yawu sâop.

**Yesuɽe gutɽe Toma tiripgumu ehop.**

<sup>24</sup>Yâhâ Yesuɽe teteningimu gutɽe ekbin sâp yan bukunenɽe âlâ, kutɽe Toma sâm, kutɽe âlâmâ Boho boho, yâhâmâ nen orowâk ki tatbin.

<sup>25</sup>Yakât otmâ belângen Toma ekmâ yuwu sâm ekuwin. “Kutdânenɽe nengâlen tetemu den huhuwin.” Sâmunɽe sâop. “Âo, yenâmâ den miai. Yawu gârâmâ biriɽe bātɽe kuwi otmu iŋgeɽe gasumɽan hâuop yakât gutɽe nine sennan ekmâ mem walipguwom yanâmâ nâŋgâmune bulâɽe otbuap.” Yawu sâop.

<sup>26</sup>Yâhâ Sande âlâ otmu yan emelan âlâkuâk yâhâ menduhuakmâ gahatɽe kârikɽe maŋgum tatbin. Sâp yanâmâ Toma orowâk tatbin. Menduhuakmâ tatmunɽe Yesuɽe teteningim sâop. “Yen biwiyenɽe huruɽ sâek,” sâop. <sup>27</sup>Yawu sâm purik pilâm Toma yuwu sâm ekuop. “Bâtnan gut yu wâim ekmâ yaŋak gasumnan ya yawuâk mem nâŋgâ. Nâ bulâɽanâk Anitâɽe hângânnohomu ge mansan yakât otmâ biwihaje nâhâlen kepeim biwi yâhâp ki otbuat.”

<sup>28</sup>Sâmu sâop. “O, Kutdâne, bulâɽanâk gâ Anitâ orop dopyetɽe konohâk mansat.” <sup>29</sup>Sâmu sâop. “Gâɽe yiwerenɽe gut yu mem eksat yakât otmâ biwihaje nâhâlen kepeiat. Yâhâ lohimbi nombotɽaje ki nekmâ biwiyenâŋak nâhâlen kepeim mannomai yamâ biwi nâŋgân nâŋgânyenɽe huruɽ sâmu heronɽe otmâ mannomai.” Yawu sâop.

<sup>30</sup>Yesuɽe kulem topɽe topɽe miop yamâ kerehâk ki kulemguan. <sup>31</sup>Yâhâ olop miop ya ekbin yakât den pat kulemguan yu sâlikum eknomai. Yu sâlikum ekmâ Anitâɽe tihitnenɽe otmâ nanɽe Yesu hângângumu giop yakât nâŋgâɽetâ bulâɽe otmu yâkâlen biwiyenɽe kepeinomai. Yâhâ yâkâlen biwiyenɽe kepeim denɽe lâum mannomai yanâmâ manman kârikɽahât pat kuyiŋgiop ya menomai.

**Yesuhât sâtgât otmâ hoɽ bawalipɽaje ijan dondâ mewi.**

**21** <sup>1</sup>Sâp yakât kakɽan nen hoɽ bawalipɽe nombotɽe Tiweria dengân yakât ginɽan menduhuakmâ tatmunɽe Yesuɽe teteningiop yamâ yuwu. <sup>2</sup>Nâ otmu atane, kutɽe Yakowo, otmu âlâmâ Simon Petoro, âlâmâ Toma, yâkâlâk kutɽe âlâ Boho boho, âlâmâ Natanae Galilaia hânân kapi âlâ Kana sâm yan gâtɽe, otmu lok yâhâp biwiyetɽe Yesuhâlen kepeim manowot ya orowâk menduhuakbin. <sup>3</sup>Menduhuakmâ tatmunɽe emet ɽiɽ sâwe sâm otmu Petoronɽe yuwu sâm eknongop. “Nâmâ ge ijan dâiwehât nanɽan.”

Sâmu sâwin. “Nen orowâk arinom,” sâm gemunje wanngaen orowâk yâhâwin. Ari omoje pâlâmne manbin.

<sup>4</sup>Emet harj sâmu yan Yesuje dengân ginjan kinop. Yâhâ nenâmâ kâlêwângen ki tatbin. 100 mita, dop yawuyaen tatbin yamâ towatne ekmunje ki keterahop. <sup>5</sup>Yâhâ Yesuje yuwu sâm âinongop. “Bukulipne, yen ijan miai, me bia?”

Sâmu “Bia,” sâwin.

<sup>6</sup>Yakât otmâ yuwu sâm eknongop. “Ijan itâne ya wannga nombotgembâ panjetâ gewuap yanâmâ ijan mem dâinomai.” Yawu sâmu yanjak benje wannga nombotgembâ pilâmunje gemu ijan dondâhâlâk ge kutakulakbi. Ge kutakulakjetâ mem dâim wanngaen katne sâm otmunje umatne dondâ olop.

<sup>7</sup>Yawu otmu nâne Petoro ekuwan. “Lok endamâ Kutdânenne yakâ.” Ekumune uk sâm petje tuhum katmâ âi tuhuop yakât otmâ tinjinne yawuâk mem kepeiakmâ saruân kioŋmâ Kutdâhâlen yoloŋ otmâ ariop. <sup>8</sup>Yawu otmuâmâ nenâmâ wanngaenâk tatmâ puli kum ijan itâne dâim dengân ginjan yâhâ kioŋbin. <sup>9</sup>Yesuje banja âlâ mem katmu talop. Katmu tatmu ijan mem hot umu siop. <sup>10</sup>Yawu otmâ Yesuje yuwu sâm eknongop. “Yiwereje ijan miai ya nombotne mem katjetâ siâk.”

<sup>11</sup>Yawu sâmu Petoroje wannga hâmejan yâhâ ijan itârâek mem dâim ginjan gaop. Yâhâ ijan 153 ya itâ kâlêhen kutakulakbi. Yawu gârâmâ ijan yamâ papatoek yamâ benje ijan itâne ya ki berendenj sâop. <sup>12-13</sup>Ijan nombotne katmunje semu orowâk newin. Orowâk nem tatbin yamâ âi pâi tuhunomgât nângâmunje umatne otmu pilâwin.

<sup>14</sup>Yâhâ Yesuje mumunambâ yahalop yakât kakjan dengân ginjan menduhuakmâ tatbin yan teteningiop yanje kalimbuje olop.

### Yesuje Petoro den bâne ekuop.

<sup>15</sup>Nem pesuk pilâmunje Yesuje Simon Petoro yuwu sâm âikuop. “Simon, Yoane nanje, gâneâmâ bukulipgaje biwiyenaje hikunekmâ mansai ya wangiyekmâ biwihaje tinjâk hikunekmâ mansat me girawu?” Sâmu sâop. “Kutdâ, yat ya bulâne. Nâmâ buku otgihiman ya nanjat.”

Sâmu sâop. “Yakât otmâ lohimbî nâhâlen yiwerejeâk torokatmâ mansai ya yengât tihityene otbuat.” <sup>16</sup>Yawu sâm yanjak yâhâpne yuwu sâm âikuop. “Simon, Yoane nanje, gâne biwihaje tinjâk hikunekmâ mansat me bia?” Sâmu sâop. “Kutdâ, yat ya bulâne. Nâne buku otgihiman ya nanjat.”

Sâmu sâop. “Yakât otmâ lohimbî nâhâlen emelâk torokatmâ mansai ya galempongouat.” <sup>17</sup>Yawu sâm kalimbuje yuwu sâm âikuop. “Simon, Yoane nanje, gâne buku otnihimat me bia?” Yawu sâop.

Yâhâ Yesuje kalimbuje âikuop. “Gâne buku otnihimat me bia?” yawu sâop yakât Petoroje nângâmu biwiŋan hâumu yuwu sâop. “Kutdâ, gâhât



sengan senje âlâlâ ki tik tatmap. Yakât otmâ nâje buku otgihiman ya nanjat.”

Sâmu sâop. “Yakât otmâ lohimbi nâhâlen torokatmâ mansai ya galempongom wawaeyekmâ manbuat.

<sup>18</sup>Yâhâ hâmbâi yu me ya tetehihiwuap yakât topje sâwe. Gâje angoân sihan manon yanâmâ petge mem lalakmâ kapi wosapâ wosapâ ariwehât nângâminion yanâmâ âlepje arim tohominion. Yâhâ gâje sombo otbuat yanâmâ bâtege pilârâ lok bâlejanje sâhâm menduhum ki ariwe nângâwualângen dâihekâm arinomial.” Yawu sâm ekuop. <sup>19</sup>Yâhâ Yesuje topje yuwuhât ekuop. Hâmbâi Petoroje Yesuhât tem lâuwangim manmu umatje yawu tetewangiwuap. Umatje tetewangiwuap yan ki lohotje otmu kujetâ mumbuap. Yâhâ ki lohotje otbuap ya lohimbije ekjetâ sâtje otmu Anitâ mepaenomial. Yakât otmâ yuwu sâm ekuop. “Gâmâ biwihaje nâhâlen tijak kepeim tem lâunihim manbuat.” Yawu sâop.

<sup>20</sup>Yawu sâmu Petoroje kabeje kakjambâ olelem nâ nehôp. Yâhâ nâ Yesu orop biwinetje hikuakmâ konohâk ologât menduhuakmâ sot bânje newin yan yâk orop hâlâjakmâ tatbit. Yawu tatbit yakât otmâ âlâje betjehen kiojbuap yakât âikuwan. <sup>21</sup>Yâhâ Petoroje nekmâmâ yuwu sâm Yesu âikuop. “Kutdâ, lok yuâmâ girawu?”

<sup>22</sup>Sâmu sâop. “Yâk tatmuâk âwurem takawom me girawu yamâ nâhât wahap. Yawu gârâmâ yâkât manman yakât ki nângâm ketet otbuat.” Yawu sâm ekuop.

<sup>23</sup>Den yawu sâop yamâ bukulipnaje nângâm hilipgum kelangatbi. Kelangatmâ nâhâitje “ki bâlewuap” sâwi. Yawu gârâmâ Yesuje ya ki sâop. Yâhâ yuwu sâop. “Gârâmâ yâk tatmuâk nâ âwurem takawom me girawu yamâ nâhât wahap. Yawu gârâmâ yâkât manman yakât ki nângâm ketet otbuat,” yawu sâm Petoro ekuop.

<sup>24</sup>Den sâop yuâmâ nine orowâk tatmâ nângâminiwan. Yakât otmâ den kulemguan yu bulâje dondâ.

<sup>25</sup>Otmu Yesuje olop miop yakât pânje konok kulemguan. Yawu gârâmâ âlâlâ olop ya kerek kulemgum metewomgât dop ki oap.